

Eaa ta te Pipiria
ka Apii Mai
ia Tatou?





Pati i tetai apii Pipiria.



bhs-RA
170628

Eaa ta te Pipiria ka Apii Mai ia Tatou?

TEIA PUKA NA

Photo Credits:

- Kapi 25: WHO photo by Edouard Boubat
- Kapi 96-97: Explosion: Based on USAF photo; child: Based on WHO photo by W. Cutting

Kare teia puka e oko. I orongaia mai ei tuanga no tetai angaanga apii Pipiria i te ao katoa, turuia e te tauturu oronga ua.

Me oronga i te tauturu, aere ki te www.jw.org.

Me kare i akakiteia atu, no roto mai te au taikuanga Tuatua Tapu i te *Bibilia Tapu Ra*, urianga 1888. Me kua tataia te *NW* i muri ake i tetai taikuanga, te akaari maira te reira e no roto mai ia i te urianga reo Papaa o te *New World Translation of the Holy Scriptures*.

What Can the Bible Teach Us?

Nenei Anga o Tiunu 2017

Rarotongan (*bhs-RA*)

© 2017

Watch Tower Bible and Tract Society of Pennsylvania

ARONGA NENEI

Watchtower Bible and Tract Society of New York, Inc.

Wallkill, New York, U.S.A.

Made in Japan

AU TUMU TUATUA

PENE

KAPI

Eaa to te Atua Akakoroanga no Tatou?	3
1. Koai te Atua?	8
2. Te Pipiria—E Puka na te Atua	19
3. Eaa to te Atua Akakoroanga no te Tangata?	29
4. Koai a Iesu Mesia?	40
5. Te Oko—Ta te Atua Apinga Aroa Puapinga Rava Atu	52
6. Teiea ra Tei Mate?	62
7. E Tuakaouanga Tetai!	71
8. Eaa te Patireia o te Atua?	83
9. Te Vaitata Maira Ainei te Openga o Teia Ao?	94
10. Te Tika no Runga i te au Angera	105
11. Eaa Te Tumu i Maata ai te Taitaia?	116
12. Akapeea Koe Riro ei ei oa no te Atua?	124
13. Akangateitei i te Apinga Aroa o te Oraanga	135
14. Ka Mataora Toou Ngutuare Tangata	145
15. Te Mataara Tika i te Akamori i te Atua	154
16. Iki Kia Akamori i te Atua	164
17. Te Tikaanga Ngateitei Kia Pure	174
18. Ka Akatapu Ainei au Toku Oraanga Kia Iehova e Kia Papetito?	185
19. Noo Vaitata ua Rai Kia Iehova	197
Au Manako Poto	207

EAA TO TE ATUA AKAKOROANGA NO TATOOU?

ME TATAU koe te nutipepa, akara i te tivi, akarongo i te ratio, ka kite koe e ka akarongo i te au tua anga-anga kino, tamaki e te takinokino. Penei kua rokoia ana koe e te maki me kore kua takake tetai tei aka-perepereia e koe.

E ui kia koe uarai e:

- Ko teia ainei ta te Atua i inangaro noku e toku ngutuare?
- Ka kimi au i te tauturu kiesa ei rapakau i toku au manamanata?
- Ka rauka ainei te au tika tikai?

Te oronga maira te Pipiria i te paunganga papu no teia au uianga.




TE APII MAIRA TE PIPIRIA
E E AU MEA UMERE
TA TE ATUA KA RAVE
I TE ENUA NEI.

Kare te tangata e kite akaou i te mamae,
kare e ruaine e kare e mate.—Apokalupo 21:4

“Ei reira te pirikoki
e rererere aere
ei mei te aili.”
—Isaia 35:6

“Ei reira e
akapueraia’i
te mata o
te matapo.”
—Isaia 35:5



Ka akaora akaouia
mai tei mate.
—Ioane 5:28, 29

Kare e tangata
e maki.
—Isaia 33:24

E maata te kai
na te katoatoa.
—Salamo 72:16

TE PUAPINGA O TA TE PIPIRIA E APII MAIRA

Mama ua kia manako e e moemoea ua te au mea i roto i te au kapi mua o teia puka. Taputou te Atua e ka akatupu aia i te reira. Akamārama mai te Pipiria e akapeea Aia me rave i teia.

Maata atu ta te Pipiria ka rave. Ka akakite mai te reira eaa te ka ano-anoia e mataora ai e e meitaki ei te oraanga. Akamanako ana eaa taau e apiapi ana. Penei no te moni, te ngutuare tangata, te maki, e te mate o tei akaperepereia. Ka rauka i te Pipiria i te tauturu ia koe kia akakoromaki. Ka pu-maana koe i te pauanga o te au uianga mei teia te tu:



- Eaa te tumu o te mamae ta tatou e kite nei?
- Akapeea tatou te akakoromaki anga i to tatou manamanata?
- Ka rauka ainei te mataora no to tatou ngutuare tangata?
- Eaa te ka tupu kia tatou me mate tatou?
- Ka kite akaou ainei tatou i to tatou au akaperepere i mate?
- Eaa tatou ka irinaki ei e ka akatupu te Atua i tana au mea i taputou?

I te mea te tatau ra koe i teia puka, tera i reira te inangaro ra koe kia kite i ta te Pipiria e apii maira. Ka tauturu teia puka ia koe. Te uianga o te au parakarapa ka tauturu ia koe kia mārama i te Pipiria. E maata te reka ana i te uriuri i te Pipiria e te Au Kite o Iehova. Irinaki matou e mei tera katoa koe. Kia akameitaki mai te Atua ia koe kia kite i ta te Pipiria ka apii mai!

APII I TAAU PIPIRIA

E 66 puka e te au reta i roto i te Pipiria. Kua tukuia te reira ki roto i te au pene e te au irava. Kia mā mā ua te kimi i tetai irava. Me taikuia tetai irava, ko te numero mua ka aru mai i te ingoa o te puka Pipiria, ko te pene ia, e te numero ka aru mai ko te irava ia. Ei akaraanga, me kite koe ia "2 Timoteo 3:16," tera te aiteanga ko te rua o te reta a Timoteo, pene 3, irava 16.

Me kimi koe i te au irava i taikuia, ka viviki koe te matau i te Pipiria. Akamata katoa i te tatau te Pipiria i te au rā. Me tatau koe e ā ki te rima pene i te rā, ka pou ia koe te tatau i te Pipiria katoa i te mataiti.



KOAI TE ATUA?

E MAATA te uianga a te tamariki e ui ana. Me akamārama atu koe i tetai mea, ka ui mai ratou e, ‘No teaa ra?’ Me pau atu koe ka ui mai rai ratou e, ‘No teaa ra?’

² Noatu e tamariki tatou e me kare, e uianga ta tatou pouroa. Penei ka ui tatou eaa te ka kai, te ka aao me kore te ka oko e penei no runga i tetai au mea puapinga o te oraanga e no te tuatau ki mua. Me kare tatou e kite i te pauanga, penei ka akamutu tatou i te kimi atu rai.

³ E pauanga ainei ta te Pipiria no ta tatou au uianga? Manako tetai aronga e ae, karanga ratou e e ngatā kia mārama i te Pipiria. Penei manako ratou e ko te au puapii ua e te au orometua tei kite i te pauanga. Akamā tetai papaki i te akakite e kare ratou i kite i te pauanga. Eaa ra toou manako?

⁴ Penei ka inangaro koe i te pauanga no te au uianga mei teia: Eaa te akakoroanga o te oraanga? Eaa te ka tupu kiaku me mate au? Mei teaa ra to te Atua tu? Akakite a Iesu: ‘E pati, e orongaia mai ta kotou; e kimi, e kitea iā ia kotou; e topāpā, e kiritiia mai te pa

1, 2. Eaa te au uianga e ui ua ana te tangata?

3. Eaa te tangata i manako ei e kare ratou e kite i te pauanga ki ta ratou uianga?

4, 5. Eaa tetai au uianga puapinga e ui ana koe? No teaa koe ka kimi ei te pauanga?

ia kotou.’ (Mataio 7:7) Eiaa e akaoti, kia kite roa koe i te pauanga ka rauka i te irinaki.

⁵ Ae, me “kimi pu tikai” koe, ka kitea te pauanga i roto i te Pipiria. (Maseli 2:1-5) Kare e ngatā kia mārama i te pauanga. Taau ka kite, ka akatupu i te mataora i teiane, e te manakonakoanga a te tuatau ki mua. Ka tuatua ana tatou no runga i tetai uianga e ekoko ana te tangata.

TE MANAKO MAIRA AINEI TE ATUA IA TATOU?

⁶ Manako te manganui e kare te Atua e manako mai ana ia tatou. Naringa te manako maira aia ka tuke te tu o te oraanga. Te tupu nei te tamaki, te makitakita e te taitaia i teia ao. Te maki, te mamae ngakau e te mate. ‘Me te manako maira te Atua ia tatou, kore aia e takore i teia au mea e tupu nei?’

⁷ E akavare ana te au arataki akonoanga i te tangata kia irinaki e e kino te Atua. Me tupu tetai mea kino, karanga ratou e ko te anoano tera o te Atua e ko tana tera i inangaro kia tupu. Te akaapa ra ratou i te Atua. Te apii maira te Pipiria e **kare rava te Atua e vavare i te kino**. Akakite a Iakobo 1:13 e: “Eiaa rava e tangata pikikaaia e karanga e, Kua pikikaaia au e te Atua: kare rava te Atua e vavare i te kino, kare rava oki aia e pikikaa i te tangata.” Te aiteanga, noatu **kare te Atua** i takore i te au mea kino kia kore e tupu, **kare**

6. Eaa te manganui i manako ei e kare te Atua e manako mai ana i to ratou turanga taitaia?

7. (a) Peea te au arataki akonoanga i te akavare anga i te tangata e e kino te Atua? (e) Eaa tatou i papu ei e kare na te Atua e akatupu ana i te au mea kino?

ra nana e akatupu ana i te reira. Kare aia e timata ia tatou ki te au mea kino.—**E tatau ia Iobu 34:10-12.**

8 Tetai akaraanga. Akamanako ana i tetai mapu tane e noo ra i te kainga e tona nga metua. E tamaiti inangaroia e tona papa, tei apii iaia kia rave i te au ikianga tau. Akarongo kore aia i tona papa e kua aka-atea mei te kainga. Rave aia i te kino e kua ō ki roto i te manamanata. Ka akaapa ainei koe i te papa no tei kore i tāpu mai i tana tamaiti? Kare! (Luka 15:11-13) Mei tera rai te Atua, kare aia e tāpu ana i te tangata me iki ratou kia akarongo kore iaia i te rave i te kino. Me tupu tetai mea kino, e akamaara e kare na te Atua i akatupu. Kare e tau kia akaapa i te Atua.

9 E tumu tau tetai i kore ei te Atua i takore i te au mea kino. Roto i te Pene 11, ka kite koe i ta te Pipiria e akakite ra no teia. E aroa maata to te Atua ia tatou, kare nana i akatupu i to tatou manamanata. Koia anake ua rai te ka rauka i te takore i te reira.—Isaia 33:2.

10 E Atua tapu a Iehova. (Isaia 6:3) Te au mea rava-rai tana e rave ana e mea viivii kore, mā e te meitaki. Ka rauka ia tatou te irinaki Iaia. Kare te tangata i aite kiaia, e tarevake ana ratou. Noatu me e tutara tuatua tika tetai, kare ona mana kia takore i te au kino rava-rai ta te aronga kino i akatupu. Ka rauka ra i te Atua, e ka takore aia i te au tu kino pouroa e tuatau ua atu.—**E tatau ia Salamo 37:9-11.**

8, 9. No teaa ra kare ei e tau kia akaapa i te Atua no to tatou au manamanata? Oronga mai tetai akaraanga.

10. Eaa i papu ei ia tatou e ka takore te Atua i te au kino pouroa ta te tangata i akatupu?

EAA TO TE ATUA MANAKO ME TAITAIA TE TANGATA?

11 Eaa to te Atua manako i te au mea e tupu nei i teia ao e i roto i toou oraanga? Apii te Pipiria e e mea 'inangaro na Iehova te tuatua-tau,' koia oki te tu tika. (Salamo 37:28) Inangaro aia kia kite tatou eaa te mea tika, eaa te mea tarevake. Mareka kore aia me taitaia tatou. Karanga te Pipiria e "ongoongo rava akera tona ngakau" no te mea kua kī roa te enua i te kino i mua ana. (Genese 6:5, 6) Kare te Atua i tau. (Malaki 3:6) Akakite te Pipiria e te manako maira Aia ia koe. —**E tataua ia 1 Petero 5:7.**

12 Karanga katoa te Pipiria e i anga te Atua ia tatou i tona uaorai tu. (Genese 1:26) Kua aite to tatou au tu mei tona. Me te kinokino ra koe i te kite i te aronga meitaki ua e taitaia ra, papu e e maata atu to te Atua mamae ngakau i teia tu! Akapeea tatou i kite ei?

13 Apii mai te Pipiria ia tatou e "ko te Atua oki te aroa." (1 Ioane 4:8) Te au mea ravarai Tana i rave, rave aia no tona aroa. Aroa tatou no to te Atua aroa. Akamanako ana: Me e mana toou, ka takore ainei koe i te au turanga taitaia e te tau kore i teia ao? Ae ka takore koe no toou inangaro i te tangata. Akapeea te Atua? E mana tona e ka takore aia i te au turanga taitaia e te tau kore, no tona aroa ia tatou. Papu e ka tupu Tana au taputou i taikuia i te akamata-anga o teia puka! E rauka ai te irinaki i te reira, ka

11. Eaa ra to te Atua manako me taitaia koe?

12, 13. (a) Eaa tatou i aroa ai e i manako ei i etai ke, eaa ra to tatou manako no runga i te turanga taitaia i teia ao? (e) Eaa i papu ei ia tatou e ka takore te Atua i te au turanga taitaia e te tau kore?

anoanoia kia maata atu taau ka kite no runga i te Atua.

INANGARO TE ATUA KIA KITE KOE IAIA

14 Me inangaro koe kia riro ei oa no tetai tangata, eaa taau mea mua ka akakite kiaia? Toou ingoa. E ingoa ainei to te Atua? Karanga tetai au akononga e ko te Atua, ko te Atua. E taoonga ua tera mei te “ariki” e te “peretiteni.” Akakite mai te Atua e ko Iehova tona ingoa. Karanga te Salamo 83:18

Me inangaro koe kia riro ei oa no tetai tangata, ka akakite koe i toou ingoa kiaia. Kua akakite mai a Iehova i tona ingoa i roto i te Pipiria


e: “Kia kite ratou e, ko Iehova toou ingoa, e ko koe anake Tei Teitei i te enua katoa nei.” Tauatini ua atu taime i taiku ei te au tata Pipiria i te ingoa o te Atua. Inangaro a Iehova kia kite koe i tona ingoa e kia kapiiki i te reira. Akakite mai aia i tona ingoa no tona inangaro kia riro koe ei oa nona.

15 E aiteanga puapinga to te ingoa o te Atua ko Iehova. Ka rauka iaia te akatupu i tetai ua atu o tana taputou e tona akakoro-

14. Koai to te Atua ingoa, peea tatou i kite ei e ka inangaroia kia kapiiki tatou i tona ingoa?

15. Eaa te aiteanga o te ingoa, Iehova?





Apii mai te Pipiria e
e Atua aroa a Iehova e
Nana i Anga i te ao katoa nei

anga. Kare e rauka kia tāpu iaia. No Iehova anake ua teia ingoa.*

16 Akakite te Salamo 83:18: “Ko koe **anake** Tei Tei-tei.” Karanga katoa a Apokalupo 15:3: “E angaanga maata e te taka ke taau, e te Atua ra, e te Atua mana

* Me ka inangaro koe kia maata atu taau ka kite no runga i te aiteanga e te tuatua anga i te ingoa o te Atua, akara i te Au Manako Maata 1.

16, 17. Eaa te aiteanga o te (a) “mana katoatoa”? (e) “te Ariki au mutu kore”? (ng) “Tei Anga”?

katoatoa; e aerenga tika e te tuatua-mou taau, e te Ariki o te aronga tapu.” Eaa te aiteanga o te “mana katoatoa”? Te aiteanga, no Iehova anake te mana riri-nui roa atu i te ao katoa. Te taoonga “Ariki au mutu kore,” te aiteanga mei ito roa mai Aia. Akataka mai te Salamo 90:2 e, mei tupua roa mai Aia e tuatau ua atu. Kare ainei tera i te mea umere!

17 Ko Tei Anga i te au mea ravarai, ko Iehova anake ua. Akakite a Apokalupo 4:11 e: “E tau te kakā ia koe, e te Atu, e te akangateitei, e te mana: naau oki i anga i te au mea ravarai nei, e no toou inangaro i mou ei e i angaia’i ratou.” Ae mei te au angera i te rangi ki te au etu, ki te au tumu rakau e te ika o te moana—na Iehova anake i anga!

E mea inangaro na te
metua tana tamariki,
maata atu ra to lehova
inangaro ia tatou



KA RAUKA AINEI KIA RIRO EI OA NO IEHOVA?

18 Matakū te tangata me tatau no runga i to Iehova au tu. ‘E Atua mana ririnui roa a Iehova e te ngatei-tei, tei te atea ke ua aia, eaa i reira aia ka maara mai ei iaku?’ Ko ta Iehova ainei teia i inangaro kia manako koe? Kare. Inangaro Aia i te akavaitata mai kia koe. Akakite te Pipiria e “kare ra aia i atea ke atu ia tatou.” (Angaanga 17:27) Inangaro a Iehova ia tatou kia akavaitata kiaia e te taputou maira aia e “nana e akavaitata mai kia kotou.”—Iakobo 4:8.

19 Akapeea koe e riro ei ei oa no te Atua? Akakite a Iesu: “Teia oki te ora mutu kore, kia kite ratou ia koe i te Atua mou ra, e ia Iesu i te Mesia, i taau i tono maira.” (Ioane 17:3) E apii atu rai kia kite koe ia Iehova e Iesu. I reira e rauka ai ia koe te ora mutu kore. Kua apii tatou e “ko te Atua te aroa.” (1 Ioane 4:16) Inara e maata tona au tu meitaki. Akakite te Pipiria e e “Atua takinga-meitaki [Iehova], e te aroa ua, e te akakoromaki maata, e te meitaki maata, e te tuatua-mou.” (Exodo 34:6) ‘Kua tika ia Iehova kia akakore mai i te ara.’ (Salamo 86:5) E tu akakoromaki to te Atua e te tiratiratu. (2 Petero 3:9; Salamo 18:25) Maata atu taau ka kite no runga i tona au tu meitaki ia koe tatau ra i te Pipiria.

20 Peea e rauka ai kia akavaitata atu kia Iehova me

18. Eaa tetai aronga i manako ei e kare ratou e tau kia riro ei oa no Iehova? Eaa ta te Pipiria e akakite maira?

19. (a) Akapeea koe e riro ei ei oa no te Atua? (e) Ko teea i to Iehova au tu taau mea reka roa atu?

20-22. (a) Peea e rauka ai ia tatou kia akapiri atu kia Iehova? (e) Eaa taau ka rave me inangaro tetai aronga kia akamutu koe i te apii i te Pipiria?

kare koe e kite ana iaia? (Ioane 1:18; 4:24; 1 Timoteo 1:17) Me tatau koe te Pipiria no runga ia Iehova, ka kite koe e e Atua tika tikai aia. (Salamo 27:4; Roma 1:20) Ka maata atu toou inangaro ia Iehova ia koe e apii ra no runga iaia, e ka piri vaitata roa atu koe kiaia.

21 Ka mārama koe e ko Iehova to tatou Metua. (Mataio 6:9) Nona to tatou ora, inangaro aia kia mataora to tatou oraanga. Ko tera ta te metua aroa ka inangaro no tana tamariki. (Salamo 36:9) Te apii maira te Pipiria e ka rauka ia koe kia riro ei oa no Iehova. (Iakobo 2:23) Ae, te inangaro maira a Iehova, ko Tei Anga i te ao katoa nei, kia riro koe ei oa nona!

22 Penei ka inangaro tetai aronga kia akamutu koe te apii i te Pipiria. Matakū ratou e ka tauī koe i taau akonoanga. Eiaa e akatika i tetai ua atu kia arai ia koe kia kore e riro ei oa no Iehova. Koia te Oa meitaki rava atu noou.

23 Ia koe apii ra i te Pipiria, e au mea tetai kare koe e mārama. Eiaa e akamā i te ui e te pati tauturu. Akakite a Iesu, kia akaaka tatou mei te tamariki meariki te tu. (Mataio 18:2-4) E maata te uianga a te tamariki. Inangaro te Atua kia kimi koe i te pauanga. No reira e apii meitaki i te Pipiria kia papu ia koe e ko te tua-tua mou taau e apii ra.—**E tatau ia Angaanga 17:11.**

24 Te mataara meitaki roa atu kia kite ia Iehova, e apii i te Pipiria. Te pene ka aru mai, ka kite tatou eaa te Pipiria i tuke ei mei tetai ua atu puka.

23, 24. (a) Eaa i anoanoia ai kia ui ua rai koe i te uianga? (e) Eaa ta tatou ka uriuri i roto i te pene ka aru mai?

TE TIKA 1

KOAI TE ATUA?

“Naau oki i anga i te au mea ravarai nei.”

—Apokalupo 4:11

Eaa ta te Pipiria ka apii mai ia tatou no runga i te Atua?

Apokalupo 15:3

Koia te Mana Katoatoa e tei ririnui rava atu i te ao katoa.

Salamo 90:2

Mei tupua roa mai aia.

Mataio 6:9

Ko te Atua to tatou Metua. Inangaro aia kia mataora to tatou oraanga.

Angaanga 17:27

Inangaro Aia kia akapiri vaitata mai kia tatou.

TE TIKA 2

E INGOA TO TE ATUA

“Ko Iehova . . . ko toku ĩa ingoa e tuatau ua atu.”

—Exodo 3:15

Eaa i puapinga ai to te Atua ingoa?

Salamo 83:18

Akakite mai te Atua kia tatou e ko Iehova tona ingoa. Kare te “Atua” e te “Atu” i te ingoa. E taonga ua te reira mei te “ariki” e te “peretiteni.” Inangaro a Iehova ia koe kia kapiki i tona ingoa.

Exodo 3:14

Aiteanga o tona ingoa, “Ka Akatupu Aia.” No te mea na Iehova i anga i te au mea ravarai, ka rauka iaia te akatupu i tetai ua atu o tana taputou e tona akakoroanga.

TE TIKA 3**INANGARO A
IEHOVA IA TATOU**

“Ko te Atua oki te Aroa.”—1 Ioane 4:8

Eaa te ō maira no to te Atua aroa no tatou?

Exodo 34:6; Salamo 37:28

E tu takinga meitaki Tona e te aroa ua. Mea inangaro na Iehova te tuatua mou e te tuatua tau.

Salamo 86:5

Ka akakore Aia i te ara.

2 Petero 3:9

E akakoromaki maata Tona ia tatou.

Salamo 18:25

E tu tiratiratu Tona kia tatou.

TE TIKA 4**TE MANAKO MAIRA
TE ATUA IA KOE**

“E uri i to kotou tumatetenga katoa ki runga iaia; koia oki te tiaki mai ia kotou.”—1 Petero 5:7

Akapeea koe i kite ei e te manako maira te Atua ia koe?

Salamo 37:9-11

Taputou mai a Iehova e ka takore Aia i te turanga taitaia e te kino ta te aronga kino i akatupu.

Iakobo 4:8

Inangaro a Iehova ia koe kia akapiri vaitata kiaia.

Ioane 17:3

Te maata atu i taau ka kite no runga i te Atua, ka maata atu toou inangaro iaia.

TE PIPIRIA —E PUKA NA TE ATUA

EAA toou manako me oronga mai toou oa i tetai apinga aroa naau? I reira rai inangaro koe i te va'i, rekareka koe kua maara mai aia ia koe. Akameitaki koe iaia.

² E apinga aroa te Pipiria na te Atua. Ta te reira e akakite maira, kare e kitea i tetai ngai ke atu. Akakite mai te reira e na te Atua i anga i te rangi, te enua, te tangata mua e te vaine mua. Me manamana-ta tatou, ka tauturu ta te reira au kaveinga ia tatou. Akakite mai te reira akapeea te Atua me akatupu i tona akakoroanga no te enua. E apinga aroa puapinga tikai!

³ Ia koe e apii ra i te Pipiria, ka kite koe e te inangaro maira a Iehova ia koe ei oa nona. Te maata atu i taau ka kite iaia, te vaitata atu ia toou pirianga Kiaia.

⁴ Kua uriia te Pipiria i roto i te 2,600 tuma reo. Piri-
oni ua atu Pipiria tei neneia. Te manganui o te tangata i teia ao, e tatau ana i te Pipiria i roto i to ratou uaorai reo. Te au **epetoma ravarai**, e tai mirioni tuma tangata e tu ana i te Pipiria. Ae kare atu e puka i aite ki te Pipiria.

1, 2. Eaa i riro ei te Pipiria ei apinga aroa puapinga no ko i te Atua?

3. Eaa taau ka kite ia koe e apii ra i te Pipiria?

4. Eaa taau e umere ana no runga i te Pipiria?



Ka rauka te *New World Translation of the Holy Scriptures* i roto i te au reo e manganui

⁵ “E mea akauruia mai [te Pipiria] e te Atua.” (E tataua ia **2 Timoteo 3:16**.) Manako tetai aronga e, ‘Me na te tangata i tata i te Pipiria, akapeea i riro ei e na te Atua?’ Pau te Pipiria, ‘ko te au tangata tapu o te Atua tei tuatua i ta te vauerua tapu i tuku mai ia ratou.’ (2 Petero 1:21) Mei te pu rai o tetai pitiniti, akakite aia ki tona tekeretere kia tata i tetai reta. Naai tera reta? Na te pu, kare na te tekeretere. Pera katoa te Pipiria, na te Atua te reira, kare na te aronga i akakite Aia kia tata. Akauru Aia ia ratou kia tata i tona manako. Na te Atua te Pipiria.—1 Tesaloniana 2:13; akara i te Au Manako Poto 2.

5. Eaa tatou ka karanga ai e “e mea akauruia mai e te Atua” te Pipiria?

TANO TIKAI TA TE PIPIRIA

6 Tere atu i te 1,600 mataiti te tata anga i te Pipiria. Tukeke te tuatau e ora ra te aronga tata. E au turanga apii teitei to tetai papaki, kare ra to tetai pae. Ei akaraanga, e taote tetai, e aronga tanutanu, e ravakai, e tiaki mamoe, e au akava e te ui ariki. Rotai te au tunga pouroa o te Pipiria noatu e tukeke te aronga tata. Kare te manako o tetai pene i tuke mei tetai mai.*

7 Te au pene mua o te Pipiria, no runga i te akamataanga te manamanata o teia ao. Te au pene openga, no ta Iehova ravenga me akariro i te enua ei parataito. Te au mataiti tei aerea, akapapu mai te tuatua o te au tangata o mua ana e e akatupu ua ana a Iehova i tona akakoroanga.

8 Kare te Pipiria i tataia ei apii kite taieni e ei puka apii kite noa ua nei. Inara kua tano tikai ta te reira i akakite no te au mea o te kite taieni. Ko tera rai ta tatou ka manako no runga i te Tuatua a te Atua. Ei akaraanga te puka o Levitiku, tei roto ta Iehova au akauenga no te ngati Iseraela ei paruru ia ratou kia kore e totoa te maki. Tataia teia i mua roa atu ka kite ei te tangata e ka akatupu te tiemu i te maki. Tano katoa ta te Pipiria e kua akautai te enua ki runga i te kore. (Iobu 26:7) Irinaki te maataanga e e paraa ua

* Karanga tetai aronga e kare te Pipiria e rotai ana, inara kare tera i te tika. Akara i te pene 7 o te puka *The Bible—God's Word or Man's?* tei neneia e te Au Kite o Iehova.

6, 7. Eaa tatou ka karanga ai e te rotai ra te Pipiria?

8. Oronga mai i te au akaraanga e akaari maira e te rotai ra te kite taieni ki te Pipiria.

te enua, akakite ra te Pipiria e e punupunu.—Isaia 40:22.

⁹ Tano meitaki ta te Pipiria no runga i te tuatua o te tangata o mua ana. Maata te puka no runga i te tuatua o te tangata kare te aronga tata e akakite ana i te tika. Me kare to ratou enua e autu i te tamaki, kare ratou e tata i te reira. Te aronga tata Pipiria ra, akakite ratou i te tika me kare to Iseraela e autu. Tata ratou i to ratou uaorai tarevake. Ei akaraanga, akakite a Mose i roto ia Numero i te tarevake tana i rave e kua akaapaia aia. (Numero 20:2-12) Ka rauka ia tatou te irinaki i te Pipiria no te mea, na te Atua tera Tuatua.

E PUKA KUA KĪ I TE AU AKO MEITAKI

¹⁰ “Te au tuatua tapu katoa i tataia ra, e mea akauruia mai e te Atua, e e mea meitaki ei apiianga, ei akoanga, ei akakiteanga apa.” (2 Timoteo 3:16) Tau te ako a te Pipiria no tatou. Na Iehova i anga ia tatou, mārama aia i to tatou aerenga manako e te ngakau. Kite aia i to tatou tu, inangaro aia kia mataora tatou. Kite aia eaa te mea e meitaki ei tatou e e kino ei.

¹¹ Roto ia Mataiao pene 5 ki te 7, apii mai a Iesu aka-peeaa tatou e mataora ai, me noo au ua e etai ke, me pure e me akatere i te moni. Noatu i oronga aia i teia ako e 2,000 mataiti akenei, te puapingaia nei rai no te oraanga i teia tuatau.

9. Eaa ta te tu tuatua tika o te aronga tata Pipiria e apii maira ia tatou?

10. Eaa te ako a te Pipiria i puapinga ai no tatou i teia tuatau?

11, 12. (a) Eaa te ako meitaki ta Iesu i oronga mai i roto ia Mataiao pene 5 ki te 7? (e) Eaa akaou atu tetai ka kite tatou mei roto i te Pipiria?

12 Apii mai a Iehova ia tatou i te au kaveinga Pipiria kia meitaki te oraanga ngutuare, kia riro ei aronga angaanga meitaki e kia noo au ua e etai ke. Noatu koai tatou, teiea tatou, eaa to tatou manamanata, ka tauturu te au kaveinga Pipiria ia tatou.—**E tatau ia Isaia 48:17**; akara i te Au Manako Poto 3.

KA RAUKA IA KOE TE IRINAKI I TE TOTOU PIPIRIA

13 Maata te totou Pipiria tei akatupuia. Ei akaraanga, totou a Isaia e ka takoreia a Babulonia. (Isaia 13:19) Akataka aia akapeea tikai me tomoia te oire. Na te au ngutupa maatamaata e te kauvai i paruru i te oire. Totou a Isaia e ka tamaroia te kauvai e ka tuera ua te au ngutupa. Ka aere au ua te nuku vaeau ki roto e kare e tamaki. Totou katoa a Isaia e na tetai tangata ko Kuro tona ingoa e akavi ia Babulonia.—**E tatau ia Isaia 44:27–45:2**; akara i te Au Manako Poto 4.

14 E rua anere mataiti i muri ake i te tata angaia te totou, tae mai tetai nuku vaeau i te tamaki ia Babulonia. Koai ra te arataki? Ko Kuro, te ariki o Peresia, mei tei totouia. Kua papa te au mea ravarai no te toenga o te totou kia akatupuia.

15 I te po ka tomoia ai te oire, tei te umukai to Babulonia. Kare ratou i matakū no te mea na te au patu mamaata e te kauvai e paruru ra i te oire. I vao ake kua akatae a Kuro e tona nuku i te vai mei roto i te kauvai. Tau ua te marō o te vai no te nuku o Peresia kia aere na raro. Akapeea ratou e tae ei ki tetai tua

13. Eaa ta Isaia i akakite e ka tupu ki te oire ko Babulonia?

14, 15. Akapeea te totou a Isaia i te akatupu angaia?

Totou te tangata
tata Pipiria a Isaia
e ka takoreia a
Babulonia



mai o te au patu o Babulonia? Mei tei totouia, te tuera
ua ra te au ngutupa, e kua aere au ua te au vaeau ki
roto kare i tamaki ana.

16 Kua totou a Isaia e kare e tangata e noo akaou

16. (a) Eaa ta Isaia i totou no runga i te tuatau ki mua? (e) Aka-
peea tatou i kite ei e kua tupu rai te totou a Isaia?

i Babulonia. Tata aia: “Kare e tangata akaouia, kare oki e nooia i tera uki i tera uki.” (Isaia 13:20) Kua tupu ainei teia? I te ngai i tu ana a Babulonia, mei te 50 maire i te tua tonga o Baghdad i Iraq, e au putunga toka ua te vai ra. E i teia tuatau kare e tangata e noo ana i reira. Kua pakoko takiri a Iehova ia Babulonia “ki te pakoko mate [me kore kua akataneaia].”—Isaia 14:22, 23.*

¹⁷ Maata te totou Pipiria tei akatupuia e ka rauka ia tatou te irinaki i tei totouia no te tuatau ki mua. Ka akatupu a Iehova i tana taputou kia akariro i te enua ei parataito. **(E tatau ia Numero 23:19.)** Ae, ka

* Me ka inangaro koe kia maata atu taau ka kite, e tatau i te kapi 27-29 o te poroutia *A Book for All People*, tei neneia e te Au Kite o Iehova.

17. Eaa te tumu ka rauka ai ia tatou te irinaki i te au taputou pou-roa a te Atua?

Oire Babulonia tei akataneaia



rauka ia tatou “te ora mutu kore, i ta te Atua, ta te kore e tika kia pikikaa, i tuatua oronga mai ou teiane i ao.”—Tito 1:2.*

KA RAUKA I TE PIPIRIA I TE TAU I TOOU ORAANGA

18 Kua apii tatou e kare atu e puka i aite ki te Pipiria. Rotai te reira e te tano meitaki me tuatua no runga i te kite taieni e te tuatua o te tangata o mua ana. Maata te au ako meitaki e te au taputou tei tupu takere. E maata katoa ta te Pipiria ka rauka i te rave. Tata te apotetoro a Paulo: “E mea ora oki te tuatua a te Atua, e te ririnui.” Eaa te aiteanga o teia?—**E tataua ia Ebera 4:12.**

19 Ka rauka i te Pipiria i te tau i toou oraanga. Te tauturu ia koe kia mārama eaa tikai to roto i toou ngakau. Ei akaraanga, penei ka manako tatou e te inangaro ra tatou i te Atua. Ei akapapu e e inangaro tikai to tatou Iaia, ka anoanoia kia akono tatou i ta te Pipiria e apii maira.

20 Na te Atua te Pipiria. Inangaro aia kia tataua koe, kia apii e kia inangaro i te reira. Kia akono e kia apii ua rai i teia apinga aroa. I reira koe e mārama ai i to te Atua akakoroanga no te tangata. E maata atu ta tatou ka kite i te pene ka aru mai.

* Kare ko te pou anake ua o Babulonia te totou Pipiria tei akapupuia. E maata taau ka kite no runga i te au totou o Iesu Mesia i roto i te Au Manako Poto 5.

18. Akapeea a Paulo i te akataka mai anga i “te tuatua a te Atua”?
19, 20. (a) Akapeea te Pipiria te tauturu anga ia koe kia kite eaa to roto i toou ngakau? (e) Akapeea koe te akaari anga e te akaperepere ra koe i teia apinga aroa?

TE TIKI 1

NA TE ATUA TE PIPIRIA

“Te au tuatua tapu katoa i tataia ra, e mea akauruia mai e te Atua.”—2 Timoteo 3:16

Akapeea te Pipiria i tuke ei mei tetai ua atu puka?

Kua uria te Pipiria i roto i te 2,600 tuma reo. Pirioni ua atu Pipiria tei neneia.

Akakite mai te Pipiria i tetai au mea kare e kitea i tetai ngai ke atu.

1 Tesalonia 2:13

Na te Atua te Pipiria.

2 Petero 1:21

Akauru te Atua i te tangata kia tata i tona manako.

TE TIKI 2

E PUKA TOTOU
TE PIPIRIA

“Te Atua . . . te kore e tika kia pikikaa.”—Tito 1:2

Eaa ka rauka ai ia koe kia irinaki i te Pipiria?

Isaia 44:27–45:2

Anere ua atu mataiti i mua ake ka tupu ei, kua totou te Pipiria e ka akapeea to Babulonia me akaviia.

2 Timoteo 3:1-5

Te akatupuia nei te au totou Pipiria.

Numero 23:19

Ka rauka ia tatou te irinaki i ta te Pipiria i totou no te tuatau ki mua.

TE TIKA 3**TATAIA TE PIPIRIA EI
TAUTURU IA KOE**

“Ko au toou Atua ra ko Iehova, ko tei akakite ia koe i te mea e puapinga’i koe.”—Isaia 48:17

Eaa taau i mou mai no runga i te Pipiria?

Iobu 26:7; Isaia 40:22

Tano tikai ta te Pipiria i akakite no te au mea o te kite taieni.

Numero 20:2-12

Akakite te aronga tata Pipiria i te tika.

Mataio 5-7

Apai mai a Iesu akapeea e rauka ai te mataora, te noo au ua e etai ke, akapeea me pure e me akatere i te moni.

TE TIKA 4**KA RAUKA I TE PIPIRIA I TE
TAUI TOOU ORAANGA**

“E mea ora oki te tuatua a te Atua, e te ririnui.”
—Ebera 4:12

Eaa ta te Tuatua a te Atua ka rave noou?

- Tauturu ia koe kia mārama i to te Atua akakoroanga.
- Tauturu ia koe kia kite eaa tikai to roto i toou ngakau.
- Tauturu ia koe kia mārama eaa ta te Atua e tapapa maira mei ia koe.

Inangaro a Iehova ia koe kia tatau, kia apii e kia inangaro i te Pipiria.

EAA TO TE ATUA AKAKOROANGA NO TE TANGATA?

E AKAKOROANGA manea tikai to te Atua no te tangata. Anga aia i te nga tangata mua ko Adamu e Eva kia noo i roto i tetai kainga manea. Tona akakoroanga, kia anau tamariki raua e kia akariro i te enua katoa ei parataito e kia akono i te manu.—Genese 1:28; 2:8, 9, 15; akara i te Au Manako Poto 6.

² Toou manako e ka noo rai tatou i roto te parataito? Akakite mai a Iehova e: “Kua akakoro rai au, e naku ia e rave.” (Isaia 46:9-11; 55:11) Ae ka rave rai Aia i tana i akakoro e kare e rauka kia tāpu iaia. Karanga a Iehova e e tumu tau tetai i anga ai aia i te enua. “Kare ra aia i anga ei mea puapinga kore ua.” (Isaia 45:18) Inangaro Aia i te tangata kia noo i te enua nei. Eaa te tu tangata ta Iehova i inangaro kia noo i te enua nei? Karanga te Pipiria: “Ka riro te enua no te **aronga tuatua-tika**, ka **noo tamou** rai ratou i reira.”—Salamo 37:29; Apokalupo 21:3, 4.

³ Teia tuatau te maki nei te tangata e te mate nei. Te tamaki ra e te tā ra i tetai e tetai. Kare ko teia ta Iehova i akakoro. Eaa teia i tupu ei, e eaa te tumu? Ko te Pipiria ua te ka rauka i te akamārama mai.

-
1. Eaa to te Atua akakoroanga no te tangata?
 2. (a) Eaa to tatou kite e ka rave rai te Atua i tana i akakoro? (e) Eaa te tu tangata ta te Atua ka inangaro kia noo i te enua nei, e eaa te roa?
 3. I te mea te maki e te mate nei te tangata, eaa ra taau ka ui?

ENEMI O TE ATUA

⁴ Akakite te Pipiria e e enemi to te Atua, “tei karangaia i te diabolō ra, e ko Satani.” Tuatua a Satani kia Eva na roto i te ovi i te kainga i Edene, kia manakoia e ko te ovi te tuatua ra.—Apokalupo 12:9; Genese 3:1; akara i te Au Manako Poto 7.

⁵ Na te Atua ainei i anga i te Tiaporo ia Satani? Kare! Tona akapapa anga i te enua no Adamu e Eva, te noo ra **tetai angera i te rangi tei riro mai ei Tiaporo.** (Iobu 38:4, 7) Akapeea ake? E akapeea ana tetai tangata meitaki ua me riro ei keikeia? Tona anau mai anga kare aia i te keikeia. Inara kua noinoi aia i tetai apinga kare nana. Kua **akamanako ua rai aia i te reira**, e tei tupu kua pakari roa atu tona inangaro. I te atianga tau, kua keia aia. Nana rai i akariro iaia ei keikeia.—E **tatau ia Iakobo 1:13-15**; akara i te Au Manako Poto 8.

⁶ Teia tei tupu ki taua angera. Anga te Atua ia Adamu e Eva, akakite aia kia raua kia anau tamariki e kia “akaki i te enua.” (Genese 1:27, 28) Penei kua manako taua angera e, ‘Ko au ua ake ta te tangata e akamori!’ Kare atu ona manako ke mari ra kia peke iaia i tei tau anake ua na Iehova koia oki, kia akamori te tangata iaia. No reira kua pikikaa aia ia Eva e kua akavare iaia. (E **tatau ia Genese 3:1-5.**) No tana i rave kua riro mai aia ko Satani te Tiaporo, ei enemi no Iehova.

4, 5. (a) Koai tei tuatua kia Eva na roto i te ovi i te kainga i Edene? (e) Akapeea tetai tangata meitaki ua me riro ei keikeia?

6. Akapeea tetai angera i te riro anga mai ei enemi no te Atua?

⁷ Kua akarongo kore a Adamu e Eva i te Atua e kua kai iora i te ua rakau. (Genese 2:17; 3:6) Kua ara raua i mua ia Iehova. I te tuatau tei aereia kua mate raua mei ta Iehova i akakite. (Genese 3:17-19) Kua ara katoa ta raua tamariki e kua mate. (**E tatau ia Roma 5:12.**) Kia mārama tatou i te tumu i ara ai te tamariki a Adamu e Eva, akamanako ana i teia akaraanga. Tamanako ua e te tunu ra koe i te varaoa i roto i tetai pā kopa. Ka kopa rai te varaoa mei te pā. Te akarongo kore anga a Adamu ia Iehova, kua riro aia ei tangata ara. No te mea e tamariki tatou na Adamu, e aronga ara tatou pouroa e kua aite tatou mei taua pā kopa ra. E no te mea e aronga ara tatou, ka ruaine tatou e ka mate. —Roma 3:23; akara i te Au Manako Poto 9.

⁸ Kua patoi a Satani ia Iehova i tona akavare anga ia Adamu e Eva kia akarongo kore. Inangaro aia kia irinaki raua e e pikikaa a Iehova, e tutara kino, kare e inangaro kia mataora raua. Karanga a Satani e kare o te Atua tika kia akakite ki te tangata eaa ta ratou ka rave, e tikaanga to Adamu e Eva kia iki eaa te mea tika e te mea tarevake. Eaa ra ta Iehova ka rave? Ka rauka ua iaia kia tamate ia ratou kia kore te meameaau. Inara ka akapapu mai ainei tera e e pikikaa a Satani? Kare.

⁹ No reira kare a Iehova i tamate ia ratou i reira rai. Tuku aia i tetai tuatau no te tangata kia tutara ia ratou rai. Na teia e akaari mai e ko Satani te pikikaa e ko

7. (a) Eaa te tumu i mate ei a Adamu raua ko Eva? (e) Eaa te tumu i ruaine ei tatou e i mate ei?

8, 9. (a) Eaa ta Satani i inangaro ia Adamu raua ko Eva kia irinaki? (e) Eaa te tumu kare a Iehova i tamate i te aronga meameaau i reira rai?

Iehova tei kite eaa tei meitaki roa atu no te tangata. E maata ta tatou ka kite i roto i te Pene 11. Eaa toou manako i te ikianga ta Adamu e Eva i rave? E tau ainei kia irinaki raua ia Satani e kia akarongo kore i te Atua? Oronga a Iehova i te au mea katoa na raua. Te oraanga ara kore, te kainga ruperupe e te angaanga kia mata-

Naringa kare no Satani te
au patireia o teia ao, ka oronga
ainei aia i te reira no Iesu?



ora raua. Kare roa a Satani mea i rave ana no raua. Naringa koe i reira eaa ra taau ka rave?

10 E ikianga ta tatou e tei runga te meitaki o to tatou oraanga i ta tatou ka iki. Me ka iki tatou ia Iehova ei tutara i te akapapu e e pikikaa a Satani, e me ka iki tatou ia Satani. (Salamo 73:28; e **tatau ia Maseli 27:11.**) E iti ua te tangata i teia ao e akarongo ana ia Iehova. Kare ko Iehova te tutara o teia ao. Me kare Koia, koai i reira?

KOAI TE TUTARA NEI TEIA AO?

11 Kua kite a Iesu e koai te tutara o teia ao. Tetai atianga “kua akakite maira [Satani] kiaia i te au basileia katoa o te ao nei e to ratou kakā.” Karanga aia kia Iesu: “E oronga atu au i teiane au mea katoa kia koe, kia akatopa mai koe ki raro e akamori mai iaku.” (Mataio 4:8, 9; Luka 4:5, 6) E ui kia koe rai, ‘Naringa kare no Satani teia au patireia, ka oronga ainei aia i te reira no Iesu? Kare. Pouroa teia au kavamani, no Satani.

12 Penei ka manako koe e, ‘Akapeea ake a Satani i riro ei ei tutara no teia ao? Kare ainei ko Iehova te Mana Katoatoa tei anga i teia ao katoa?’ (Apokalupo 4:11) Ae, inara kua kapiki a Iesu ia Satani e ko “te ariki o teiane ao.” (Ioane 12:31; 14:30; 16:11) Kapiki a Paulo i te Tiaporo ia Satani e ko “te atua o teiane ao.” (2 Korinetia 4:3, 4) Tata a Ioane e “te vai ua nei rai to te ao ravarai i raro ake i taua vaerua kino ra.” —1 Ioane 5:19.

10. Eaa te ikianga puapinga ka anoanoia tatou ravarai kia rave?

11, 12. (a) Eaa ta tatou i kite no runga i ta Satani i taputou kia Iesu?

(e) Eaa te au irava e akakite maira e ko Satani te tutara o teia ao?

AKAPEEA TO SATANI AO ME TAKOREIA?

13 Te kino ua atura teia ao. Te kite nei tatou i te tamaki, te au peu kino, te pikikaa e te tā ua i te au ngai ravarai. Kare e rauka i te tangata te takore i teia au manamanata noatu eaa te tu. Kare e roa atu ka takore te Atua i teia ao kino me tae mai te tamaki o Aramagido, e ka mono mai e ao ou takiri.—Apokalupo 16: 14-16; akara i te Au Manako Poto 10.

14 Kua iki a Iehova ia Iesu Mesia ei Ariki no Tona kavamani, te Patireia i te rangi. Te au tauatini mataiti i topa, kua totou te Pipiria e ka tutara a Iesu ei “Ariki no te au” e kare tona kavamani e ope. (Isaia 9:5, 6) Apii a Iesu i tana au pipi kia pure no teia kavamani: “Kia tae toou basileia. Kia akonoia toou anoano i te enua nei, mei tei te ao katoa na.” (Mataio 6:10) I te Pene 8, ka kite tatou e akapeea te Patireia o te Atua me mono i te au kavamani o teia ao. (**E tatau ia Daniela 2:44.**) I reira te Patireia e akariro ei i te enua ei paraitaito.—Akara i te Au Manako Poto 11.

TE VAITATA MAIRA TE AO OU!

15 Taputou te Pipiria e: “Te tatari nei ra tatou i te rangi ou e te enua ou,” e te “vai tika anga o te tuatua-tika ra.” (2 Petero 3:13; Isaia 65:17) Me tuatua te Pipiria no runga i “te enua,” te tuatua ra te reira i te tangata e noo nei i te enua. (Genese 11:1) Ko te “enua ou” e vai tika ra te tuatua tika, ko te au tangata pouroa tei akarongo ia Iehova e tei akameitakiia.

13. No teaa i anoanoia ai tetai ao ou no tatou?

14. Koai ta te Atua i iki ei Ariki no Tona Patireia? Eaa ta te Pipiria i totou mai no runga ia Iesu?

15. Eaa ra te “enua ou”?

16 Taputou a Iesu e ka orongaia te “ora mutu kore” no te aronga ka noo i te enua. (Mareko 10:30) Akapeea e rauka ai ia tatou teia apinga aroa? **E tatau ia Ioane 3:16 e te 17:3**, kia kite i te pauanga. Ka akara tatou i ta te Pipiria i akakite no runga i te oraanga i te enua Parataito.

17 **Ka kore te kino, te tamaki, te takinga kino, e te tā ua.** Kare e aronga kino i te enua nei. (Salamo 37: 10, 11) Ka “akakore [te Atua] i te tamaki e tae rava ake-nei te openga o te enua.” (Salamo 46:9; Isaia 2:4) Ka kī te enua i te aronga tei inangaro e tei akarongo ia Iehova. Mutukore te au.—Salamo 72:7.

18 **Ka noo ponuiaau ua to Iehova iti tangata.** I mua ana me akarongo to Iseraela ia Iehova, meitaki ua ratou no te mea te paruru ra Aia ia ratou. (Levitiku 25:18, 19) I te Parataito, kare a tatou apinga me kore tangata e matakū, e ka noo au ua tatou!—**E tatau ia Isaia 32:18; Mika 4:4.**

19 **E maata te kai.** “E manga sitona okotai rima i ki i te enua nei, i runga i te take o te au maunga ra.” (Salamo 72:16) “E na te Atua [Iehova], e akameitaki mai ia tatou nei,” e “ei reira e ua maata mai ei te enua.”—Salamo 67:6.

20 **Ka riro te enua katoa ei parataito.** Manea te au are e te au kainga o te tangata. (**E tatau ia Isaia 65:**

16. Eaa te apinga aroa ta Iehova ka oronga no te aronga ka noo i tona ao ou, akapeea e rauka ai ia tatou teia apinga aroa?

17, 18. Akapeea tatou i kite ei e ka au ua te enua e ka noo ponuiaau ua tatou?

19. Eaa te tumu ka papu ei ia tatou e ka maata te kai i roto i to te Atua ao ou?

20. Akapeea tatou i kite ei e ka riro mai te enua ei parataito?

21-24; Apokalupo 11:18.) Ka ruperupe te enua mei te kainga rai i Edene. Ka oronga ua mai a Iehova i te au mea ravarai tei anoanoia. Akakite te Pipiria e: “Te oora nei koe [Iehova] i to rima, e te akamerengo nei i te kaki o te au mea ora katoa nei.”—Salamo 145:16.

21 Ka noo au ua te tangata e te manu. Ka rarata ua te manu ki te tangata. Te au manu kino i mua ana, kare e a’e akaou me kanga te tamariki kia ratou. —E tatau ia Isaia 11:6-9; 65:25.

22 Kare e tangata e maki. Maata ta Iesu i akaora i te enua nei. (Mataio 9:35; Mareko 1:40-42; Ioane 5: 5-9) Ei Ariki no te Patireia, ka akaora aia i te tangata ravarai. Kare tetai e karanga e: “Kua maki au.”—Isaia 33:24; 35:5, 6.

23 Ka ora akaou mai tei mate. Taputou a Iehova e ka akatu akaou mai aia i te mirioni ua atu tei mate. “E tuakaouanga to tei mate, te aronga tuatua-tika e te aronga tuatua-tika kore.”—E tatau ia Ioane 5:28, 29; Angaanga 24:15.

24 E ikianga ta tatou pouroa. Kia apii no runga ia Iehova e te tavini iaia, me kia rave i to tatou anoano. Me iki kia tavini ia Iehova ka mataora tatou a te tuatau ki mua. Pati tetai tangata kia maara mai a Iesu iaia me mate aia, taputou a Iesu kiaia i taua rā ra, e ka aravei raua i parataito. (Luka 23:43) Maata ta tatou ka kite no runga ia Iesu Mesia e tana ka rave ei akatupu i ta Iehova au totou.

21. Akapeea tatou i kite ei e ka noo au ua te tangata e te manu?

22. Eaa ta Iesu ka rave no te aronga tei maki?

23. Eaa ta te Atua ka rave no te aronga tei mate?

24. Eaa toou manako no runga i te oraanga i roto i te Parataito?



TE TIKA 1

E AKAKOROANGA TO TE
ATUA I ANGA AI IA TATOOU

“Ka riro te enua no te aronga tuatua-tika, ka noo tamou rai ratou i reira.”—Salamo 37:29

Eaa to lehova akakoroanga no te tangata?

Genese 1:28

Inangaro a lehova kia akariro te tangata i te enua ei parataito e kia akono i te manu.

Isaia 46:9-11; 55:11

Ka rave rai te Atua i tana i akakoro e kare rauka kia tāpu iaia.

TE TIKA 2

TUMU I NGATĀ
AI TE ORAANGA

“Te vai ua nei rai to te ao ravarai i raro ake i taua vaerua kino ra.”—1 Ioane 5:19

Koai te tutara o teiane i ao?

Ioane 12:31

Kapiki a Iesu ia Satani e ariki o teiane i ao.

Iakobo 1:13-15

Inangaro a Satani i tetai mea kare nana.

Genese 2:17; 3:1-6

Akavare a Satani ia Eva, akarongo kore a Adamu e Eva ia lehova, muri mai mate raua.

Roma 3:23; 5:12

Mate tatou no tei یری mai te ara a Adamu.

2 Korinetia 4:3, 4

Te akavare nei a Satani i te tangata.

TE TIKA 3**KA TAKORE TE PATIREIA O TE
ATUA I TE MANAMANATA**

“Kia akonoia toou anoano . . . i te enua nei.”

—Mataio 6:10

Eaa ta te Atua ka rave?

Daniela 2:44

Ka mono te Patireia o te Atua i te au kavamani o teia ao.

Apokalupo 16:14-16

Ka takore a Iehova i teia ao kino me tae mai Aramagido.

Isaia 9:5, 6

Kua iki a Iehova ia Iesu ei Ariki no Tona kavamani i te rangi. Ka tutara a Iesu i rungao i te enua.

TE TIKA 4**KA AKARIRO TO TE ATUA
PATIREIA I TE ENUA
EI PARATAITO**

“Te oora nei koe i to rima, e te akamerengo nei i te kaki o te au mea ora katoa nei.”—Salamo 145:16

Eaa ta te Patireia o te Atua ka rave no tatou?

Salamo 46:9

Kare e tamaki, takinga kino e te tā ua.

Isaia 32:18; 65:21-24

Manea te kainga e te au are o te tangata i te ao ou e ka noo au ua ratou.

Salamo 72:16

E maata te kai.

Isaia 11:6-9

Ka noo au ua te tangata e te manu.

Isaia 33:24; Angaanga 24:15

Kare e tangata e maki, ka ora akaou mai tei mate.

KOAI A IESU MESIA?

E MAATA te au tangata rongonui i teiane i ao. Penei kua kite koe i te ingoa o tetai. Noatu kua kite koe i tona ingoa kare ra mei te mea e kua kite meitaki koe iaia. Kare koe i kite i te au mea ravarai no runga i tona oraanga e mei teaa tikai tona tu.

² Penei i rongo ana koe no runga ia Iesu Mesia, noatu e 2,000 tuma mataiti i topa, iaia i te enua nei. Kare ra te manganui i kite mei teaa tikai tona tu. Ki tetai papaki e tangata meitaki aia, ki etai e peroveta, irinaki tetai pae e koia te Atua. Eaa ra toou manako? —Akara i te Au Manako Poto 12.

³ E mea puapinga kia kite koe i te tika no runga ia Iesu. Eaa te tumu? Akakite te Pipiria e: “Teia oki te ora mutu kore, kia kite ratou ia koe i te Atua mou ra, e ia **Iesu i te Mesia, i taau i tonu maira.**” (Ioane 17:3) Me kite koe i te tika no runga ia Iehova e Iesu, ka rauka ia koe te ora mutukore i te enua parataito. (Ioane 14:6) Koia te akaraanga tau roa atu no te aroa te ka tauturu ia koe kia takinga meitaki i etai ke. (Ioane 13:34, 35) I roto i te Pene 1, kua apii tatou i te

1, 2. (a) Me kua kite koe i te ingoa o tetai tangata rongonui, ka karanga ainei koe e kua kite meitaki koe iaia? Akamārama mai. (e) Eaa ta te tangata e irinaki ra no runga ia Iesu?

3. Eaa te tumu i puapinga ai kia kite koe no runga i te Atua ko Iehova e ia Iesu Mesia?

tika no runga i te Atua. Teianeī ka apii tatou no runga ia Iesu.

KUA KITEA E MAUA TE MESIA!

⁴ Manganui te au mataiti i mua ake ka anau mai ei a Iesu, kua taputou a Iehova i roto i te Pipiria e ka tono mai aia i te Mesia, koia oki ia Karaiti. Te tuatua “Mesia” e reo Epera, e te tuatua “Karaiti” e reo Ereni. Ka iki te Atua i te Mesia Tana i taputou mai e ka oronga i teia nga taoonga nona. Ka akatupu pouroa te Mesia i ta Iehova au taputou. Ka rauka katoa ia Iesu te tauturu ia koe i teianeī. Inara i mua roa ake ka anau mai ei a Iesu, e manganui tei ui ana e, ‘Koai ra te Mesia?’

⁵ Kare te au pipi a Iesu i ekoko ana e koia te Mesia tei taputouia mai. (Ioane 1:41) Akakite a Simona Petero kia Iesu e: “Ko te Mesia koe.” (Mataio 16:16) Akapeea tatou e papu ei e ko Iesu te Mesia?

⁶ I mua roa ake i to Iesu anau mai anga, e maata te au mea ta te au peroveta o te Atua i tata ei tauturu i te tangata kia kite e koai te Mesia. Akapeea teia i te tauturu anga ia ratou? Penei kua tonoa koe ki ko i te ngai o te *bus* kia tiki i tetai tangata kare rava koe i aravei ana. Me akataka meitaki mai tetai tangata iaia, ka kite koe koai aia. Mei tera rai a Iehova, kua akakite mai aia na roto i tona au peroveta eaa ta te Mesia ka

4. Eaa te aiteanga o te nga tuatua “Mesia” e te “Karaiti”?

5. Kua irinaki ainei te au pipi a Iesu e koia te Mesia?

6. Akapeea a Iehova te tauturu anga i te au tangata kia kite e koai te Mesia?



rave e eaa te ka tupu kiaia. Na te akatupuanga o taua au totou ra e tauturu i te tangata kia kite e, ko Iesu te Mesia.

⁷ Teia e rua o taua au totou ra. Mea mua, e 700 mataiti i mua ake i to Iesu anau mai anga, kua totou a Mika e ka anauia mai te Mesia i te oire ko Be-telehema. (Mika 5:2) E kua anauia a Iesu ki reira! (Mataio 2:1, 3-9) Te rua, kua totou a Daniela e ka ma'ma mai te Mesia i te mataiti 29 T.N. (Daniela 9:25) E manganui te totou tei akapapu mai e ko Iesu te Mesia tei totouia mai.—Akara i te Au Manako Poto 13.

⁸ Akapapu mai a Iehova e ko Iesu te Mesia. Totou Aia e ka tuku mai aia i te akairo kia kite a Ioane Bape-tizo e koai te Mesia. Kua kite a Ioane i te akairo i to Iesu aerenga kia papetito a Ioane iaia i roto i te Kau-vai Ioridana i te 29 T.N. Akakite te Pipiria: 'E oti akerā Iesu i te bapetizoia, kake maira aia ki runga mei raro mai i te vai; e i na, veveteia akera te rangi iaia, akara akera aia i te vaerua o te Atua i te eke anga mai mei te kukupa, e te to anga mai ki rungao iaia. E i na, ko te reo maira no te rangi, i te na ko anga mai e, Taku Tamaiti akaperepere teia, kua mareka rava au iaia.'

7. Eaa e rua nga totou tei akapapu mai e ko Iesu te Mesia?

8, 9. Eaa tei tupu i ko i to Iesu papetitoanga tei akapapu mai e koia te Mesia?

(Mataio 3:16, 17) Ta Ioane i kite e i akarongo, kua akapapu kiaia e ko Iesu te Mesia. (Ioane 1:32-34) To mai te vaerua o Iehova ki runga ia Iesu, riro mai aia ko te Mesia. Koia ta Iehova i iki ei Arataki e ei Ariki. —Isaia 55:4.

° Akapapu mai te au totou Pipiria, ta Iehova uaorai tuatua, e te akairo Tana i tuku mai i to

Tona papetitoanga, kua riro mai
a Iesu ko te Mesia, te Karaiti



Iesu papetitoanga e, ko Iesu te Mesia. Noea mai a Iesu e mei teaa tona tu? Akara tatou i ta te Pipiria i akakite.

NOEA MAI A IESU?

10 Apii mai te Pipiria e i noo ana a Iesu i te rangi i mua ake ka aere mai ei ki te enua nei. Akakite a Mika e “mei ito mairai” te Mesia. (Mika 5:2) Akakite a Iesu e i noo ana aia i te rangi i mua ake ka anauia mai ei aia ei tangata. (E tatau ia Ioane 3:13; 6:38, 62; 17: 4, 5.) E pirianga mou tikai to Iesu kia Iehova i mua ake ka aere mai ei aia ki te enua nei.

11 Akaperepere maata a Iehova ia Iesu. Eaa te tumu? Ko Iesu tana i anga na mua. Kapikiia a Iesu e ko te ‘Tama mua o te au mea ravarai i angaia.’* (Kolosa 1:15) Akaperepere katoa a Iehova ia Iesu no te mea Nana uaorai i anga ia Iesu. No reira aia i kapikiia ai e ko te “Tamaiti anau tai.” (Ioane 3:16) Ko Iesu anake ua ta Iehova i akamana kia anga i te au mea tini. (Kolosa 1:16) Ko Iesu anake ua tei kapikiia e ko “te Logo.” Koia ta Iehova i tonono kia akakite i tana karere e tana tuatua ki te au angera e te tangata.—Ioane 1:14.

12 Irinaki tetai aronga e ko Iesu te Atua e ko te Atua

* Kapikiia a Iehova ei Metua no te mea Nana i anga i te au mea katoa. (Isaia 64:8) Kapikiia a Iesu ei Tamaiti na te Atua no te mea na Iehova uaorai i anga ia Iesu.—Iobu 1:6; Luka 3:38.

10. Eaa ta te Pipiria e apii maira no runga i to Iesu oraanga i mua ake ka aere mai ei aia ki te enua nei?

11. No teaa a Iehova i akaperepere maata ai ia Iesu?

12. Akapeea tatou i kite ei e kare ko Iesu te Atua e kare ko te Atua a Iesu?

a Iesu. Inara kare ko tera ta te Pipiria i apii mai. Akakite te Pipiria e na Iehova i anga ia Iesu, tera te aiteanga ko Iehova tei maata atu ia Iesu. E tamaiti aia na te Atua. Kare roa ona manako kia riro koia te Atua. Taka meitaki te apiianga a te Pipiria e e maata atu te Metua i te Tamaiti. (**E tatau ia Ioane 14:28**; 1 Korinetia 11:3.) Ko Iehova anake ua te “Atua Mana katoa-toa.” (Genese 17:1) Koia tei maata rava atu e tei riri-nui rava atu i te ao katoa nei.—Akara i te Au Manako Poto 14.

13 Angaanga kapiti a Iehova e tana Tamaiti ko Iesu, no te pirioni ua atu mataiti i mua ake ka angaia ai te rangi e te enua. Akaperepere maata raua i raua rai! (Ioane 3:35; 14:31) Aru meitaki a Iesu i te au tu o tona Metua. Karanga te Pipiria e “ko te tu tikai aia o te Atua akara koreia.”—Kolosa 1:15.

14 Kua āriki ua te Tamaiti akaperepere a te Atua kia anauia mai aia ei tangata i te enua nei. Akapeea ra? Na roto i te temeio, tuku a Iehova i te oraanga o tana Tamaiti ki roto i te vairanga tamariki o te paretenia ko Maria. Kare e anoanoia tetai metua tane nona. Anau mai a Maria e tamaiti ara kore, kua tapa i tona ingoa ko Iesu.—Luka 1:30-35.

MEI TEAA RAI TO IESU TU?

15 Maata taau ka kite no runga ia Iesu, tona oranga e tona au tu, me tatau koe i te puka o Mataio,

13. Eaa te tumu i karanga ai te Pipiria e ko “te tu tikai aia [a Iesu] o te Atua akara koreia”?

14. Akapeea i rauka ai kia anauia mai te Tamaiti akaperepere a te Atua ei tangata?

15. Akapeea e rauka ai ia koe kia kite meitaki atu ia Iehova?

Mareko, Luka e Ioane. Kapikiia taua au puka ko te au Evangelia. I te mea i aite rai a Iesu ki tona Metua, taau ka tatau ka tauturu ia koe kia kite meitaki atu ia Iehova. No reira a Iesu i karanga ai e: “Ko te akara mai iaku nei, kua akara ia i te Metua.”—Ioane 14:9.

16 Kapiki te tangata ia Iesu e ko te “Orometua.” (Ioane 1:38; 13:13) Te mea puapinga roa atu tana i apii, ko “te evangelia o te basileia.” Eaa teia Patireia? Ko te kavamani o te Atua i te rangi, ka tutara mai i te enua e ka apai mai i te akameitakianga no te aronga akarongo ia Iehova. (Mataio 4:23) Ta Iesu i apii no ko ia Iehova. Akakite aia: “Kare taku uaorai i taku e apii nei, nana ra, na tei tonono mai iaku nei.” (Ioane 7:16) Kua kite a Iesu e inangaro a Iehova kia kite te tangata e ka tutara mai te Patireia i te enua.

17 I apii a Iesu kiesa? I te au ngai ravarai e tangata tetai, roto i te oire, te makete, te au ngai akamori e te are o te tangata. Kare aia i tiaki kia aere mai te tangata kiaia. Aere aia kia ratou. (Mareko 6:56; Luka 19:5, 6) Akapou a Iesu i tona taime e te maroiroi i te apii i te tangata. Eaa te tumu? Kua kite aia e ko ta Iehova tera i inangaro iaia kia rave. E akarongo ua ana aia i tona Metua. (Ioane 8:28, 29) Tutu aia i te evangeria no tona tangi i te tangata. (**E tatau ia Mataio 9:35, 36.**) Te kite ra aia e kare te au arataki akonoanga e apii ana i te tika no runga i te Atua e tona Patireia. Inangaro aia i te tauturu i te tangata kia kite i te tuatua meitaki.

16. Eaa ta Iesu i apii? Noea mai ta Iesu apiianga?

17. I apii a Iesu kiesa? Eaa te tumu i angaanga pakari ei aia i te apii i te tangata?

18 Mea akaperepere na Iesu te tangata no tona inangaro ia ratou. E tu takinga meitaki tona e te oaoa. E reka ana te tamariki iaia. (Mareko 10:13-16) Aiteite ua tona tu ki te katoatoa. Mea riri nana te angaanga piki-kaa e te tu tika kore. (Mataio 21:12, 13) Noo aia i te tuatau e akavaavaaia ana te vaine e kare e akangateiteiia. E tu akaaka e te akangateitei to Iesu i te vaine. (Ioane 4:9, 27) E tu maru katoa to Iesu. Ei akaraanga, tetai aiai kua orei aia i te vaevae o tana au apotetoro, e angaanga teia na te tavini.—Ioane 13:2-5, 12-17.

19 Kua kite a Iesu i tei anoanoia no te tangata e kua inangaro aia i te tauturu ia ratou. Taka meitaki teia i tona akaora anga i te tangata. (Mataio 14:14) Ei akaraanga, aere mai tetai tangata repera kia Iesu e kua karanga atu: “Kia tika ia koe, e mā au ia koe.” Tangi takiri a Iesu i teia tangata no tona maki. Akaaroa tikai aia e kua inangaro i te tauturu iaia. Akatika atura Iesu i tona rima e kua na ko atura: “Kua tika ia iaku; kia mā koe.” Ora atura taua tangata ra! (Mareko 1:40-42) Akamanako ana mei teaa ra te rekareka o tera tangata?

TIRATIRATU UA RAI KI TONA METUA

20 Ko Iesu te akaraanga meitaki roa atu no te akarongo kia Iehova. Noatu ta tona au enemi i rave kiaia, kua vai tiratiratu rai aia ki tona Metua. Ei akaraanga, to Satani timata anga iaia kare aia i ara ana. (Mataio

18. Eaa te au tu o Iesu taau e reka ana?

19. Eaa te akaraanga tei akaari mai e kua kite a Iesu eaa tei anoanoia no te tangata e kua inangaro i te tauturu ia ratou?

20, 21. I teea tu i riro a Iesu ei akaraanga meitaki no te akarongo ki te Atua?



Apiti a Iesu te evangeria i te ngai e tangata tetahi

4:1-11) Kare tona kopu tangata i irinaki ana e koia te Mesia. “Kua auouoia aia,” i na ratou ei. Kua rave atu rai a Iesu i to Iehova anoano. (Mareko 3:21) Noatu te takinga kino a tona au enemi, vai tiratiratu rai a Iesu kia Iehova e kare roa i akakino atu.—1 Petero 2: 21-23.

²¹ Noatu te mamae e te vinivini o tona mate, kua vai tiratiratu rai a Iesu kia Iehova. (**E tataua ia Philipi 2:8.**) Akamanako ana i te kino tana i akakoromaki i te rā i mate ei aia. Kua tapekaia aia, akaapaia ei tangata pikikaa, akautungaia e te au akava pikikaa, kataia e te tangata, tamamaeia e te au vaeau e kua patitiia ki runga i te satauro. Mua ake ka mate ei aia kua tuatua



akera aia e: “Kua oti.” (Ioane 19:30) E toru rā i muri ake i tona mate, akatu akaou mai a Iehova iaia i te kopapa vaerua. (1 Petero 3:18) Te au epetoma i muri mai, oki a Iesu ki te rangi, e kua “noo rava atura ĩa i te rima katau o te Atua” tiaki ei kia akariro a Iehova iaia ei Ariki.—Ebera 10:12, 13.

22 No tei vai tiratiratu a Iesu ki tona Metua, rauka ia tatou te tikaanga kia ora e tuatau ua atu i te enua Parataito mei ta Iehova i akakoro. I roto i te pene ka aru mai, ka uriuri tatou akapeea e rauka ai te ora mutukore na roto i te mate o Iesu.

22. Eaa te tikaanga tei rauka ia tatou i teiane i no tei vai tiratiratu a Iesu ki tona Metua?

TE TIKA 1

KO IESU TE MESIA

“Ko te Mesia koe, ko te Tamaiti a te Atua ora.”

—Mataio 16:16

Akapeea tatou i kite ei e ko Iesu te Mesia?

Mataio 3:16, 17;

Ioane 1:32-34

Akapapu mai a Iehova e e
Tamaiti a Iesu nana.

Mika 5:2;

Mataio 2:1, 3-9

Akatupu a Iesu i te au totou
pouroa no runga
i te Mesia.

TE TIKA 2

E ANGERA A IESU I MUA
AKE KA AERE MAI EI
KI TE ENUA NEI

“I eke mai nei oki au mei te rangi mai.”

—Ioane 6:38

Eaa ta Iesu i rave i runga i te rangi?

Kolosa 1:15, 16

Anga a Iehova ia Iesu na mua,
e oti anga a Iesu i te au mea
ravarai. Pirioni ua atu mataiti
te apii anga tona Metua iaia.

Luka 1:30-35

Tono mai a Iehova ia Iesu
ki te enua nei.

TE TIKA 3**INANGARO A IESU
I TE TANGATA**

“Ka tuku mai ana i te tamariki mea riki, kia aere ua mai kiaku nei.”—Mareko 10:14

Eaa to Iesu au tu e reka ana koe?

Mareko 10:13-16

E tu takinga meitaki to Iesu, reka te tangata te tuatua kiaia.

Ioane 4:9, 27

E tu akangateitei e te akaaka to Iesu ki te vaine.

Ioane 13:2-5, 12-17

E tu maru to Iesu.

Mataio 9:35, 36;**Mareko 1:40-42**

Inangaro a Iesu i te tauturu i te tangata.

TE TIKA 4**E RAVE UA ANA A IESU I TE
ANOANO O TE ATUA**

“Kua oti . . . iaku te angaanga taau i o mai naku e rave.”—Ioane 17:4

Akapeea tatou me aru i to Iesu akaraanga kia vai tiratiratu?

Mataio 4:1-11

Vai tiratiratu a Iesu te timata angaia e te Tiaporo.

Mareko 3:21

Rave a Iesu i to lehova anoano noatu te aviri a tona kopu tangata.

1 Petero 2:21-23

Kare roa a Iesu i akakino i tona au enemi.

Philipi 2:8

Vai tiratiratu a Iesu kia lehova e mate ua atu.

Ebera 10:12, 13;**1 Petero 3:18**

Akatu akaou a lehova ia Iesu ki te rangi.

TE OKO —TA TE ATUA APINGA AROA PUAPINGA RAVA ATU

EAA te apinga aroa puapinga rava atu tei orongaia mai ana naau? Me te mataora ra koe i te reira e me e mea puapinga tikai teia kia koe, ka mareka roa toou ngakau.

² Pouroa te apinga aroa ta te Atua i oronga mai, okotai rai mea anoano maataia. Ko ta te Atua apinga aroa puapinga rava atu no te tangata. Roto i teia pene ka kite tatou e kua tonono mai a Iehova i tana Tamaiti ko Iesu Mesia, kia rauka ia tatou te ora mutukore. (E tatau ia Mataiao 20:28.) Akapapu mai a Iehova i tona inangaro ia tatou i te tonono mai anga ia Iesu ki te enua nei ei atinga oko.

EAA RA TE OKO?

³ Ko te oko ta Iehova ravenga no te akaora i te tangata mei te ara e te mate. (Ephesia 1:7) Kia mārama i te tumu i anoanoia ai te oko, e mea puapinga kia kite tatou eaa tei tupu i te kainga i Edene. Kua ara to tatou nga metua mua ko Adamu e Eva. No ta raua ara, kua mate raua. Kua mate katoa tatou no te mea kua iringi mai

1, 2. (a) Eaa te mea e riro ei tetahi apinga aroa ei mea akaperepereia? (e) Eaa i riro ei e ko te oko ta te Atua apinga aroa puapinga rava atu?

3. Eaa te tumu i mate ei te tangata?

ta raua ara ki runga ia tatou.—Akara i te Au Manako Poto 9.

⁴ Te anga mai anga a Iehova i te tangata mua ko Adamu, oronga Aia i tetai apinga akaperepere maataia nana. Ko te oraanga apa kore. Apa kore tona manako e tona kopapa. Kare rava aia e maki, e tangata metua, e kare rava e mate. No te mea na Iehova i anga ia Adamu, riro te Atua ei metua nona. (Luka 3:38) E tuatua putuputu ana a Iehova kia Adamu. Akataka meitaki Aia eaa tana e tapapa maira mei ia Adamu e kua oronga i tetai angaanga nana.—Genese 1:28-30; 2:16, 17.

⁵ Angaia a Adamu “i te tu o te Atua.” (Genese 1:27) Oronga te Atua i te au tu mei te aroa, te pakari, te tu tuatua tika, te maroiroi e te tikaanga no Adamu kia iki. Kare a Adamu i te matini. Anga a Iehova iaia kia rauka iaia te iki eaa te mea tika, eaa te mea tarevake. Naringa a Adamu i iki kia akarongo i te Atua, ka ora aia e tuatau ua atu i te Parataito.

⁶ Tona akarongo kore anga ia Iehova e kua akautungaia kia mate, e ngere maata tikai tera nona. Ngere aia i tona pirianga oa kia Iehova, tona oraanga apa kore e tona kainga Parataito. (Genese 3:17-19) Iki a Adamu e Eva kia akarongo kore i te Atua, no reira kare o raua manakonakoanga. No ta Adamu i rave “i o mai ei te kino i te ao nei, e no te kino oki te mate; e kua taea katoaia oki te tangata ravarai e te mate, no te

4. Koai ra a Adamu, eaa ta Iehova i oronga nona?

5. Eaa te aiteanga me tuatua te Pipiria e kua angaia a Adamu “i te tu o te Atua”?

6. Eaa te apinga tei ngere a Adamu i tona akarongo kore anga i te Atua? Eaa ta teia i akatupu kia tatou?

mea kua ara katoatoa.” (Roma 5:12) Kua oko a Adamu iaia uorai e ia tatou katoa, ki roto i te ara e te mate ei tuikaa. (Roma 7:14) E manakonakoanga ainei to tatou? Ae.

7 Eaa ra te oko? E rua ia apinga e ō maira no te oko. Mea mua, ko te tutaki tei orongaia ei akaora mai i tetai tangata me kore ei tutaki no tetai apinga kia akaokiia mai. Te rua, ko te tutaki kia peke mai tetai apinga me kore tei aiteite tona puapinga ki te apinga ka okoia mai.

8 Kare e peke i tetai tangata kia tutaki i te oko no te ara a Adamu i ʻiri mai ei te mate ki runga ia tatou. Kua oronga mai ra a Iehova i te ravenga ei akaora ia tatou. Ka apii tatou eaa ta te oko ka rave e te puapinga ka rauka ia tatou.

PEEA A IEHOVA TE ORONGA MAI ANGA I TE OKO

9 Kare okotai tangata e tau kia oko mai i te oraanga apa kore ta Adamu i kopae. Eaa te tumu? Kua ara tatou pouroa. (Salamo 49:7, 8) Ka anoanoia tetai oraanga tangata apa kore ei oko. Kua “oronga [Iesu Mesia] iaia uorai ei oko i te tangata katoa.” (1 Timoteo 2:6) Te oraanga apa kore ta Iesu i akaatinga, aiteite ki ta Adamu i kopae.

10 Akapeea a Iehova te oronga mai anga i te oko? Tono mai Aia i tana Tamaiti ki te enua nei. Ko Iesu Tana i anga mua. (1 Ioane 4:9, 10) Kua āriki a Iesu kia akaruke i tona Metua i te rangi. (Philipi 2:7) Rave mai

7, 8. Eaa ra te oko?

9. Akapeea e rauka ai te tutaki i te oko?

10. Akapeea a Iehova i te oronga mai anga i te oko?

a Iehova i tona oraanga, kua tuku ki roto i te vairanga tamariki o Maria i te enua nei, e kua anauia mai a Iesu ei tangata apa kore, kare e ara.—Luka 1:35.

11 Kua ngere te tangata ravarai i te oraanga apa kore no tei akarongo kore a Adamu ia Iehova. Ka rauka ainei i tetai tangata ke kia takore i te mate no te uanga a Adamu? Ae. (**E tatau ia Roma 5:19.**) Kua oronga te tangata ara kore a Iesu i tona oraanga apa kore ei oko. (1 Korinetia 15:45) Na tona oraanga apa kore e takore i te mate no te uanga a Adamu.—1 Korinetia 15:21, 22.

12 Te akataka maira te Pipiria i te mamae maata ta Iesu i na roto i mua ake ka mate ei aia. Kua papaia aia, kua patitiia ki runga i te satauro e kua vaoaia kia mate marie ua. (Ioane 19:1, 16-18, 30) No teaa a Iesu i na roto ei i teia tu? No te mea karanga a Satani e, kare e tangata e vai tiratiratu me pakari te timataanga. Noatu te pakari o tona mamae, kua vai tiratiratu rai a Iesu. Akamanako ana e mei teaa to Iehova rekareka ia Iesu!—Maseli 27:11; akara i te Au Manako Poto 15.

13 Akapeea te tutaki anga i te oko? I te mataiti 33 Nisana 14, te karena Ngati Iuda, kua akatika a Iehova i to Iesu au enemi kia tamate iaia. (Ebera 10:10) E toru rā i muri mai, kua akaora mai a Iehova ia Iesu, kare ei tangata mari ra ei vaerua. Muri mai te oki anga a Iesu ki te rangi, kua oronga aia iaia uorai kia Iehova ei oko. Koia oki kua oronga aia i tona tikaanga kia noo ei tangata apa kore i te enua nei, kia oronga a Iehova i taua tikaanga ra no te uanga a Adamu. (Ebera 9:24) Kua

11. Akapeea i rauka ai te tangata okotai kia oko i te tangata katoatoa?

12. Eaa te tumu i na roto ei a Iesu i teia tu?

13. Akapeea te tutaki anga i te oko?

āriki a Iehova i teia oko kia matara mai tatou mei te ara e te mate.—E tatau ia Roma 3:23, 24.

TE PUAPINGA O TE OKO NO TATOU

14 Kua puapingaia tatou no teia apinga aroa na Iehova. Akara ra eaa te puapinga no tatou i teianei e te tuatau ki mua.

15 Kua akakoreia ta tatou ara. E ngatā i te rave i te mea tika i te au taimē ravarai. E tarevake ana tatou, ta tatou ka tuatua e ta tatou ka rave. (Kolosa 1:13, 14) Akapeea e akakoreia ai ta tatou ara? Kia tataraara tikai tatou, pati akaaka kia akakore mai a Iehova i ta tatou ara. I reira ka rauka ia tatou kia irinaki e kua akakoreia mai ta tatou ara.—1 Ioane 1:8, 9.

16 Ka rauka ia tatou te akava ngakau meitaki. Me rave tatou i te tarevake, ka akava ngakau tatou, kare e mataora e kare e kite ka akapeea. Eiaa e tuku i te au. Me pati akatenga tatou kia akakore mai a Iehova i to tatou apa, ka akarongo mai aia e ka akakore i ta tatou ara. (Ebera 9:13, 14) Inangaro a Iehova kia tuatua tatou kiaia i to tatou tu paruparu e te manamanata. (Ebera 4:14-16) Te ka tupu, ka rauka ia tatou te akava ngakau meitaki i mua ia Iehova.

17 E manakonakoanga to tatou no te ora mutukore. “E utunga te mate no te ara; kareka te ora mutu kore ra, e mea oronga uaia mai e te Atua i roto i to tatou Atua ia Iesu Mesia.” (Roma 6:23) No te mea i mate a Iesu no tatou, ka rauka te ora mutukore.

14, 15. Eaa ta tatou ka rave kia akakoreia mai ta tatou ara?

16. Eaa ta tatou ka rave kia rauka te akava ngakau meitaki?

17. Eaa te au akameitakianga ka rauka no tei mate a Iesu no tatou?

ΙΗΣΟΥΣ ΟΝΑΣ ΖΩΡΑΙΟΣ
Ο ΒΑΣΙΛΕΥΣ ΤΩΝ ΙΟΥΔΑΙΩΝ

Kua oronga a lehova
i tana Tamaiti ei
oko ia tatou



(Apokalupo 21:3, 4) Eaa ta tatou ka rave kia ora e tua-tau ua atu?

KA ĀRIKI AINEI KOE I TE OKO?


18 Ka mareka toou ngakau me oronga mai tetai tangata i tetai apinga aroa manea naau. Ko te oko te apinga aroa akaperepere roaia atu, e kia akameitaki tatou ia Iehova ma te ngakau katoa. Akakite a Ioane 3:16 e “i aroa mai te Atua i to te ao nei, kua tae rava ki te oronga anga mai i tana Tamaiti anau tai.” No to Iehova aroa maata ia tatou, oronga mai aia i tana Tamaiti akaperepere ia Iesu. No to Iesu aroa ia tatou kua oronga ua aia i tona ora no tatou. (Ioane 15:13) Akapapu mai te apinga aroa o te oko e, e inangaro tikai to Iehova e to Iesu ia koe.—Galatia 2:20.

19 I na kua kite koe i to te Atua aroa maata, akapeea ra koe e riro ei ei oa nona? Kare i te mea mama kia inangaro i tetai tangata kare koe i kite. Karanga a Ioane 17:3 e ka rauka ia tatou **kia kite ia Iehova**. Ka akaketa-keta atu te reira i toou inangaro iaia e te akamareka iaia, e ka riro koe ei oa nona. E apii i te Pipiria kia maata atu toou kite no runga ia Iehova.—1 Ioane 5:3.

20 **Āriki i te atinga oko a Iesu**. Akakite te Pipiria e ‘ko te akarongo i te Tamaiti ra, e ora mutu kore tona.’ (Ioane 3:36) Eaa te aiteanga o te akarongo? Kia rave i ta Iesu i apii mai ia tatou. (Ioane 13:15) Kare e rava ua kia karanga e irinaki tatou ia Iesu. Me āriki i te oko, kia taangaanga tatou i to tatou akarongo. Karanga a

18. Akapeea tatou i kite ei e e inangaro maata tikai to Iehova e to Iesu ia tatou?

19, 20. (a) Akapeea koe e riro ei ei oa no Iehova? (e) Akapeea koe te akaarianga e kua āriki koe i te atinga oko a Iesu?



Ia tatou e apii nei
no runga ia Iehova,
ka riro tatou ei oa
nona e ka matutu
roa atu to tatou
inangaro iaia

Iakobo 2:26 e: “Te akarongo kare e angaanga ra, e mea mate katoa ia.”

21 Aere ki te Akamaaraanga i te mate o te Mesia. Te aiai i mua ake ka mate ei a Iesu, apii mai aia kia akamaara tatou i tona mate. E rave ana tatou i teia i te au mataiti ravarai, karangaia e ko te “kaingakai a te Atu.” (1 Korinetia 11:20; Mataio 26:26-28) Inangaro a Iesu ia tatou kia akamaara e i oronga aia i tona oraanga apa kore ei oko ia tatou. Akakite aia: “E akapera kotou ei manako anga iaku.” (E **tatau ia Luka 22:19.**) Me aere koe ki te Akamaaraanga, te akaari ra koe e te manako ra koe i te oko, pera to Iehova e to Iesu aroa maata no tatou.—Akara i te Au Manako Poto 16.

22 Ko te oko te apinga aroa puapinga rava atu i rauka ia tatou. (2 Korinetia 9:14, 15) Ka puapingaia te mirioni ua atu tei mate, mei teia apinga aroa. Ka uriuri te pene 6 e te 7 ka akapeea e rauka ai te reira.

21, 22. (a) Eaa te tumu ka aere ei tatou ki te Akamaaraanga i te mate o te Mesia? (e) Eaa te ka uriuriia i roto i te pene 6 e te 7?

TE TIKA 1

KA ANOANOIA TE OKO NO TATOU POUROA

‘I aere mai te Tamaiti a te tangata kia oronga i tona ora ei oko no te tangata e manganui.’

—Mataio 20:28

No teaa i anoanoia ai te oko no tatou?

Genese 3:17-19

Te akarongo kore anga a Adamu ia Iehova, kore rai tona pirianga oa kia Iehova, tona oraanga apa kore e te kainga Parataito.

Roma 5:12

No ta Adamu i rave, iri mai te ara e te mate ki runga ia tatou.

Ephesia 1:7

Ko te oko ta Iehova ravenga no te akaora mai te tangata mei te ara e te mate.

TE TIKA 2

ORONGA MAI A IEHOVA I TE OKO

“Tono mai [te Atua] i tana Tamaiti anau tai ki te ao nei, kia ora tatou iaia.”—1 Ioane 4:9

Akapeea a Iehova i te oronga mai anga i te oko?

Salamo 49:7, 8

Kare okotai tangata e rauka kia oko mai i te oraanga apa kore ta Adamu i kopae.

Luka 1:35

Tono mai a Iehova i tana Tamaiti ki te enua nei kia anauia mai ei tangata apa kore.

Roma 3:23, 24; Ebera 9:24

I muri ake i te tuakaouanga o Iesu, oki aia ki te rangi, e kua oronga iaia uaorai kia Iehova ei oko.

TE TIKAI 3**ORONGA MAI TE OKO I TE
MANAKONAKOANGA MOU**

“E nana e orei i te roi-mata katoatoa; e e kore rava te mate.”—Apokalupo 21:4

Akapeea tatou e puapingaia ai mei te oko?

1 Ioane 1:8, 9

Ka rauka i te akakore i ta tatou ara.

Ebera 9:13, 14

Ka rauka ia tatou te akava ngakau mā i mua ia lehova.

Roma 6:23

E manakonakoanga to tatou no te ora mutu kore.

Galatia 2:20

E akairo te apinga aroa o te oko no to lehova e to Iesu aroa ia tatou.

TE TIKAI 4**ANOANOIA TATO
KIA ĀRIKI I TE OKO**

‘Oronga mai te Atua i tana Tamaiti anau tai, kia kore e mate te akarongo iaia, kia rauka ra te ora mutu kore.’—Ioane 3:16

Akapeea tatou me akameitaki ia lehova no te apinga aroa o te oko?

Ioane 17:3

Apīi no runga ia lehova e Iesu, aru ia raua.

Luka 22:19

Aere ki te Akamaaraanga i te mate o te Mesia i te au mataiti.

Ioane 3:36; Iakobo 2:26

E rave, eiaa e tuatua ua e irinaki tatou ia Iesu. Akono i ta Iesu i apīi.

TEIEA RA TEI MATE?

TAPUTOU mai te Pipiria e ka “kore rava te mate.” (Apokalupo 21:4) Roto i te Pene 5, kua apii tatou e ka rauka te ora mutu kore na roto i te oko. Inara te mate nei rai te tangata. (Koheleta 9:5) Tetai uianga puapinga e ui ana tatou, Teiea ra tei mate?

² E puapinga te pauanga ki tera uianga. Me mate tetai, e ui ana tatou e: ‘Eaa ra tei tupu kiaia? Te akara maira ainei aia ia tatou? Ka rauka ainei iaia te tauturu ia tatou? Ka kite akaou ainei tatou iaia?’

³ Tukeke te pauanga a te au akonoanga no teia au uianga. Apii tetai papaki e me e tangata meitaki koe ka aere koe ki te rangi, me e tangata kino koe ka uriia koe ki roto i te ai i ade. Karanga tetai aronga e ka riro koe ei vaerua e ka noo kapiti koe e toou kopu tangata i mate. Ta tetai pae, me akavaia koe i muri ake i toou matenga, ka anau akaouia mai koe, me kore ka ora akaou i roto i te kopapa ke ei tangata ke me kore ei manu.

⁴ Tuketuke te apiianga a te au akonoanga. Te maataanga, aiteite ta ratou apiianga tumu, koia oki me mate tetai tangata ka ora ua atu rai tetai tuanga iaia. E tika ainei tera?

1-3. Eaa te au uianga ta te tangata e ui ana no runga i te mate, eaa te pauanga a tetai au akonoanga?

4. Eaa te apiianga tumu ta te au akonoanga e apii ana no runga i te mate?

TEIEA RA TEI MATE?

⁵ Kua kite a Iehova eaa te ka tupu kia tatou me mate. Akakite mai aia, **me mate tetai tangata kua ope rai tona oraanga.** E tuke te mate mei te oraanga. Me mate tetai kare tona anoano e tona manakonakoanga e **ora atu** i tetai ngai.* Me mate tatou kare tatou e kite, kare e rongu, e kare e manako akaou.

⁶ Tata a Solomona e “kare ra a te aronga i mate ra e **tuatua i kitea.**” Kare tei mate e aroa, e makitakita e “kare oki e angaanga, kare e kimianga, kare oki e kite, kare oki e pakari, i roto i te vaarua.” (**E tataua ia Kohelela 9:5, 6, 10.**) Akakite te Salamo 146:4 e me mate tetai kua “kore rava atura tana i akakoro.”

TA IESU I AKAKITE NO RUNGA I TE MATE

⁷ Te mate anga tona oa a Lazaro, akakite a Iesu ki tana au pipi: “Kua moe to tatou oa ko Lazaro.” Kare te aiteanga e te akangaroi ra a Lazaro. Akakite akaou aia e: “Kua mate takiri a Lazaro.” (Ioane 11:11-14) Kua akaaite a Iesu i te mate ki te moe. Kare aia i karanga ana e tei te rangi a Lazaro e tei ko i tona au tupuna i mate. E kare aia i karanga ana e te mamae ra a Lazaro i ade e kua anau akaouia mai aia ei tangata ke me kore ei manu. Mari ra te moe tinainai ra a Lazaro. Akaaite katoa tetai au irava ke i te mate ki te moe tinainai. Karanga te Pipiria e i te tamate angaia a Setepthano kua “moe atura aia.” (Angaanga 7:60) Tata katoa a Paulo

* Irinaki tetai aronga e me mate tetai tangata ka ora atu rai te *soul* koia oki te vaerua a muri ake. Kia maata atu taau ka kite, akara i te Au Manako Poto 17 e te 18.

-
- 5, 6. Eaa te tupu ana kia tatou me mate?
7. Eaa ta Iesu i akakite no runga i te mate?

e kua “moe atura” tetai au Kerititiano.—1 Korinetia 15:6.

8 I anga ainei a Iehova ia Adamu e Eva kia mate? Kare! Anga aia ia raua kia ora e tuatau ua atu. Tuku a Iehova i te inangaro kia ora e tuatau ua atu ki roto i te ngakau o te tangata. (Kohēleta 3:11) Kare te au metua e inangaro kia ruaine ta ratou tamariki e kia mate. Pera rai a Iehova. No teaa ra te tangata i mate ei i na anga a Iehova ia tatou kia ora e mutu kore ua atu?

8. Akapeea tatou i kite ei e kare te Atua i anga mai i te tangata kia mate?

Anga a Iehova
i te tangata kia
ora e tuatau ua
atu i runga nei
i te enua



EAA TE TUMU E MATE EI TATOU?

⁹ I te kainga i Edene, akakite a Iehova kia Adamu: “E kai ua koe i to te au rakau katoa o te kainga nei: Kareka i to te rakau e kite ei i te meitaki e te kino, auraka koe e kai i to reira; i te rā e kai ei koe i to reira, ka mate ia koe.” (Genese 2:9, 16, 17) Kare i te mea ngatā te akono i tera akauenga taka meitaki. E tikaanga to Iehova kia akakite kia Adamu e Eva eaa te mea meitaki e eaa te mea kino. Me akarongo raua, te akangateitei ra raua i tona tikaanga. Te akaari katoa ra raua i to raua rekareka no te au mea ravarai tana i rave no raua.

¹⁰ Kua iki raua kia akarongo kore ia Iehova. Ui a Satani kia Eva: “Koia ia, kua tuatua mai te Atua e, Auraka korua e kai i to te au rakau katoa o te kainga nei?” Akakite a Eva: “E kai maua i to te au rakau o te kainga nei; Mari ra o to taua rakau i rotopu i te kainga nei, kua tuatua mai ia te Atua e, Auraka korua e kai i to reira, auraka oki korua e arapaki atu, ka mate aea korua.”—Genese 3:1-3.

¹¹ Karanga atura a Satani: “Kare rava korua e mate: Kua kite oki te Atua e, i te rā e kai ei korua i to reira, ka puera ia to korua mata, e ka riro korua mei te Atua ra te tu, i te kite i te meitaki e te kino.” (Genese 3:4-6) Inangaro aia kia manako a Eva e tei iaia rai te tika kia iki eaa te mea meitaki e eaa te mea kino. Pikikaa atu aia e kare a Eva e mate. Kai iora a Eva i te ua rakau e kua oronga i tetai ki tana tane. Kua akakite a Iehova e **auraka** raua e kai i te ua rakau. Kua iki rai raua kia kai

9. Eaa i tau ei te akauenga ta Iehova i oronga kia Adamu e Eva?

10, 11. (a) I akapeea a Satani i te akavare anga ia Adamu e Eva?

(e) Eaa te tumu i kore ei e kotoeanga no ta Adamu e Eva i rave?

e kia kore e akarongo i teia akauenga tau ua e te taka meitaki. Te akaari ra raua e kare raua e akangateitei ana i to raua Metua i te rangi. Kare roa e kotoeanga no ta raua i rave!

12 E mea taitaia tikai e kare to tatou nga metua mua i akangateitei i Tei Anga ia raua! Eaa ra toou manako me tauta pakari koe i te utuutu i taau tamariki e oti patoitoi ratou ia koe e kua rave i taau tikai i akakite e auraka e rave? Kare ainei toou ngakau e mamae?

13 Te akarongo kore anga a Adamu e Eva, ngere rai raua i te ora mutukore. Akakite a Iehova kia Adamu: “E one-pueu oki koe, e ka riro akaou rai koe ei one-pueu.” (E tatau ia Genese 3:19.) Te aiteanga ka oki aia ki te turanga i mua ake ka angaia ai aia, e one pueu. (Genese 2:7) Muri ake i tona ara anga kua mate aia, kare ona ora akaou.

14 Naringa raua i akarongo ia Iehova, te ora nei rai raua. Kua ara raua no te akarongo kore e i te openga kua mate. Mei te maki piri rai te ara tei iringi mai ki runga ia tatou mei to

No te one pueu mai a Adamu, ka oki akaou aia ki te one pueu



12. Eaa ra te tu akarongo kore o Adamu e Eva ia Iehova i riro ei, ei mea taitaia?

13. Eaa te aiteanga o ta Iehova i tuatua e “ka riro akaou rai koe ei one-pueu”?

14. Eaa te tumu e mate ei tatou?

tatou nga metua mua. Anau araia mai tatou, no reira tatou ka mate ei. (Roma 5:12) Kare ko tera to Iehova akakoroanga no te tangata. Kare roa aia i inangaro ana i te tangata kia mate. E “enemi” te mate i na te Pipiria ai.—1 Korinetia 15:26.

KA AKAMATARA TE TIKA IA TATOU

15 Ka matara tatou mei te apiiangā pikikāa me kite tatou i te tika no runga i te mate. Apii te Pipiria e kare tei mate e kite i te mamae e te taitaia. Kare e rauka kia tuatua ki tei mate e kia tauturu ia ratou e kare katoa ratou kia tatou. Kare e rauka ia ratou te takino ia tatou e kare tatou e matakū ia ratou. Apii te au akonoanga e te ora ra tei mate i tetai ngai, e ka rauka ia tatou te tauturu ia ratou me tutaki i te orometua me kore i tetai arataki akonoanga. Me kite ra tatou i te tika, kare tatou e vare i teia au pikikāa.

16 Te akariro nei a Satani i te akonoanga pikikāa ei akavare ia tatou kia irinaki e te ora nei rai tei mate. Apii tetai papaki e me mate tatou ka ora atu rai tatou i tetai ngai. Ko tera ainei ta taau akonoanga e apii ra ia koe, me ko ta te Pipiria e apii ra no runga i tei mate? Te akariro nei a Satani i te pikikāa ei akauri ke i te tangata mei ia Iehova.

17 Ta te au akonoanga e apii nei, e pikikāa. Apii ratou e ka ta’uia te tangata i roto i te ai i ade e tuatau

15. Akapeea te tika no runga i te mate i te akamatara mai anga ia tatou?

16. Eaa te pikikāa ta te manganui o te au akonoanga e apii nei no runga i tei mate?

17. Eaa ra te apiiangā no te ta’u i te tangata i roto i te ai i ade, i riro ei ei akakino ia Iehova?

ua atu. E akakino tikai tera ia Iehova. Kare roa aia e akapera i te tangata! (E tataua ia 1 Ioane 4:8.) Eaa ra toou manako me tutungi tetai tangata i te rima o tana tamaiti ei akautunga iaia? Ka manako koe e e tangata kino tikai aia. Kare koe inangaro kia kite iaia. Ko tera tikai ta Satani i inangaro kia manako tatou no runga ia Iehova!

18 Apii tetai au akonoanga e me mate te tangata, ka riro ratou ei au vaerua. Kia akangateitei e kia matakū tatou ia ratou no te mea, penei ka riro mai ratou ei au oa no tatou me kore ei enemi. Manganui tei irinaki i taua pikikaa ra. Kua matakū ratou e kua morimori i tei mate, kare i akamori ia Iehova. E akamaara e kare tei mate e kite e kare e nakiro i tetai ua atu mea, no reira kare e tumu tau no tatou kia matakū. Na Iehova i anga ia tatou. Koia te Atua mou e koia ta tatou ka akamori.—Apokalupo 4:11.

19 Me kite tatou i te tika no runga i te mate, ka matara mai tatou mei te apiianga pikikaa a te au akonoanga. Ka mārama tatou i ta Iehova au taputou no te oraanga e no te tuatau ki mua.

20 Kua ui a Iobu e: “Kia mate te tangata nei, ka ora akaou ainei aia?” (Iobu 14:14) Ka rauka ainei i tetai tangata kua mate kia ora akaou mai? Te pauanga ta Iehova e akakite maira kia tatou i roto i te Pipiria, e mea umere tikai. Ka kite tatou eaa te tumu i roto i te pene ka aru mai.

18. Eaa te tumu ka kore ei tatou e matakū i tei mate?

19. Peeā te kite anga i te tika no runga i te mate i te tauturu anga ia tatou?

20. Eaa ta tatou ka kite i roto i te pene ka aru mai?

TE TIKA 1

ME MATE TETAU TANGATA,
OPE RAI TONA ORAANGA

“Kare ra a te aronga i mate ra e tuatua i kitea.”

—Koheleta 9:5

Eaa te tupu ana me mate tatou?

Salamo 146:3, 4;

Koheleta 9:6, 10

Me mate tatou, kare tatou e
kite, kare e rongo e kare e
manako akaou.

Ioane 11:11-14

Kua akaaite a Iesu i te mate ki
te moe.

TE TIKA 2

KARE RAVA A IEHOVA
I INANGARO ANA I TE
TANGATA KIA MATE

“Kareka i to te rakau e kite ei i te meitaki e te kino,
auraka koe e kai i to reira; i te rā e kai ei koe i to
reira, ka mate ia koe.”—Genese 2:17

Eaa te tumu e mate ei tatou?

Genese 3:1-6

Kua pikikaa a Satani no runga
i te ka tupu kia Eva me
akarongo kore aia i te
akauenga a Iehova. Te
akarongo kore anga a Adamu
e Eva ia Iehova, kua ara raua e
kua mate i te openga.

Genese 3:19

Muri ake i to Adamu matenga,
ope rai tona oraanga.

Roma 5:12

Mei te maki piri rai te ara a
to tatou nga metua mua tei ʻiri
mai ki runga ia tatou. Anauia
mai tatou pouroa ma te ara,
no reira tatou e mate ei.

1 Korinetia 15:26

Karanga te Pipiria e e enemi
te mate.

TE TIKA 3**TE TIKA NO RUNGA I TE
MATE KA AKAMATARA
MAI IA TATOU**

“Kia mate te tangata nei, ka ora akaou ainei aia?
E tapapa rai au . . . e tae rava atu ki toku tu ke
anga ra.”—Iobu 14:14

Akapeea te kite no runga i te tuatua mou i te aka-
matara mai anga ia tatou mei te au manako ta-
revake?

1 Ioane 4:8

Te apiianga o te ai i ade,
e akakino tikai ia lehova. Kare
roa aia e tuku i te tangata kia
tamamaeia na roto i teia tu.

Apokalupo 4:11

Mataku te tangata i tei mate.
Ko te aronga mate ta ratou ka
akatapu e te morimori, kare e
akamori ia lehova. Ko lehova
te Atua mou e koia anake ta
tatou e akamori.

E TUAKAOUANGA TETA!

AKAMANAKO ana e kua akautungaia koe no toou oraanga katoa i roto i te are auri no tetai mea kare noou te apa. Kare atu e ravenga e matara ai koe. Taka kore toou oraanga no te tuatau ki mua, kare koe i kite ka akapeea. Vaitata tikai koe te tuku i te au, kitea mai e koe e, e tangata tetai ka rauka iaia te akaora ia koe e kua taputou mai e ka tauturu aia ia koe! Mei teaa ra toou manako?

² E tuikaa tatou pouroa no te mate. Noatu eaa ta tatou ka rave, kare tatou e ora. Inara e mana to Iehova kia akaora ia tatou mei te mate. Taputou mai aia e ko “taua enemi openga ra, ko te mate, e akakoreia ia.” —1 Korinetia 15:26.

³ Akamanako ana i toou rekareka, kare koe e manata akaou atu i te mate! Inara kare ko te mate ua ta Iehova ka takore. Ka akaora akaou mai aia i te aronga kua mate ke ana. Akamanako ana eaa te ō maira noou. Taputou mai aia e ka ora akaou “te aronga i mate.” (Isaia 26:19) Ko ta te Pipiria teia e karanga ra e e tuakaouanga.

ME MATE TETA TEI AKAPEREPEREA

⁴ Me mate tetai kopu tangata me kore tetai taeake, ka ati ngakau tatou, ka tumatetenga e ka paruka ua.

1-3. Eaa te mea tei akatuikaa ia tatou, e ka akapeea a Iehova me akaora mai ia tatou?

4. (a) Eaa te ka akapumaana ia tatou me mate tetai o to tatou akaperepere me kore oa? (e) Koai ma tetai au oa piri tikai o Iesu?

Kare a tatou ravenga kia akaora akaou mai iaia. Inara te oronga maira te Pipiria i te akapumaana. (**E tataua ia 2 Korinetia 1:3, 4.**) Ka akamanako ana tatou e tai akaraanga e akaari maira e, e inangaro maata to Iehova e to Iesu kia akaora i to tatou au akaperepere. Ia Iesu i te enua nei, e atoro ana aia ia Lazaro e tona nga tuaine ia Mareta e Maria. E au oa ratou no Iesu. Karanga te Pipiria e: “Akaperepere a Iesu ia Mareta, e tona teina, e ia Lazaro.” Inara i tetai rā, kua mate a Lazaro.—Ioane 11:3-5.

5 Aere a Iesu i te akapumaana ia Mareta e Maria. Te rongo anga a Mareta e te aere maira a Iesu, kua aere atu aia ki vao i te oire i te aravei iaia. Mataora aia i te kite ia Iesu inara kua karanga atu aia e: “Naringa koe i ko nei, kare e mate toku tungane,” koia oki naringa a Iesu i tae vave mai, kare tona tungane e mate. Muri ake i te reira kua kite atu a Iesu ia Maria e aue ra. Te akara atu anga ia raua e aue ra, tangi tikai aia e kua aue katoa. (Ioane 11:21, 33, 35) Kite tikai aia i te mamae ngakau me mate tetai tei akaperepereia e tatou.

6 Pumaana tatou i te kite e aite rai to Iesu tu no runga i te mate mei to tatou. Aite tikai a Iesu mei tona Metua. (Ioane 14:9) E mana to Iehova kia takore i te mate e tuatau ua atu. Kare e roa atu ko tera tana ka rave.

“E LAZARO, KA AERE MAI KI VAO!”

7 Te tae atu anga a Iesu ki te ngai i vaooia ai te

5, 6. (a) Eaa ta Iesu i rave i tona kite anga i te kopu tangata e te au oa o Lazaro e aue ra? (e) Eaa i pumaana ai kia kite e mei teaa to Iesu tu no runga i te mate?

7, 8. Eaa te tumu i kore ei a Mareta e inangaro kia uri ke ia te toka mei te ngai tanumanga o Lazaro, e eaa ta Iesu i rave?

kopapa o Lazaro, kua topiriia te ngutupa ki te toka maatamaata. Karanga atu a Iesu e: “Ka uri ke atu i te toka.” Inara kua arai a Mareta ia ratou. Ko te po ā oki teia i te vai anga te kopapa o Lazaro ki roto i te mato. (Ioane 11:39) Kare ra aia i kite e eaa ta Iesu ka rave.

⁸ Kua kapiki atura a Iesu kia Lazaro: “Ka aere mai ki vao!” E mea umere tikai ta Mareta raua ko Maria i kite. “Kua aere maira taua tangata i mate ra ki vao, kua tākaiia nga rima e nga vaevae.” (Ioane 11:43, 44) Kua akaora akaouia mai a Lazaro! Kua taokotai akaouia ratou ko tona kopu tangata pera te au taeake. Rauka ia ratou kia mou iaia, kia amiri e kia tuatua kiaia. E temeio tikai teia! Kua akatu akaou a Iesu ia Lazaro.

“E MAINE, KA TU KI RUNGA, TE AKAUE ATU NEI AU IA KOE!”

⁹ No Iesu ainei tona uaorai mana i te akatu akaou i te tangata? Kare. Mua ake ka akatu akaou ei ia Lazaro, kua pure a Iesu e kua oronga mai a Iehova i te mana kia akatu akaou aia ia Lazaro. (**E tatau ia Ioane 11: 41, 42.**) Kare ko Lazaro ua te tangata tei akatu akaouia mai. Akakite te Pipiria no runga i tetai tamaine maki e 12 ona mataiti. Pati akatenga tona papa a Iairo kia akaora a Iesu i tona maki. Tana tamaine okotai ua tera. Iaia e tuatua ra kia Iesu, akakite mai te tangata e: “Kua mate rava to tamaine; eaa koe e tamanamanata atu ei i te Orometua?” Karanga atu a Iesu kia Iairo: “Auraka e matakū, ka akarongo ua mai koe.” Aru atura aia ia Iairo ki tona kainga. Tae atu raua, kite atu a Iesu i te tangata

9, 10. (a) Naai i oronga mai i to Iesu mana kia akatu akaou mai i te tangata mei te mate? (e) Eaa i puapinga ai te tuatua o te tuakaouanga no tatou?


e aue ra. Karanga a Iesu kia ratou: “Auraka e tangi; kare aia i mate, kua moe ra.” Kua umere tona pāpā e te māmā eaa te aiteanga i ta Iesu tuatua. Kua pati a Iesu i te tangata kia aere, e kua arataki atu i tona pāpā e te mama ki roto i te pia tei reira te tamaine. Rave iora a Iesu i tona rima e kua na ko atura: “E maine, ka tu ki runga, te akaue atu nei au ia koe.” Akamanako ana i te rekareka maata o nga metua i tona tu anga ki runga e kua aere iora! Kua akatu akaou mai a Iesu i ta raua tamaine. (Mareko 5:22-24, 35-42; Luka 8:49-56) Mei reira mai, me akara raua i ta raua tamaine, ka maara ua rai ia raua ta Iehova i rave no ratou na roto ia Iesu.*

10 Te aronga ta Iesu i akatu akaou kua mate akaou ratou i muri mai. Inara ko ta tatou i tatau no runga i teia aronga, e mea puapinga tikai no te mea ka oronga mai te reira i te manakonakoanga mou. Inangaro a Iehova i te akatu akaou mai i te tangata e ka rave rai aia i te reira.

TA TATOU I KITE MAI NO TE TUATUA O TE TUAKAOUANGA

11 Akakite tika mai te Pipiria e “kare ra a te aronga i mate ra e tuatua i kitea.” Mei tera rai a Lazaro. (Koheleta 9:5) Mei ta Iesu i akakite, mei te mea rai e i moe ana a Lazaro. (Ioane 11:11) Iaia i roto i te rua, kare takiri ana apinga i kite ana.

* I roto i tetai au tuanga o te Pipiria, te akakite ra e kua akatu akaouia mai tetai au mapu, au ruaine, tane e te vaine, ngati Iseraela e te au manuiiri. Ka rauka ia koe te tatau i te reira i roto ia 1 Ariki 17:17-24; 2 Ariki 4:32-37; 13:20, 21; Mataiao 28:5-7; Luka 7:11-17; 8:40-56; Angaanga 9:36-42; 20:7-12.



Akatu akaou mai
a Elia i te tamaiti a
tetai vaine takaua.
—1 Ariki 17:17-24

Akatuakaou mai
te apotetoro a
Petero ia Doreka.
—Angaanga 9:36-42



Rekareka maata to Lazaro
kopu tangata e te au oa i тона
akatu akaouia mai anga!
—Ioane 11:38-44

12 Te akatu akaou anga a Iesu ia Lazaro, e maata te tangata tei kite. Kua kite katoa to Iesu au enemi e nana i rave i teia temeio. Kua ora mai a Lazaro, na teia i akapapu mai e kua tupu tikai te tuakaouanga. (Ioane 11:47) Maata katoa te tangata tei aravei mai ia Lazaro. To ratou irinaki anga teia e na te Atua i tonono mai ia Iesu. Kare tona au enemi i mareka ana e kua akakoro ratou kia tamate ia Iesu e Lazaro.—Ioane 11:53; 12:9-11.

13 Akakite a Iesu e ka akatu akaouia “te aronga katoa i roto i te rua.” (Ioane 5:28) Tera te aiteanga ka akaora akaou mai a Iehova i te aronga i mate. No Iehova kia akatu akaou mai i tetai tangata, ka akamaara aia i te au mea ravarai no runga i tera tangata. Ka rauka ainei iaia? Pirioni ua atu etu i te ao e pini ua ake. Karanga te Pipiria e kua kite a Iehova i te ingoa o te au etu tataki tai. (E tatau ia Isaia 40:26.) Me ka maara iaia te ingoa o te au etu ravarai, papu roa e ka maara iaia te au mea pouroa no runga i te aronga ka akaora akaou mai aia. Te mea puapinga, kua kite tatou e e mana tona i te akaora akaou mai i te tangata, no te mea nana i anga i te au mea ravarai.

14 Irinaki te tangata tiratiratu a Iobu e e tuakaouanga tetai. Kua ui aia e: “Kia mate te tangata nei, ka ora akaou ainei aia?” Kua na ko atura aia kia Iehova: “Naau e kapiki mai, e naku e io atu kia koe: e tangi rai koe ki te angaanga a to rima.” Ae kua kite a Iobu e te tiaki ua nei a Iehova i te tuatau, e akatu akaou mai ei Aia i tei mate.—Iobu 14:13-15.

12. Akapeea tatou i kite ei e kua tupu tikai te tuakaouanga o Lazaro?

13. Eaa i papu ei ia tatou e ka akatu akaou mai a Iehova i tei mate?

14, 15. Eaa ta te au tuatua a Iobu e apii maira ia tatou no runga i te tuakaouanga?

15 Eaa ra toou manako no runga i te tuakaouanga? Penei te manako ra koe e, 'Peeaa ra toku kopu tangata e te au taeake, ka akatu akaouia mai ainei ratou?' E mea pumaana kia kite tatou e e inangaro tikai to Iehova kia akaora akaou mai i tei mate. Ka akara ana tatou eaa ta te Pipiria e akakite maira no runga i te ngai ka noo ratou e koai ma te ka akatu akaouia mai.

KA AKARONGO RATOU I TONA REO E KA AERE MAI KI VAO

16 I te tuatau i topa, te aronga tei akatuia mai, kua takotai akaouia ma to ratou kopu tangata e te au taeake i te enua nei. Ka tupu katoa teia a te tuatau ki mua, inara e meitaki roa atu te reira. Eaa te tumu? Ka rauka tetai tikaanga no te aronga te ka akatuia mai kia ora e tuatau ua atu kare e mate akaou. E ao tuke takiri ta ratou ka noo, kare mei to tatou ao i teia tuatau. Kare e tamaki, kare e angaanga kino e kare e maki.

17 Koai te ka akatu akaouia? Akakite a Iesu e ka 'akarongo te aronga **katoa** i roto i te rua i tona reo, e ka aere mai ki vao.' (Ioane 5:28, 29) Karanga a Apokalupo 20:13 e: "Kua tuku maira te tai i te aronga i mate i roto iaia ra; e kua tuku maira te vaarua e ko ade i te aronga i mate i roto ia raua." Ae, manganui ua atu ka ora akaou mai. Karanga katoa a Paulo e ka akatu akaouia "te aronga tuatua-tika e te aronga tuatua-tika kore." (E tatau ia Angaanga 24:15.) Eaa ra te aiteanga o teia?

18 "Te aronga tuatua-tika," te ō maira te au tavini

16. Eaa te tu oraanga ka kite te aronga te ka akatu akaouia mai ki runga nei i te enua?

17. Koai ma te ka akatu akaouia mai?

18. Koai ma "te aronga tuatua-tika" ka akatu akaouia mai?

tiratiratu o Iehova tei noo ana i mua ake ka aere mai ei a Iesu ki te enua nei. Ka akaora akaouia mai te aronga mei ia Noa, Aberahama, Sara, Mose, Ruta, e Esetera ki te enua nei. Ka rauka i te tatau no runga ia ratou i roto ia Ebera pene 11. Peea to Iehova au tavini tiratiratu tei mate i to tatou nei tuatau? E aronga “tuatua-tika” katoa ratou e ka akatu akaouia mai ratou.

I te Parataito, ka akatu akaouia mai
te mate e ka tavaitai akaouia
ma to ratou au akaperepere



19 “Te aronga tuatua-tika kore,” te ō maira te manga-nui ua atu tei kore i kite ia Iehova. Noatu kua mate ratou, kare a Iehova i akangaropoina ia ratou. Ka akatu akaou mai aia ia ratou e ka rauka tetai tikaanga no ratou kia apii no runga iaia e kia tavini iaia.

20 Te aiteanga ainei i reira e ka akatu akaouia mai te au tangata ravarai i mate? Kare. Kua akakite a Iesu e kare tetai au tangata e akaora akaouia mai. (Luka 12:5) Tei iaai ra te tika e me ka akatu akaouia mai tetai tangata e me kare? Ko Iehova te Akava, kua akamana katoa aia ia Iesu “ei Akava i tei ora e i tei mate.” (Angaanga 10:42) Tetai ua atu ka akavaia ei tangata kino e kare e inangaro kia tau, kare aia e akatu akaouia mai. —Akara i te Au Manako Poto 19.

TUAKAOUANGA KI TE RANGI

21 Akakite katoa mai te Pipiria e ka noo tetai au tangata ki runga i te rangi. Me akatu akaouia tetai tangata ki runga i te rangi, kare aia e akaokiia mai ei tangata i roto i te kopapa. Ka akatu akaouia mai aia ei vaerua.

22 Ko Iesu te tangata mua tei akatu akaouia mei teia te tu. (Ioane 3:13) E toru rā i muri ake i tona tamate angaia, kua akatu akaou mai a Iehova iaia. (Salamo 16:10; Angaanga 13:34, 35) Kare a Iesu i akatuia mai i roto i te kopapa. Akamārama te apotetoro a Petero e ‘i tamate ravaia a Iesu i te kopapa ra, i akaoraia ra i te

19. Koai ma “te aronga tuatua-tika kore”? Eaa te tikaanga ta Iehova ka oronga no ratou?

20. Eaa te tumu ka kore ei te au tangata ravarai e akatu akaouia mai?
21, 22. (a) Mei teaa ra te tu kia akatu akaouia mai ki te rangi?
(e) Koai te tangata mua tei akatu akaouia mai ki te rangi?

vaerua.' (1 Petero 3:18) Kua akatu akaouia mai a Iesu ei vaerua ririnui! (1 Korinetia 15:3-6) Akakite te Pipiria e kare koia ua tei akatu akaouia mai ei vaerua.

23 I mua ua ake ka mate ei aia, akakite a Iesu ki tana au pipi tiratiratu e: "Te aere nei au e akamanea i tetai ngai no kotou." (Ioane 14:2) Ka akatu akaouia mai tetai au pipi a Iesu kia noo i te rangi e ia. Tokoia ratou? Karanga a Iesu e "anana iti" ua. (Luka 12:32) Akakite mai te apotetoro a Ioane i te numero i tona kite anga ia Iesu i "runga i te maunga ra i Siona [i te rangi], ma te tangata katoa i vaitata iaia okotai anere e a ngauru ma a i te tausani."—Apokalupo 14:1.

24 A ea teia au Kerititiano e 144,000 e akatu akaouia ai? Akakite te Pipiria e, i muri ake i te akamata anga te Mesia i te tutara i te rangi. (1 Korinetia 15:23) Tei roto tatou i taua tuataua ra, e kua akatu takereia te maataanga o te 144,000 ki te rangi. Te aronga e toe nei i te enua, ka mate i to tatou nei tuataua e ka akatua mai ratou mei te kamoanga mata te tu ki runga i te rangi. Te maataanga o te tangata, ka akatu akaouia mai a te tuataua ki mua, ki roto i te Parataito i te enua nei.

25 Kare e roa atu ka akaora mai a Iehova i te au tangata pouroa, ka kore te mate e tuataua ua atu! (**E tatau ia Isaia 25:8.**) Eaa ta te aronga ka aere ki te rangi ka rave i reira? Akakite te Pipiria e ka tutara ratou e Iesu i roto i te Patireia, koia oki te kavamani. Te pene ka aru mai, e maata ta tatou ka kite no runga i taua kavamani ra.

23, 24. Koai ma te "anana iti" ta Iesu e tuataua ra, e eaa te maata ia ratou?

25. Eaa ta tatou ka apii i roto i te pene ka aru mai?

TE TIKA 1

KA TAKORE A
IEHOVA I TE MATE

“E taua enemi openga ra, ko te mate,
e akakoreia ia.”—1 Korinetia 15:26

Akapeea te Pipiria te akapumaana mai anga ia
tatou me mate tetai tangata?

2 Korinetia 1:3, 4

Me mate tetai o te ngutuare
tangata, ka taitaia tatou.
Oronga mai te Pipiria i te aka-
pumaanaanga mou.

Isaia 25:8; 26:19

E mana to Iehova kia takore i
te mate e tuatau ua atu. Ka
akaora akaou mai aia i te
aronga kua mate ke ana.

TE TIKA 2

KA RAUKA IA TATO
TE AKARONGO I ROTO
I TE TUAKAOUANGA

“E maine, ka tu ki runga, te akaue atu nei
au ia koe.”—Mareko 5:41

Eaa te tumu ka rauka ai ia tatou te akarongo i roto i
te tuakaouanga?

Ioane 11:1-44

Kua akatu akaou mai a Iesu ia
Lazaro.

Mareko 5:22-24, 35-42

Kua akatu akaou mai a Iesu i
tetai tamaine.

Ioane 11:41, 42

Kua akatu akaou mai a Iesu

i tei mate na roto i te
mana o Iehova.

Ioane 12:9-11

Maata tei kite ia Iesu i te
akatu akaou anga i tei mate.
Kua kite katoa to Iesu au
enemi e ka rauka iaia i te rave
i te reira.

TE TIKAI 3**MANGANUI UA ATU
TA IEHOVA KA AKAORA
AKAOU MAI**

“Naau e kapiki mai, e naku e io atu kia koe:
e tangi rai koe ki te angaanga a to rima ra.”

—Iobu 14:13-15

Koai ma te ka akatu akaouia mai?

Ioane 5:28, 29

Te aronga pouroa i roto i to
lehoва manakonakoanga, ka
akaora akaouia mai.

Angaanga 24:15

Ka akatu akaouia mai te
aronga tuatua tika e te aronga
tuatua tika kore.

Isaia 40:26

Mama ua ia lehoва te
akamaara i te ingoa o te
au etu tatakitai, e ka maara
rai iaia te au mea ravarai
no runga i te aronga ka
akaora akaou mai aia.

TE TIKAI 4**TETAI ARONGA KA
AKATU AKAOUIA MAI
KIA NOO I TE RANGI**

“Te aere nei au e akamana i tetai ngai no kotou.”

—Ioane 14:2

Koai ma te ka akatu akaouia mai ki te rangi?

1 Petero 3:18

Ko Iesu te tangata mua tei
akatu akaouia mai ki te rangi.

Luka 12:32

Akakite a Iesu e, e tokoiti ua
tana au pipi

ka akatu akaouia mai
kia noo i te rangi.

Apokalupo 14:1

Kua iki a lehoва e 144,000
kia noo i te rangi.

EAA TE PATIREIA O TE ATUA?

MIRIONI ua atu tei kite i te pure rongonui, Te Pure a te Atua. Rave a Iesu i teia pure ei apii i tana au pipi aka-
peea me pure. Pure aia no teaa? Eaa teia pure i pua-
pinga ai no tatou i teia tuatau?

² Karanga a Iesu: “Na ko kotou kia pure: E to matou Metua i te ao ra, Kia tapu [kia akatapuia] toou ingoa. Kia tae toou basileia. Kia akonoia toou anoano i te enua nei, mei tei te ao katoa na.” (E **tatau ia Mataio 6:9-13.**) No teaa a Iesu i apii ei kia pure tatou no teia au mea e toru?—Akara i te Au Manako Poto 20.

³ Kua apii tatou e ko Iehova to te Atua ingoa e kua uriuri ana e eaa to te Atua anoano no te tangata e te enua. Eaa ra te aiteanga i ta Iesu tuatua: “Kia tae toou basileia”? Ka apii tatou eaa te Patireia o te Atua, ta te reira ka rave, peea te reira me akatapu i to te Atua ingoa.

EAA TE PATIREIA O TE ATUA?

⁴ Kua akanoo a Iehova i tetai kavamani i te rangi e kua iki ia Iesu ei Ariki no te reira. Kapiki te Pipiria i teia kavamani, ko te Patireia o te Atua. Ko Iesu “te

-
1. Eaa te pure rongonui ta tatou ka uriuri?
 2. Eaa te au mea puapinga e toru ta Iesu i apii kia pure tatou?
 3. Eaa te ka anoanoia kia kite tatou no runga i te Patireia o te Atua?
 4. Eaa te Patireia o te Atua, e koai te Ariki o taua Patireia?

Ariki o te au ariki, e te Atua o te au atu.” (1 Timoteo 6:15) Maata atu te meitaki ta Iesu ka rave i ta **tetai ua atu** tutara. Maata atu tona mana i to te au tutara tangata katoatoa.

⁵ E 40 rā i muri ake i tona tuakaouanga, oki a Iesu ki te rangi. I muri mai kua akamana a Iehova iaia ei Ariki no te Patireia. (Angaanga 2:33) Ka tutara mai te kavamani o te Atua i te enua mei te rangi mai. (Apo-kalupo 11:15) No reira te Pipiria i kapiki ei te Patireia o te Atua e ko te “basileia i te ao.”—2 Timoteo 4:18.

⁶ Karanga te Pipiria e ko Iesu tei maata roa atu i tetai ua atu ariki tangata ua nei, no te mea “Tei iaia anake ra te mate kore.” (1 Timoteo 6:16) Ka mate te au tutara ravarai, kare ra a Iesu e mate. Ta Iesu au mea meitaki ka rave no tatou, ka vai rai e tuatau ua atu.

⁷ Totou te Pipiria e e Ariki tuatua tika a Iesu e te aroa: ‘Ka noo ua mairai te vaerua o Iehova ki runga iaia, te vaerua o te pakari e no te karape; te vaerua o te ako e no te mana; te vaerua no te kite, e no te matakua ia Iehova. E maata oki tona kite i te matakua ia Iehova; kare aia e akava ua i ta ona mata i akara ra, kare katoa e akatika ua [me kore e ako] i ta ona taringa ua i akarongo ra. I te tuatua-tika ra ka akava mai ei aia i te aronga ao ra.’ (Isaia 11:2-4) Kare ainei koe inangaro i te ariki mei teia te tu?

5. Ka tutara te Patireia o te Atua mei ea mai? Ka tutara mai te reira ki rungao i teaa?

6, 7. Eaa i riro ei ko Iesu te ariki meitaki roa atu i tetai ua atu ariki tangata ua nei?

8 Kua iki te Atua i tetai au tangata kia tutara kapiti e Iesu i roto i tona kavamani i te rangi. Akakite a Paulo kia Timoteo: “Kia akakoromaki katoa tatou i te kino ra, e basileia katoa to tatou ki ona ra.” (2 Timoteo 2:12) Tokoia ka tutara kapiti e Iesu i te rangi?

9 Kua apii tatou i te Pene 7 e i roto i te orama a te apotetoro ko Ioane, e Ariki a Iesu e tei te rangi aia e te 144,000 ariki ke mai. Koai teia 144,000? Akakite a Ioane e tei runga ia ratou “tona [to Iesu] ingoa e te ingoa o tona Metua i te tata angaia ki runga i to ratou rae.” E “ko te aronga teia i aru i te Punua-mamoe [Iesu] i tona au aerenga ravarai. I okoia ia aronga no roto i te tangata nei.” (E tatau ia Apokalupo 14:1, 4.) E au Kerititiano tiratiratu te 144,000 ta Iehova i iki ei au ariki, kia tutara mai ratou e Iesu i te enua. Me mate ratou ka akatu akaouia ratou ki te rangi. (Apokalupo 5:10) Akamata a Iehova i te iki i teia au Kerititiano tiratiratu mei te 33 T.N. mai, ei tuanga no teia pupu 144,000.

10 No to Iehova inangaro ia tatou, iki aia i tetai au tangata kia tutara e Iesu. E tutara meitaki a Iesu, kua mārama aia i to tatou tu. Kua kite aia mei teaa te tu kia riro ei tangata e kia takinokinoia. Tangi a Iesu ia tatou i na Paulo ei e kua “aroa mai ia tatou i to tatou au paruparu nei; i rokoia katoa oki aia i te au timataanga katoa, mei ia tatou katoa nei rai.” (Ebera 4:15; 5:8)

8. Akapeea tatou i kite ei e kare ko Iesu anake ua te ka tutara?

9. Tokoia ka tutara kapiti e Iesu? I naea te Atua i akamata ai te iki ia ratou?

10. No teaa a Iehova i akamana ai ia Iesu e te 144,000 ei tutara no te tangata?

Kua kite katoa te 144,000 mei teaa te tu kia riro ei tangata, e mei teaa te ngatā o te tu apa ua e te maki. Papu roa e ka mārama a Iesu e te 144,000 i to tatou turanga e ta tatou e na roto nei.

EAA TA TE PATIREIA O TE ATUA KA RAVE?

¹¹ Apii a Iesu i tana au pipi kia pure no to Iehova anoano kia akatupuia i te rangi. Eaa te tumu? Roto i te Pene 3 kua patoi te Tiaporo a Satani ia Iehova. Kua akatika a Iehova iaia e tana au angera akarongo kore ko te au temoni, kia noo rai i te rangi no tetai tuatau poto. Kare te katoatoa i te rangi e rave ana i to Iehova anoano. Roto i te Pene 10, e maata ta tatou ka kite no runga ia Satani e te au temoni.

¹² Te akamārama maira te Pipiria e i muri ua ake i to Iesu akaterono angaia ei Ariki no te Patireia o te Atua, ka tamaki atu aia ia Satani. (E **tatau ia Apokalupo 12:7-10.**) E rua nga mea puapinga ta te irava 10 e akataka maira. Akamata te Patireia o te Atua i te tutara, e ko Iesu te Ariki. Uriia mai a Satani ki te enua nei. Ka kite tatou e kua tupu takere teia.

¹³ Rekareka te au angera tiratiratu i te uriia mai anga a Satani e tana au temoni ki vao. Akakite te Pipiria: “Kia rekareka, e te au rangi e, e ko kotou katoa oki ko tei noo i reira.” (Apokalupo 12:12) Kua au ua to te rangi e te rotai no te mea te rave pouroa ra ratou i to te Atua anoano.

11. Eaa te tumu i apii ei a Iesu i tana au pipi kia pure no to Iehova anoano i te rangi kia akatupuia?

12. Eaa te nga mea puapinga e rua tei akatakaia mai i roto ia Apokalupo 12:10?

13. Eaa tei tupu i te rangi i te uriia mai anga a Satani kia vao?

14 Tuke roa te oraanga i te enua nei. Te tupu nei te kino ki te tangata no te mea “tei raro atu na oki te diabololo ia kotou na, e riri maata oki tona, no te mea kua kite aia e e manga tuatau poto ua tona e toe nei.” (Apokalupo 12:12) E riri tikai to Satani. Kua uriiia mai aia ki vao mei runga i te rangi, e kua kite aia e kare e roa atu ka takoreia aia. Te akatupu nei aia i te manamanata e te taitaia i te enua nei e pini ua ake.

15 Inara kare i tau i to te Atua anoano no te enua. Inangaro rai aia kia noo te aronga apa kore i te enua parataito e tuatau ua atu. (Salamo 37:29) Akapeea ra te Patireia o te Atua me akatupu i teia?

16 Akakite te totou a Daniela 2:44: “E i te au rā o taua au ariki ra, e akatupu ei te Atua no te rangi i tetai basileia, te ka kore rava e akakoreia e tuatau ua atu: kare oki taua basileia ra e riro i etai ke, e riro na te reira e akapueurikiriki e e akapou i taua au basileia katoa ra, e ka vai rai te reira e tuatau ua atu.” Eaa ta teia e apii maira no runga i te Patireia o te Atua?

17 Mea mua, ka akamata te Patireia o te Atua i te tutara “i te au rā o taua au ariki ra.” Te aiteanga, te vai nei rai te au kavamani o te enua nei me akamata te Patireia i te tutara. Te rua, ka vai rai te Patireia o te Atua e tuatau ua atu e kare e kavamani ke e mono i te reira. Te toru, e tamakianga to rotopu i te Patireia o te Atua e te au kavamani o teiane ao. Ka upokotu te Patireia o te Atua e ko te reira anake ua te kavamani ka

14. Eaa tei tupu i te enua nei no tei uriiia mai a Satani ki vao?

15. Eaa to te Atua anoano no te enua nei?

16, 17. Eaa ta Daniela 2:44 e akakite maira kia tatou no runga i te Patireia o te Atua?

tutara mai i te enua, e ko te kavamani meitaki rava atu teia no te tangata.

18 Eaa te ka tupu i mua ua ake i te tamaki i rotopu i te au kavamani o teia ao e te Patireia o te Atua? I mua ake i te tamaki openga tei kapikiia e ko Aramagido, ka aere te au temoni ka pikikaa i te “ui ariki o te ao katoa nei e akaputuputu ia ratou i te tamaki i taua rā maata o te Atua mana katoatoa.” Ka tamaki atu te au kavamani o te tangata i te Patireia o te Atua.—Apokalupo 16:14, 16; akara i te Au Manako Poto 10.

19 Eaa tatou ka anoano ei te Patireia o te Atua? E toru tumu. Tai, e aronga ara tatou, te maki e te mate nei tatou. Akakite te Pipiria e i raro i te Patireia o te Atua, ka ora tatou e tuatau ua atu. Karanga a Ioane 3:16: “I aroa mai te Atua i to te ao nei, kua tae rava ki te oronga anga mai i tana Tamaiti anau tai, kia kore e mate te akarongo iaia, kia rauka ra te ora mutu kore.”

20 Te rua, te noo nei tatou i rotopu i te au tangata kino, pikipikikaa, te a’ru e te akono kore. Kare e rauka ia tatou te takore ia ratou, ka rauka ra i te Atua. Ko tei rave tamou i te kino, ka takoreia me tae mai te tamaki Aramagido. (**E tatau ia Salamo 37:10.**) Te toru, e tangi kore tikai e te kino te au kavamani o te tangata e kare o ratou mana. Kare ratou e inangaro i te tau-turu i te tangata kia akarongo i te Atua. Karanga te

18. Eaa te ingoa o te tamaki openga i rotopu i te Patireia o te Atua e te au kavamani o teia ao?

19, 20. No teaa tatou ka anoano ei i te Patireia o te Atua kia tutara mai i te enua?



Mei te uriia mai anga o Satani
e tana au temoni ki raro nei te
enua, maata roa atu te kino e
te taitaia i runga nei te enua.
Kare e roa atu ka kore te taitaia

Pipiria e “te tutara ra tetai tangata ki rungao i tetai, ei mate nona uaorai.”—Koheleta 8:9.

21 Me oti te tamaki Aramagido, ka akapapu te Patireia e kia akatupuia to te Atua anoano i te enua nei. Ka takore te reira ia Satani e tana au temoni. (Apokalupo 20:1-3) Kare e tangata e maki e kare e mate. Na roto i te oko, ka ora pouroa te aronga tiratiratu i roto i te Parataito e tuatau ua atu. (Apokalupo 22:1-3) Na te Patireia e akatapu i te ingoa o te Atua. Eaa te aiteanga i teia? Ka akakakā te au tangata ravarai i te ingoa o te Atua me tutara Tona kavamani i te enua nei.—Akara i te Manako Poto 21.

I NAEA A IESU I RIRO EI EI ARIKI?

22 Kua apii a Iesu i tana au pipi kia pure: “Kia tae toou basileia.” Taka meitaki e ka tae mai te kavamani o te Atua a te tuatau ki mua. Na mua a Iehova i te akanoo i tona kavamani e te akariro ia Iesu ei Ariki.

21. Akapeea te Patireia i te akapapu anga e kia akatupuia te anoano o te Atua i te enua nei?

22. Akapeea tatou i kite ei e kare a Iesu i riro mai ei Ariki iaia i runga nei te enua e i muri tika ake i tona tuakaouanga?

Ka akapapu te Patireia o te Atua kia akatupuia Tona anoano i te enua nei

Kua akariroia ainei a Iesu ei Ariki i tona oki anga ki te rangi? Kare, kua tiaki aia. Akapapu mai a Petero e Paulo i teia i to raua taiku anga ia Salamo 110:1 no runga ia Iesu, i tetai taime i muri ake i tona tuakaouanga. Akakite a Iehova: “Ka noo koe ki taku rima katau nei, E kia akariro au i to au enemi ei pange vae-vae noou.” (Angaanga 2:32-35; Ebera 10:12, 13) Eaa te roa ka tiaki a Iesu i mua ake ka akariro ei a Iehova iaia ei Ariki?

23 Mua ake i te 1914, kua mārama ke ana tetai pupu Kerititiano e e mataiti puapinga tera i roto i te totou Pipiria. Akapapu mai te au mea tei tupu i teia ao mei te 1914 mai e e tika rai ta ratou. Akamata a Iesu i te tutara ei Ariki i taua mataiti ra. (Salamo 110:2) Muri ua mai kua uriia mai a Satani ki te enua nei, e “e manga tuatau poto ua tona e toe nei.” (Apokalupo 12:12) Te pene ka aru mai, maata ta tatou ka kite ei akapapu e tei roto tatou i taua tuatau ra. Ka kite katoa tatou e kare e roa atu ka akatupu te Patireia i to te Atua anoano i te enua nei.—Akara i te Manako Poto 22.

23. (a) I naea a Iesu i akamata ai te tutara ei Ariki no te kavamani o te Atua? (e) Eaa ta tatou ka kite i roto i te pene ka aru mai?



TE TIKA 1

TE PATIREIA O TE ATUA E KAVAMANI TIKA TIKA

“Kia tae toou basileia. Kia akonoia toou anoano i te enua nei, mei tei te ao katoa na.”—Mataio 6:9-13

Eaa te Patireia o te Atua?

Apokalupo 11:15

Ka tutara te Patireia me kore te kavamani o te Atua i te enua mei te rangi mai.

1 Timoteo 6:15

Ko Iesu te Ariki o te Patireia o te Atua.

Apokalupo 14:1, 4

E 144,000 tangata ka tutara kapiti e Iesu mei te rangi mai.

Ebera 4:15; 5:8

Kua marama a Iesu e te 144,000 i to tatou turanga e ta tatou e na roto nei.

TE TIKA 2

KO IESU TE TUTARA TAU RAVA ATU

“I te tuatua-tika ra ka akava mai ei aia i te aronga ao ra.”—Isaia 11:4

Eaa i tau ei e ko Iesu te Ariki meitaki rava atu kia ikiia no te Patireia?

1 Timoteo 6:16

Ka mate te au tutara tangata, kare rava a Iesu e mate. Ta Iesu au mea meitaki i rave no tatou ka vai rai e tuatau ua atu.

Isaia 11:2-4

Maata atu te meitaki ta Iesu ka rave i ta tetai ua atu tutara. Maata atu tona mana i to te au tutara tangata katoatoa. E tangata tuatua tau e te aroa ua.

TE TIKA 3**KA AKAPAPU TE PATIREIA
KIA AKATUPUIA TO TE
ATUA ANOANO**

“E akatupu ei te Atua no te rangi i tetai basileia, te ka kore rava e akakoreia.”—Daniela 2:44

Eaa ta te Patireia i rave?

Eaa ta te reira ka rave a te tuatau ki mua?

Apokalupo 12:7-12

Muri ake i to Iesu riro anga ei Ariki i te rangi i te 1914, kua uri mai aia ia Satani ki te enua nei. No reira i maata ai te manamanata, te mamae, e te taitaia i te enua nei.

Koheleta 8:9;**Apokalupo 16:16**

Me tae mai Aramagido, ka takore te Patireia o te Atua i te au kavamani kino a te tangata.

Salamo 37:10

Te aronga ka rave ua rai i te kino ka takoreia.

Apokalupo 22:1-3

Me tutara te Patireia o te Atua, kare e tangata e maki e kare e mate. Ka akakakā te katoatoa i te ingoa o te Atua.

TE VAITATA MAIRA AINEI TE OPENGA O TEIA AO?

ME AKARA koe i te nuti, e manako ana rai koe e ‘Me ka maata ua atu te kino?’ Maata te tumate-tenga e te takinga kino, irinaki tetai aronga e kua vaitata te openga o teia ao. E tika ainei tera? E mataara ainei tetai e kite ei tatou i te ka tupu a te tuatau ki mua? Ae. Kare te tangata i kite, kua kite ra te Atua. Te akakite maira Aia eaa te ka tupu kia tatou e te enua a te tuatau ki mua.—Isaia 46:10; Iakobo 4:14.

² Me tuatua te Pipiria no runga i te openga o teia ao, te tuatua ra i te openga o te kino, kare i te openga o te Enuua. Apii a Iesu e ka tutara mai te Patireia o te Atua i te enua. (Luka 4:43) Inangaro tana au pipi kia kite aea te Patireia o te Atua e tae mai ei, e kua ui ratou kiaia: “E akakite mai koe ia matou i te tupu anga o taua au mea nei, e te akairo o toou aerenga mai, e te openga o teianeia ao.” (Mataio 24:3) Kare a Iesu i akakite ana i te rā, akakite ra aia i te ka tupu i mua ake i te openga o teia ao. Ta Iesu i akakite e ka tupu, te tupu nei ia i teia tuatau.

³ Roto i teia pene ka uriuri tatou eaa te akapapunganga e tei roto tatou i te tuatau openga. Mea mua, ka

1. Akapeea tatou e kite ei eaa te ka tupu a te tuatau ki mua?

2, 3. Eaa ta te au pipi a Iesu i inangaro kia kite, e eaa ta Iesu i akakite kia ratou?

inangaroia tatou kia kite no runga i te tamaki tei tupu i te rangi, kia mārama tatou i te tumu i tupu ei te kino i te enua nei.

TAMAKI I TE RANGI

⁴ I te Pene 8 kua riro a Iesu ei Ariki i te rangi i te 1914. (Daniela 7:13, 14) Akakite a Apokalupo e: “E tamaki tei runga i te rangi: ko Mikaela [Iesu] e tana au angela, tamaki atura i te taae [Satani]; e kua tamaki maira te taae e tana au angela.”* Kare a Satani e tana au temoni i re, kua uriia mai ratou ki te enua nei. Akamanako ana i te rekareka o te au angera! Akapeea ra te tangata i te enua nei? Akakite te Pipiria e e tuatau manamanata tikai no te tangata. Eaa te tumu? No te mea e riri maata to te Tiaporo, “kua kite aia e e manga tuatau poto ua tona e toe nei.”—Apokalupo 12:7, 9, 12.

⁵ Maata te kino a te Tiaporo e akatupu nei. E riri tikai tona no te mea e “manga tuatau poto ua tona” e toe nei, i mua ake ka takore ei te Atua iaia. Ka akara ana tatou i ta Iesu i akakite e ka tupu i te au rā openga.—Akara i te Au Manako Poto 24.

TE AU RĀ OPENGA

⁶ **Tamaki.** Karanga a Iesu: “E tu mai tetai enua e tamaki mai ki tetai enua, e tetai basileia e tamaki

* Ko Mikaela tetai ingoa o Iesu Mesia. Kia maata atu taau ka kite, akara i te Au Manako Poto 23.

4, 5. (a) Eaa tei tupu i te rangi i muri ake te riro anga a Iesu ei Ariki? (e) Roto ia Apokalupo 12:12, eaa te ka tupu a muri ake te uriia mai anga a Satani ki runga i te enua?

6, 7. Eaa te tupu nei no runga i te tamaki e te onge i teia tuatau?

mai ki tetai basileia.” (Mataio 24:7) Maata atu tei mate i roto i te tamaki i to tatou tuatau i tetai ua atu taime. Akakite te *Worldwatch Institute* e mei te 1914 mai, e 100 mirioni tuma tei tamateia. Te au tangata i mate i roto i te tamaki mei te mataiti 1900 ki te 2000, e maata atu i te aronga i mate i mua ake i te mataiti 1900. Aka-manako ana i te taitaia maata e te mamae ta te tamaki i akatupu ki te mirioni ua atu!

7 Onge. Karanga a Iesu: “E onge oki.” (Mataio 24:7) Noatu e maata atu te kai i to mua ana, kare rai e rava ana te kai na te manganui. Eaa te tumu? No te mea kare e rava ana te moni ei oko i te kai me kore me kore kare e rava ana te enua ei tanu kai. Manganui ua atu te tangata kare e rava ana te moni ei oko kai no te rā okotai. Karanga te *World Health Organization* e e mirioni ua atu tamariki e mate nei i te mataiti okotai no te mea kare e rava ana te kai.





⁸ Ngaruerue enua. Totou a Iesu e ka tupu: “Te ngaruerue maata i te enua.” (Luka 21:11) Maata te ngaruerue enua riri-nui e tapapaia nei i te au mata-iti ravarai. Mei te 1900 mai, e rua tuma mirioni tei mate no te ngaruerue enua. Noatu te au ravenga ou kia kite vaveia i mua ake ka tupu ei tetai ngaruerue enua, e manganui rai te mate nei.

⁹ Maki. Totou a Iesu e ka tupu “te maki-mate.” Ka totoa viviki ua te au maki kino, e maata te ka mate. (Luka 21:11) Noatu e maata te maki ka kite te au taote i te rapakau, te vai nei rai tetai au maki kare e rauka i te akaora. Akamārama mai tetai ripoti e e mirioni ua atu tangata e mate nei no te maki maro, *malaria* e te *cholera*. E 30 katoa maki ou tei kitea mai e te au taote, tetai papaki o teia au maki kare e vairakau.

8, 9. Eaa te akaari maira e te tupu nei ta Iesu au totou no runga i te ngaruerue enua e te maki?

TE TU O TE TANGATA I TE AU RĀ OPENGA

10 Roto ia 2 Timoteo 3:1-5, karanga te Pipiria e: ‘Ka tupu te kino maata i taua tuatau openga ra.’ Akataka mai a Paulo e mei teaa to te tangata tu i te au tuatau openga. Akakite aia e ka riro te tangata

- ei akaperepere ia ratou uaorai
- ei noinoi
- ei akarongo kore ki te metua
- kare e tiratiratu
- ei aroa kore i te ngutuare tangata
- ei mako kore
- ei rotoriri e te akakino
- anoano i te au mea e navenave ei ra, kare i anoano i te Atua
- e tutu akono ua i te Atua kare ra e akarongo iaia

11 E maata ainei te tangata mei tera te tu i toou ngai? Mei tera rai te manganui i teia ao. Kare e roa atu ka tau i te Atua i te reira. Taputou aia: “Me

10. Peeaa 2 Timoteo 3:1-5 te akatupu angaia i teia tuatau?

11. Kia tau kia Salamo 92:7, eaa te ka tupu ki te aronga kino?



tupu te aronga kino mei te ngangaere, e me ruperupe katoa te aronga i rave i te kino ra; i ruperupe ia, kia tipu akaruke takiri roaia.”—Salamo 92:7.

TUATUA MEITAKI I TE AU RĀ OPENGA

12 Kua totou te Pipiria e i te au rā openga, ka maata te mamae ngakau e te taitaia i teia ao. Ka tupu katoa te au mea memeitaki i akakite ei te Pipiria.

13 Mārama i te Pipiria. No te au rā openga, tata te peroveta a Daniela: “E tupu atura te kite i te maata anga.” (Daniela 12:4) Ka oronga mai te Atua i te kite kia mārama tona iti tangata i te Pipiria. Rave a Iehova i teia mei te 1914 mai. Ei akaraanga, apii mai aia i te puapinga o tona ingoa e tona akakoroanga no te enua, te tika no runga i te oko, eaa te ka tupu me mate tatou, e no te tuakaouanga. Kua apii tatou e ko te Patireia ua rai o te Atua te ka rauka i te akatikatika i to tatou manamanata. Apii katoa tatou akapeea e mataora ai e eaa te tu oraanga ka mareka mai te Atua. Inara ka akapeea te au tavini o Iehova i te akapua-pinga anga i ta ratou i apii mai? Tei roto te pauanga i tetai totou ke mai.—Akara i te Au Manako Poto 21 e te 25.

14 Te angaanga tutu evangeria i te ao katoa. No te au rā openga, akakite a Iesu: “E tutu aereia te evangelia o te basileia nei, e kako rava ake te ao katoa nei.” (Mataio 24:3, 14) Te tutu aereia nei te tuatua meitaki o te Patireia i roto i te 230 tuma enua e i roto

12, 13. Eaa ta Iehova i apii mai ia tatou i teia au rā openga?

14. Te tutu aereia nei te tuatua meitaki o te Patireia kiea, e koai ma te rave ra i te reira?

i te 700 tuma reo. Pouroa te Au Kite o Iehova no “te pa enua ravarai,” te tauturu nei i te tangata kia mārama eaa te Patireia e ta te reira ka rave no ratou. (Apokalupo 7:9) Rave ratou i teia kare e tutaki. Noatu te makitakitāia maira ratou, kare e rauka kia tāpu i te angaanga tutu evangeria mei ta Iesu i totou.—Luka 21:17.

EAA TAAU KA RAVE?

¹⁵ Irinaki ainei koe e te noo nei tatou i te au rā openga? Maata te totou e akatupuia nei no te au rā openga. Kare e roa ka akamutu te angaanga tutu evangeria e ko “te openga iora.” (Mataio 24:14) Eaa te openga? Ko Aramagido, me takore a Iehova i te kino. Ka tuku a Iehova ia Iesu e tana au angera ririnui kia takore i tetai ua atu kare e akarongo Iaia e tana Tamaiti. (2 Tesalonia 1:6-9) Kare a Satani e tana au temoni e pikikaa akaou i te tangata. Te aronga pouroa tei iki kia akarongo i te Atua e kia āriki i Tona Patireia, ka kite ratou me akatupu a Iehova i tana au taputou.—Apokalupo 20:1-3; 21:3-5.

¹⁶ Kare e roa ka kore teia ao e akatere nei a Satani. E ui kia tatou uaorai, ‘Eaa te ka anoanoia kia rave au?’ Inangaro a Iehova kia apii koe i taau ka rauka i roto i te Pipiria. Tamou marie e kia akono i taau apii. (Ioane 17:3) E uipaanga ta te Au Kite o Iehova i te au epe-toma ei tauturu i te tangata kia mārama i te Pipiria. Tauta kia tae ki teia au uipaanga. **(E tatau ia Ebera 10:**

15. (a) Irinaki ainei koe e te noo nei tatou i te au rā openga, e eaa te tumu? (e) Eaa te ka tupu ki te aronga tei akarongo ia Iehova, e te aronga tei kore i akarongo?

16. Te vaitata roa nei te openga, eaa ra taau ka rave?

“E tutu aerea te
evangelia o te basileia
nei, e kako rava ake
te ao katoa nei.”
—Mataio 24:14



24, 25.) Me te anoanoia ra te au tauiainga i roto i toou oraanga, auraka e matakū i te rave i te reira. Ka matutu roa atu toou pirianga oa kia Iehova.—Iakobo 4:8.

17 Akakite te apotetoro a Paulo e i te ora manako koreia, ka rokoia mai te aronga kino e te mate “mei te keia i te po.” (1 Tesalonia 5:2) Totou a Iesu e e maata te kare e āriki e tei roto tatou i te au rā openga. Akakite aia: “E mei te tuatau ia Noa ra, koia katoa te aerenga mai o te Tamaiti a te tangata nei. Mei tei te tuatau i muao i te diluvi ra, te kaikai ra ratou e te inu ra, te akaipoipo ra, e te orongaia ra kia akaipoipoia, e tae rava atu ki te rā i tomo ei a Noa ki roto i te araka, kare rava i kite, e rokoia iora ratou e te diluvi, e ope takiri akera ratou i te mate; koia katoa te aerenga mai o te Tamaiti a te tangata nei.”—Mataio 24:37-39.

18 Kua akamatakite mai a Iesu e eiaa tatou kia varenga ua i “te maata o te kai e te kona, e te pekapeka o teiane ai.” Ka tupu poitirere ua mai te openga i nana ai, “mei te ereere.” E ka “rokoia mai oki tei noo i te ao katoa nei i te reira.” Akakite katoa mai aia: “E tenana, e ara kotou, e tamou tikai i te pure, kia tau ia kotou te ora i teiane ai au mea katoa e vaitata mai nei, e kia tu kotou ki mua i te aroaro o te Tamaiti a te tangata.” (Luka 21:34-36) No teaa i puapinga ai kia ariu ki te akamatakiteanga a Iesu? No te mea kare e roa atu ka takoreia teia ao kino o Satani. Ko te aronga ua ta Iehova e ta Iesu i āriki te ka ora i te openga e ka noo e tuatau ua atu i te ao ou.—Ioane 3:16; 2 Petero 3:13.

17. No teaa te maataanga ka poitirere ei me tae mai te openga?

18. Eaa te akamatakiteanga ta Iesu i oronga mai no tatou?

TE TIKI 1

AKAKITE MAI A IEHOVA
I TE KA TUPU A TE
TUATAU KI MUA

“I te akakite anga i te openga mei te muatangana mairai, e mei te au tuatau taito mairai i te au mea e kare i tupu.”—Isaia 46:10

Eaa ta tatou i kite no te tuatau openga?

Daniela 7:13, 14

Riro a Iesu ei Ariki i te rangi i te 1914.

Mataio 24:3-14

Totou a Iesu i te kino maata te ka tupu ki te tangata.

Apokalupo 12:7-9, 12

Muri ua ake i to Iesu riro anga ei Ariki, uri mai aia ia Satani ki te enua nei. Riri tikai to Satani e “e manga tuatau poto ua tona e toe nei” i mua ake ka takore ei a Iehova iaia.

TE TIKI 2

TE NOO NEI TATOOU
I TE TUATAU OPENGA

“E akakite mai koe ia matou . . . te akairo o toou aerenga mai, e te openga o teiane i ao.”—Mataio 24:3

I kite ana koe te akatupuangaia te au totou Pipiria?

Mataio 24:7; Luka 21:11

Maata atu te tamaki, te onge, te ngaruerue enua e te maki.

2 Timoteo 3:1-5

Akataka mai te apotetoro a Paulo i te tu o te tangata i teia au rā openga.

Daniela 12:4

Te tauturu nei a Iehova i tona iti tangata kia mārama meitaki atu i te Pipiria.

Mataio 24:14

Te tutuia nei te tuatua meitaki o te Patireia i te enua katoa.

TE TIKA 3**AKAMAREKA IA
IEHOVA I TEIANEI**

“Te aere maira taua rā o te Atu ra mei te keia i te po ra.”—1 Tesalonia 5:2

Te waitata roa nei te openga, eaa ra taau ka rave?

Ioane 17:3

Akapuapinga i taau e apii ra.

Ebera 10:24, 25

Maata taau ka kite i ko i te uipaanga a te Au Kite o lehova.

Iakobo 4:8

Rave i te au tauiaanga ka anoanoia kia akapiri waitata ia koe kia lehova.

Luka 21:34-36

Akatinamou i toou oraanga ki runga i te akamori ia lehova.

TE TIKA NO RUNGA I TE AU ANGERA

INANGARO a Iehova kia kite tatou no runga i tana tamariki. E tamariki te au angera Nana. Kapikiia ratou ko “te au tamariki a te Atua.” (Iobu 38:7) Eaa ta ratou angaanga? Akapeea ratou te tauturu anga i te tangata i mua ana? Ka rauka ainei ia ratou te tauturu ia tatou?—Akara i te Au Manako Poto 8.

² Inangaro tatou kia kite e noea mai te au angera. Muri ake i te anga mai anga a Iehova ia Iesu, akakite a Kolosa 1:16 e “nana oki i anga i te apinga tini ravarai nei, ko to te rangi, e to te enua,” kapiti mai i te au angera. Eaa te maata tana i anga? Karanga te Pipiria, e anere ua atu mirioni.—Salamo 103:20; Apokalupo 5:11.

³ Apii katoa mai te Pipiria e i anga a Iehova i te au angera i mua ake ka anga ai aia i te enua. Eaa ra to ratou manako i te kite anga i te enua? Akakite te puka o Iobu e kua maeva ua ratou i te rekareka. E au tamariki vae-rua piri tikai ratou i te tavini kapiti ia Iehova.—Iobu 38:4-7.

TAUTURU TE AU ANGERA I TO IEHOVA ITI TANGATA

⁴ Inangaro te au angera kia kite i to Iehova akakoro-anga no te enua e no te tangata. (Maseli 8:30, 31;

-
1. No teaa tatou ka apii ei no runga i te au angera?
 2. Noea mai te au angera? Eaa te maata o te angera tei angaia?
 3. Eaa ta Iobu 38:4-7 e akakite maira kia tatou no runga i te au angera?
 4. Akapeea tatou i kite ei e e mea puapinga te tangata ki te au angera?

1 Petero 1:11, 12) Taitaia ratou no tei meameaau a Adamu e Eva e i teiane i kua akarongo kore te maataanga o te tangata ia Iehova. Inara me tatarara tetai e me ariu akaou kia Iehova, rekareka maata te au angera. (Luka 15:10) Mea puapinga to te Atua au tavini kia ratou. Tono mai a Iehova i tana au angera kia tauturu e kia paruru i tona au tavini i te enua nei. (Ebera 1: 7, 14) Ka akara ana tatou i tetai au akaraanga no teia.

“Kua tonu mai taku Atua
i tana angera, e kua topiri
i te vaa o te au liona.”
—Daniela 6:22



⁵ Tono a Iehova e rua angera kia akaora ia Lota e tona ngutuare mei te pou o Sodoma e Gomora. (Genese 19:15, 16) Muri roa mai kua uriia a Daniela ki roto i te vaarua riona inara kare aia i mate. Karanga aia e “kua tonono mai taku Atua i tana angela, e kua topiri i te vaa o te au liona.” (Daniela 6:22) I muri mai, tonono mai a Iehova i te angera kia akaora ia Petero i roto i te are auri. (Angaanga 12:6-11) Ia Iesu i te enua nei, kua tauturu te au angera iaia. Muri ake i tona papetitoanga, “kua matuapuru maira oki te au angela iaia.” (Mareko 1:13) Mua ake ka tamateia ai a Iesu, “kua akamaroiroi maira [tetai angera] iaia.”—Luka 22:43.

⁶ Kare te au angera e ma’ma akaou mai ana ki te tangata. Te akariro nei rai a Iehova ia ratou ei tauturu i tona au tavini. Akakite te Pipiria: “Te patia nei te Angela a Iehova i te puakapa, e pini ua ake te aronga i mataku iaia, e kua akaora ia ratou.” (Salamo 34:7) Eaa i anoanoia ai te paruru ia tatou? Maata to tatou enemi e umuumu nei te takino ia tatou. Koai ratou? Noea mai ratou? Peea ratou me takino ia tatou? Akara tatou eaa tei tupu i muri ake i to Adamu e Eva angaia mai anga.

TO TATOU AU ENEMI AKARA KOREIA

⁷ I te Pene 3, apii tatou e kua meameaau tetai angera ia Iehova, inangaro aia kia tutara i etai ke. Kapiki te Pipiria iaia ko Satani te Tiaporo. (Apokalupo 12:9) Inangaro aia kia meameaau etai ke i te Atua. Kua akavare

5. Akapeea te au angera i te tauturu anga i to Iehova au tavini i mua ana?

6. (a) Akapeea tatou i kite ei e te tauturu nei te au angera i to Iehova iti tangata i teia tuatau? (e) Eaa te au uianga ta tatou ka pau i teiane?

7. Eaa tei tupu ki te tangata no ta Satani au ravenga kikite?

aia ia Eva e te maataanga o te tangata. Inara kua vai tiratiratu rai tetai aronga mei ia Abela, Enoka e Noa kia Iehova.—Ebera 11:4, 5, 7.

⁸ Kua meameaau tetai au angera i te tuatau o Noa e kua akaruke i to ratou ngai i te rangi kia noo i te enua nei. Eaa te tumu? Akakite te Pipiria e kua inangaro ratou i tetai au vaine na ratou. (**E tatau ia Genese 6:2.**) E tarevake tera. (Iuda 6) Te maataanga o te tangata i taua tuatau ra, mei te au angera rai te kino e te takinga kino. Manako a Iehova e takore i te tangata ki te vai diluvi. Akaora ra aia i tona au tavini tiratiratu. (Genese 7:17, 23) Oki akaou te au angera kino ki te rangi. Kapiki te Pipiria ia ratou, e au temoni. Kua piri ratou kia Satani, e kua riro te Tiaporo ei tutara no ratou.—Mataio 9:34.

⁹ No te mea e au angera meameaau ratou, kare a Iehova i āriki akaou ia ratou ei tamariki nana. (2 Petero 2:4) Kare e rauka i te au temoni kia riro akaou mai ei tangata, inara te “pikikaa” nei rai ratou “i to te ao ka-toatoa.” (Apokalupo 12:9; 1 Ioane 5:19) Ka apii tatou akapeea ratou te akavare anga i te manganui.—**E tatau ia 2 Korinetia 2:11.**

AKAVARE TE AU TEMONI I TE TANGATA

¹⁰ Maata te ravenga a te au temoni ei akavare i te tangata. Me tuatua te tangata ki te au temoni ka na roto ratou i tetai taunga purepure me kore ka tuatua tika

8. (a) Akapeea i riro mai ei tetai au angera ei au temoni? (e) Eaa ta te au temoni i rave kia ora ratou?

9. (a) Eaa tei tupu ki te au temoni i to ratou oki anga ki te rangi? (e) Eaa ta tatou ka apii i teianei?

10. E akapeea ana te au temoni me akavare i te tangata?

ratou ki teia au vaerua kino. E angaanga temoni teia e te purepure. Akaue mai te Pipiria kia kopae takiri tatou i te au mea e ō maira te au temoni. (Galatia 5:19-21) Eaa te tumu? Mei te tangata kimi manu rai e taangaanga ana i te ereere kia mou te manu, e taangaanga katoa ana te au temoni i te au ravenga kikite ei akavare i te tangata.—Akara i te Au Manako Poto 26.

11 Tetai ravenga a ratou e purepure. Koia oki, te taangaanga i te mana o te au temoni kia kite eaa te ka tupu a te tuatau ki mua. Penei ka rave tetai tangata i teia na roto i te akarakara etu, te akara akairo i roto i te pere, te tatau i te kapu rima o tetai tangata e te vai atura. Manako te manganui e te meitaki ua ra te reira, inara e peu kino tera. Ei akaraanga akakite te Pipiria e te angaanga kapiti ra te au temoni e te aronga purepure. Roto ia Angaanga 16:16-18 ka kite tatou no runga i tetai “demoni purepure” tei tauturu i tetai tamaine kia rave i te peu “purepure.” Muri ake i to Paulo akaue anga i te temoni kia aere mai ki vao, kua kore rai te purepure a taua tamaine ra.

12 E ravenga ke atu ta te au temoni i te akavare i te tangata. Akavare ratou ia tatou kia irinaki e ka rauka i te tuatua ki tei mate, e ko te aronga i mate te ora nei rai i tetai ngai ke, e ka rauka kia tuatua mai kia tatou e kia tamamae ia tatou. Akaraanga, penei kua mate te oa me kore te taeake o tetai tangata, aere aia ki ko i te taunga purepure tei karanga mai e ka rauka iaia te tuatua ki tei mate. Penei ka akakite mai te taunga i tetai mea no

11. Eaa te purepure, eaa te tumu ka kopae ei tatou i te reira?

12. (a) Eaa te tumu i kino ei kia tuatua atu ki tei mate? (e) Eaa te tumu ka kore ei te au tavini o te Atua e piri atu ki te angaanga temoni?



PATOI IA SATANI E TE AU TEMONI

- Takore i te au mea pouroa e ō maira te peu manamana, te au temoni, e te taangaanga i te mana o te au temoni
- Apii i te Pipiria
- Pure kia lehova

runga i te oa i mate me kore i te taeake e penei ka akatutu mai i tona reo. (1 Samuela 28:3-19) Manganui te au peu tanumanga tei akatumuia ki runga i te irinakianga e te ora maira tei mate i tetai ngai. Penei te ō maira te au peu tanumanga, au akamaaraanga, au atinga no tei mate, e no te apare. Me kare te Au Kite e piri ki teia au peu, penei ka akaapa e ka akakino to ratou kopu tangata e te oire tangata ia ratou e ka kopae ia ratou. Inara kua mārama te Au Kite e kare tei mate e ora ra i tetai ngai. Kare e rauka kia tuatua kia ratou, e kare e rauka ia ratou kia takino ia tatou. (Salamo 115:17) Kia matakite! Auraka rava e tuatua atu ki tei mate me kore ki te au temoni, auraka e piri ki te angaanga temoni.—**E tatau ia Deuteronomi 18:10, 11; Isaia 8:19.**

13 E akavare ana te au temoni i te tangata e e tamataku katoa ana ia ratou. Teia tuatau kua kite a Satani e tana au temoni e “e manga tuatau poto ua” to ratou i mua ake ka takore ei a Iehova ia ratou mei te enua, no reira pakari kino roa atu ta ratou au ravenga makitakita. (Apokalupo 12:12, 17) Inara, kare te manganui tei matakua ana i te au temoni, e matakua akaou ana ia ratou. Akapeea i kore ei to ratou matakua?

PATOI E KIA AKAATEA MAI MEI TE AU TEMONI

14 Akakite mai te Pipiria peea tatou me patoi i te au temoni e me akaatea mai. I piri ana tetai aronga i Ephe-sia ki te angaanga temoni i mua ake ka apii ei te tuatua

13. Te manganui o te tangata tei matakua ana i te au temoni, eaa tei rauka ia ratou i te rave i teianei?

14. Mei te au Kerititiano i te anere mataiti mua, akapeea tatou me akaatea takiri mai mei te au temoni?

mou. Peea i rauka ai ia ratou te akaatea mai? Akakite te Pipiria: “E manganui oki te aronga peu tu ke i apai mai i ta ratou au buka, kua tutungi iora i te ai ki mua i te aroaro o te tangata ravarai.” (Angaanga 19:19) Inangaro ratou kia riro ei au Kerititiano e kua takore i ta ratou au puka peu manamana. Kia pera katoa tatou i teia tuatau. Te aronga tei inangaro i te tavini ia Iehova, kia takore i te au mea e ō maira te au temoni. Te au puka, makatini, teata, imene, tarekareka, e te au tutu e turuturu ra i te angaanga manamana, te au temoni e te mana o te au temoni kia manakoia e kare e kino ana. Kapiti mai te au mea e aao ana te tangata ei paruru ia ratou mei te kino.—1 Korinetia 10:21.

15 Muri roa ake i te takore anga i ta ratou au puka peu manamana, tata a Paulo e ka **anoanoia rai** ratou kia “kukumi” koia oki kia tauta pakari i te patoi i “te au vaerua kikino i te reva.” (Ephesia 6:12) Noatu kua tungiia te au puka, te titau ra rai te au temoni te takino ia ratou. Eaa tetai ka anoanoia ratou kia rave? Akakite a Paulo: “E rave oki i te paruru ra i te akarongo, ei runga ravao ia, ko te mea e mate ei te au tao ai ravarai a te vaerua kino ra.” (Ephesia 6:16) Ka paruru te paruru tamaki i te vaeau kia kore e kino i roto i te tamaki, ka paruru katoa to tatou akarongo ia tatou. Me irinaki tikai tatou e ka paruru a Iehova ia tatou, ka rauka ia tatou te patoi ia Satani e tana au temoni.—Mataio 17:20.

16 Peea tatou me akamatutu i to tatou akarongo i

15. Eaa atu tetai ka anoanoia tatou kia rave i te patoi ia Satani e tana au temoni?

16. Akapeea tatou me akamatutu i to tatou akarongo i roto ia Iehova?

roto ia Iehova? Tatau i te Pipiria i te au rā, irinaki iaia kia paruru ia tatou. Me tinamou to tatou irinakianga i roto iaia, kare e rauka ia Satani e te au temoni i te takino ia tatou.—1 Ioane 5:5.

17 Eaa tetai ka anoanoia te au Kerititiano i Ephesia kia rave? Te noo ra ratou i roto i te oire akamorimori temoni. Akakite a Paulo: Kia “pure tukumoe kore.” (Ephesia 6:18) Kia pati ratou i ta Iehova paruruanga i te au taimē katoa. Peeā tatou? Te noo katoa nei tatou i roto i te ao kua ki i te au temoni. Kia pati tatou i ta Iehova paruruanga, e kia kapiki i tona ingoa me pure. (**E tatau ia Maseli 18:10.**) Me pati ua rai tatou ia Iehova kia akaora ia tatou mei ia Satani, ka pau mai Aia i ta tatou pure.—Salamo 145:19; Mataio 6:13.

18 Me takore tatou i te au mea e ō maira te angaanga temoni e me irinaki ia Iehova kia paruru ia tatou, ka rauka ia tatou te patoi ia Satani e te au temoni. Kare tatou e matakū ia ratou. (**E tatau ia Iakobo 4:7, 8.**) Ririnui atu a Iehova i te au temoni. Akautunga aia ia ratou i te tuatau o Noa, e ka takore aia ia ratou a te tuatau ki mua. (Iuda 6) Kare ko tatou ua te tamaki nei. Te paruru nei te au angera a Iehova ia tatou. (2 Ariki 6:15-17) Papu ia tatou e ka tauturu a Iehova ia tatou kia autu i te tamaki ia Satani e te au temoni.—1 Petero 5:6, 7; 2 Petero 2:9.

19 Me te maata roa nei te kino ta Satani e te au temoni e akatupu nei, eaa te Atua i kore e i takore ia ratou? Ka pauia teia uianga i te pene ka aru mai.

17. Eaa atu tetai ka paruru ia tatou mei te au temoni?

18, 19. (a) Akapeea tatou e autu e i te tamaki atu ia Satani e te au temoni? (e) Eaa te uianga ka pauia i roto i te pene ka aru mai?

TE TIKA 1

E TAMARIKI TE AU ANGERA NA TE ATUA

“E akameitaki ia Iehova, e te au angela nana e,
ko tei maata i te ririnui.”—Salamo 103:20

Eaa ta tatou i kite no runga i te au angera?

Iobu 38:4-7

Anga a Iehova i te au angera i
mua ake ka anga ai i te enua.

Apokalupo 5:11

Mirioni ua atu au angera.

1 Petero 1:11, 12

Inangaro te au angera kia kite
i to Iehova akakoroanga no te
enua.

Luka 15:10

Mea puapinga to te Atua au
tavini kia ratou.

TE TIKA 2

TAUTURU TE AU ANGERA I TO IEHOVA AU TAVINI

“Te patia nei te Angela a Iehova i te puakapa, e
pini ua ake te aronga i mataku iaia, e kua akaora
ia ratou.”—Salamo 34:7

Peea tatou i kite ei e ka rauka i te au angera te
tauturu i te tangata?

Genese 19:15, 16;

Daniela 6:22; Luka 22:43;

Angaanga 12:6-11

Tauturu te au angera ia Lota,
Daniela, Iesu, e Petero.

Ebera 1:7, 14

Tono mai a Iehova i tana
au angera kia tauturu e kia
paruru i tona au tavini.

TE TIKI 3**TITAU TE AU ANGERA KINO
TE TAKINO IA TATOU**

“Ko te rauka mai aea ta Satani ngai ia tatou:
kare oki tatou i te kite kore i tana au ravenga.”

—2 Korinetia 2:11

Koai ma te au temoni, eaa te kino ta ratou ka
akatupu kia tatou?

Apokalupo 12:9

Kua meameaau tetai angera
ia lehova. Ko Satani tona
ingoa.

Genese 6:2

I te tuatau o Noa kua
meameaau tetai au angera
e kua aere mai ki te enua nei.

Mataio 9:34

Kua piri taua au angera
kia Satani e kua riro mai ei au
temoni.

Deuteronomi 18:10, 11

Tukeke te ravenga a te au
temoni i te akavare e te takino
i te tangata.

TE TIKI 4**KA RAUKA IA KOE TE PATOI
IA SATANI E TE AU TEMONI**

“E patoi atu i te diabolo, e nana e rere ke atu.”

—Iakobo 4:7

Peea e rauka ai ia koe ta lehova tauturu kia patoi
ia Satani e te au temoni?

Angaanga 19:19

Takore i te au mea pouroa
e ō maira te peu temoni e
turuturu ra i te angaanga
manamana, e te au temoni,
kia manakoia e kare e kino
ana.

Ephesia 6:16, 18

Akamatutu i toou akarongo na
te apii anga i te Pipiria e te
pure no ta lehova paruruanga.

Maseli 18:10

Kapiki i te ingoa o lehova.

EAA TE TUMU I MAATA AI TE TAITAIA?

KUA pakokoia tetai oire e te ngaru akaki. Kua puipui-ia te tangata i ko i tetai are pure, maata tei mate e kua kino ua tetai pae. Kua mate tetai vaine i te maki *cancer*, e rima ana tamariki e ora nei.

² Me tupu tetai mea kino e te tumatetenga mei teia, e maata te ui ana e, “Eaa ra te tumu?” Eaa ra teia ao i ki ei te makitakita e te taitaia. Kare ainei koe e umere ana i teia?

³ Roto i te Pipiria, kua ui katoa te au tangata tiratiratu ki te Atua i teia au uianga. Ui te peroveta a Habakuka kia Iehova e: “Eaa ra oki koe i akakite mai ei iaku nei i te kino, akara ua’i koe i te mate nei? te vai nei oki te āru e te rave aroa kore ki mua iaku nei: e te vai nei oki te aronga e akatupu i te karo e te tauetono.”—Habakuka 1:3.

⁴ Roto ia Habakuka 2:2, 3, ka kite tatou i ta Iehova pauanga no te uianga a Habakuka e ta Iehova taputou kia akatikatika i taua au turanga ra. E aroa maata to Iehova i te tangata. Akakite te Pipiria e: “Koia oki te tiaki mai ia kotou.” (1 Petero 5:7) Mareka kore a Iehova i te tu taitaia. (Isaia 55:8, 9) Teianei ka uriuri tatou i te uianga, Eaa te tumu i maata ai te taitaia i teia ao?

1, 2. Eaa ta te manganui e ui ana?

3, 4. (a) Eaa te uianga ta Habakuka i ui? (e) Peea a Iehova i te pau mai anga iaia?

EAA TE TUMU I MAATA AI TE TAITAIA?

5 Karanga te au orometua e te au puapii akonoanga e ko to te Atua anoano rai ia, kia taitaia te tangata. Karanga tetai aronga e ko te au mea pouroa e tupu ana ki tetai tangata kapiti mai te au tumatetenga, kua akakoro ke ana te Atua i te reira, e kare roa tatou e mārama eaa te tumu. Tetai pae karanga ratou e te mate nei te tangata e te tamariki, kia rauka ia ratou te noo i te rangi e te Atua. Inara kare tera i te tika. Kare roa a Iehova e akatupu ana i te au mea kino. Akakite te Pipiria e: “Kia atea ke atu te tuatua kino i te Atua; e te ara i te Mana katoatoa.”—Iobu 34:10.

6 Manganui tei akaapa i te Atua no te turanga taitaia i teia ao. Manako ratou e ko te Atua te tutara o teia ao. Roto i te Pene 3 kua apii tatou e ko Satani te tutara o teia ao.

7 Akakite te Pipiria e “te vai ua nei rai to te ao rava-rai i raro ake i taua vaerua kino ra.” (1 Ioane 5:19) E taae kino tikai a Satani, te tutara o teia ao. Koia “tei pikikaa i to te ao katoatoa nei.” (Apokalupo 12:9) E manganui tei aite kiaia. Ko tetai tumu ua teia i ki ei teia ao i te pikikaa, makitakita e te takinga kino.

8 E au tumu ke atu rai tetai i maata ai te taitaia i teia ao. Muri ake i te meameaau, kua ĩri mai te ara a Adamu e Eva ki runga i ta raua tamariki. No te

5. Eaa ta te au puapii akonoanga i akakite no runga i te turanga taitaia? Eaa ra ta te Pipiria e apii maira?

6. No teaa te manganui i akaapa ai i te Atua no te turanga taitaia o teia ao?

7, 8. Eaa te tumu i maata ai te taitaia i teia ao?

ara, akatupu te tangata i te taitaia ki etai ke. Inangaro ratou te akaaere i etai ke e te kaitamaki atu, te tamaki e te rave kino i etai ke. (Koheleta 4:1; 8:9) Tetai taime e rokoia ana te tangata e te taitaia no te mea e tupu poitirere ua ana tetai au manamanata. (Koheleta 9:11) Penei aere ratou ki tetai ngai, tupu mai te manamanta kare i manakoia ana.

⁹ Kare roa a Iehova e akatupu i te taitaia. Kare nona te apa i tupu ei te tamaki, te aati ture e te takinga kino. Kare Nana e akatupu ana i te ngaruerue enua, te uriia e te vai puke. Penei ka ui koe e, 'Me ko Iehova tei ririnui rava atu i te ao nei, eaa aia i kore ei e takore i te au mea rikarika e tupu nei?' Kua kite tatou e e inangaro maata to Iehova ia tatou, no reira e tumu tau tetai i akatika ai aia i te taitaia.—1 Ioane 4:8.

TUMU I AKATIKA AI A IEHOVA I TE TAITAIA

¹⁰ I te aua i Edene, kua akavare te Tiaporo ia Adamu e Eva. Akaapa aia e e Tutara kino te Atua, e te uuna ra a Iehova i tetai apinga mei ia raua. Inangaro a Satani kia irinaki raua e koia te tutara meitaki atu ia Iehova e kare raua e anoano ia Iehova i roto i to raua oraanga.—Genese 3:2-5; akara i te Au Manako Poto 27.

¹¹ Akarongo kore a Adamu e Eva ia Iehova e kua meameaau iaia. Manako raua e, e tikaanga to raua kia iki eaa te mea tika e eaa te mea tarevake no raua. Aka-pee ra a Iehova me akapapu e kua tarevake raua e koia tei kite eaa te mea meitaki no raua?

9. Eaa tatou i papu ei e e tumu tau to Iehova i akatika ai kia tupu ua atu te taitaia?

10. Eaa te akaapaanga a Satani ia Iehova?

11. Eaa te uianga ka anoanoia kia pau tatou?

12 Kare a Iehova i takore ia Adamu e Eva i reira rai. Mari ra kua akatika aia ia raua kia anau tamariki. Akapapu a Iehova e kia rauka i ta raua tamariki i te iki e koai ta ratou ka inangaro ei tutara no ratou. To Iehova akakoroanga, kia akaki i te enua ki te au tangata apa kore, e ka tupu rai teia noatu eaa ta Satani ka rave. —Genese 1:28; Isaia 55:10, 11.

13 Akaapa a Satani ia Iehova i mua i te manotini o te au angera. (Iobu 38:7; Daniela 7:10) Kua oronga a Iehova i te tuatau no Satani kia akapapu e me e tika tana akaapaanga. Kua oronga katoa Aia i tetai tuatau no te tangata kia akanoo i to ratou uorai kavamani i raro i te tutara a Satani, ei akapapu e me ka puapingaia rai me kare te Atua e turu i te reira.

14 Tauatini ua atu mataiti te tutaraanga te tangata ia ratou rai e kare i puapingaia. Akapapu mai teia e e pikikaa a Satani. Ka **anoanoia** te tauturu a Iehova. Tika rai ta Ieremia e: “Kua kite oki au, e Iehova e, e kare tei te tangata uorai tona aerenga: kare tei te tangata e aere nei, i te akono i tona uorai takainga tapuae.”—Ieremia 10:23.

NO TEAA A IEHOVA I VAOO EI KIA ROA?

15 Eaa a Iehova i akatika ai kia roa te tuatau taitaia? Eaa aia i kore ei e takore i te au mea kino? Kua anoanoia tetai tuatau i te akapapu e kua puapinga

12, 13. (a) Eaa te tumu i kore ei a Iehova e takore i te aronga mea-meaa i reira rai? (e) Eaa te tumu i akatika ai a Iehova ia Satani kia tutara, e te tangata kia akatere ia ratou uorai?

14. Eaa ta te tuatau i aereia mai ana i akapapu mai?

15, 16. (a) No teaa a Iehova i akatika ai kia roa te tuatau o te taitaia? (e) No teaa a Iehova i kore ei akatikatika i te au manamanata ta Satani i akatupu?

kore ta Satani tutara. Akanoo te tangata i te au tu kavamani e kare i puapingaia. Noatu e maata to ratou mārama no te au apinga e ō maira te kite taieni, te tupu nei rai te tu akavaavaa, te ngere, te aati ture e te tamaki. Me kare a Iehova, puapinga kore ta tatou tutara.

16 Inara kare a Iehova i akatikatika i te manamana ta Satani i akatupu. Naringa aia i pera, tera te aiteanga te turu ra aia ia Satani. Kare rava a Iehova e akapera. Tetai, ka manako te tangata e ka rauka ia ratou te tutara ia ratou uaorai. Kare tera i te tika e kare katoa a Iehova e turu i te reira. Kare rava aia e pikikaa.—Ebera 6:18.

17 Ka rauka ainei ia Iehova te takore i te au kino ta Satani e te tangata i akatupu? Ae noatu eaa, ka rauka ia Iehova. Kua kite a Iehova eaa te taimē e pau pouroaia ai ta Satani au akaapaanga. I reira aia e akariro ei te enua ei parataito meī tana i akakoro. Te aronga pouroa i “roto i te rua” ka akatu akaouia. (Ioane 5: 28, 29) Kare e tangata e maki e e mate akaou. Ka takore a Iesu i te au kino pouroa ta Satani i akatupu. Akamana a Iehova ia Iesu “kia akakore aia i te angaanga a te diabolō.” (1 Ioane 3:8) Akameitaki tatou ia Iehova no te mea e akakoromaki tikai tona ia tatou, i te oronga mai i te tuatau kia rauka ia tatou te kite iaia, e kia iki me ka inangaro tatou iaia ei Tutara no tatou. (E tatau ia 2 Petero 3:9, 10.) E me taitaia tatou, ka tauturu mai aia kia rauka ia tatou te akakoromaki.—Ioane 4:23; e tatau ia 1 Korinetia 10:13.

17, 18. Eaa ta Iehova ka rave ki te au kino pouroa ta Satani i akatupu?

18 Kare a Iehova e māro ia tatou kia iki iaia ei Tutara no tatou. Oronga mai aia i te tikaanga kia iki tatou. Akara tatou i te puapinga o teia apinga aroa.

AKAPEEA KOE ME TAANGAANGA I TEIA APINGA AROA?

19 Tuke te tangata mei te manu, kua oronga mai a Iehova i te tikaanga no tatou kia iki, kare aia i pera i te manu. Ka rauka ia tatou kia iki me ka inangaro tatou i te tavini ia Iehova e me kare. (Deuteronomi 30:19) Kare tatou i aite mei te matini tei maani uaia kia rave i te angaanga i maaniia ai te reira kia rave. Ka rauka ia tatou kia iki i ta tatou ka inangaro, to tatou au oa e ta tatou ka inangaro i te rave ki to tatou oraanga. Inangaro a Iehova kia mataora tatou.

20 Inangaro a Iehova kia inangaro tatou iaia. (Mataio 22:37, 38) Mei te metua rai, me karanga mai tana tamaiti e “Inangaro au ia koe,” mareka aia me tuatua mai te tamaiti ma te ngakau tae no te mea kare aia i māroia ana. Oronga mai a Iehova i te tikaanga kia iki tatou me ka tavini iaia e me kare. Iki a Satani, Adamu e Eva kia patoi ia Iehova. Akapeea ra koe me taangaanga i teia apinga aroa?

21 Toou tikaanga kia iki, taangaanga i te reira ei tavini ia Iehova. Manganui tei iki kia akamareka ia Iehova e kua patoi ia Satani. (Maseli 27:11) Eaa taau ka rave i teianei kia tae ki roto i to Iehova ao ou me ta-kore aia i te au turanga taitaia? Ka pau te pene ka aru mai i teia uianga.

19. Eaa te apinga aroa ta Iehova i oronga mai no tatou? No teea tatou ka akaperepere ei i teia apinga aroa?

20, 21. Eaa te ikianga meitaki rava atu taau ka rave i teianei?

TE TIKA 1

KARE A IEHOVA E AKATUPU ANA I TE TAITAIA

“Kia atea ke atu te tuatua kino i te Atua; e te ara i te Mana katoatoa.”—Iobu 34:10

Eaa te tumu i maata ai te taitaia i teia ao?

1 Ioane 5:19

Ko Satani te tutara o teiane i ao.

Koheleta 8:9

Na te tangata e akatupu ana i te taitaia ki etai ke.

Koheleta 9:11

Tetai taime e tupu ana te

taitaia ki te tangata i te au ngai me kore i te au taime manako koreia.

1 Petero 5:7

Inangaro maata to Iehova i te tangata. Kare aia e mareka ana me rokoia ratou e te taitaia.

TE TIKA 2

AKAAPA A SATANI I TO IEHOVA TIKAANGA KIA TUTARA

“Kua kite oki te Atua e . . . ka puera ia to korua mata, e ka riro korua mei te Atua ra te tu, i te kite i te meitaki e te kino.”—Genese 3:5

Eaa te tumu i kore ei a Iehova e kopae i te akaapaanga a Satani?

Genese 3:2-5

Akaapa a Satani e e tutara kino te Atua. Inangaro a Satani kia manako te tangata e e tikaanga to ratou kia iki no ratou uaorai eaa te mea tika e eaa te mea tarevake.

Iobu 38:7

Akaapa a Satani ia Iehova i mua i te manotini o te au angera.

TE TIKI 3**PUAPINGA KORE TA
SATANI AKAAPAANGA**

“Kare tei te tangata e aere nei, i te akono i tona uaorai takainga tapuae.”—Jeremia 10:23

Eaa te tumu i roa ai te taitaia ua anga te tangata?

Isaia 55:9

Maata te au tu kavamani o te tangata, kare ra e rauka ia ratou te tutara i te enua me kare a lehova e turu i te reira.

2 Petero 3:9, 10

Akakoromaki maata to lehova

i te akatika i tetai tuatau no tatou kia kite e kia iki iaia ei Tutara no tatou.

1 Ioane 3:8

Akamana a lehova ia Iesu ei takore pouroa i te au kino ta Satani i akatupu.

TE TIKI 4**TAANGAANGA I TOOU
TIKAANGA KIA IKI EI
TAVINI IA IEHOVA**

“E taku tamaiti, kia pakari koe, . . . kia tika iaku kia patoi atu i tei akakino mai iaku nei.”—Maseli 27:11

Eaa te tumu i kore ei a lehova e māro ia tatou kia tavini iaia?

Deuteronomi 30:19

Oronga mai a lehova i te tikaanga no tatou kia iki, kare aia i pera i te manu. Ka rauka ia tatou kia iki me ka inangaro tatou i te tavini iaia e me kare.

Mataio 22:37, 38

Inangaro a lehova kia tavini tatou iaia no to tatou inangaro iaia.

AKAPEEA KOE RIRO EI EI OA NO TE ATUA?

KOAI taau ka inangaro ei oa noou? Tetai tangata e ma-reka ana koe. Kua matau koe iaia e kua matau aia ia koe. E tangata takinga meitaki, reka koe i tona au tu.

² Iki a Iehova i tetai au tangata ei oa nona. Ko Aberahama tetai oa o Iehova. (Isaia 41:8; Iakobo 2:23) Ma-reka katoa a Iehova ia Davida. Karanga aia ia Davida e ‘e tangata tau i toku ngakau.’ (Angaanga 13:22) Pera te peroveta a Daniela, “akaperepere maataia” aia e Iehova.—Daniela 9:23.

³ Akapeea a Aberahama, Davida, e Daniela i riro ei ei au oa no Iehova? Karanga a Iehova kia Aberahama: “Ko koe i akarongo mai i toku reo.” (Genese 22:18) Kua riro a Iehova ei oa no te aronga i akarongo kiaia e ka riro katoa aia ei oa no tetai iti tangata. Ki te iti tangata Ise-raela, akakite Aia: “Ka akarongo mai kotou i toku nei reo, ka riro ei au ei Atua no kotou, e ka riro ia kotou ei iti-tangata noku.” (Jeremia 7:23) Me inangaro koe kia riro ei oa no Iehova, akarongo kiaia.

PARURU A IEHOVA I TONA AU OA

⁴ Karanga te Pipiria e i “oronga mai aia [Iehova] i te maroiroi ki te aronga i tika te ngakau iaia.” (2 Paralei-

1, 2. Koai ma tetai au oa o Iehova?

3. Akapeea a Aberahama, Davida, e Daniela i riro ei ei au oa no Iehova?

4, 5. No teaa a Iehova i paruru ei i tona au oa?

pomeno 16:9) Roto ia Salamo 32:8, taputou mai a Iehova: “E apii atu au ia koe, e akakite atu ei kia koe i taau arataa kia aere ra; e ako atu au ia koe; ei runga ia koe toku mata vaoo ei.”

⁵ Te vai nei tetai enemi kare e inangaro kia riro tatou ei oa no Iehova. Inara inangaro a Iehova i te paruru ia tatou. (**E tatau ia Salamo 55:22.**) E au oa tatou no Iehova, ka tavini tatou iaia ma te ngakau katoa. Tiratira-tu tatou kiaia noatu eaa te tu. Aite to tatou irinakianga mei to te tata Salamo tei na ko e: “Tei toku rima katau aia [Iehova] kare au e ngaueue.” (Salamo 16:8; 63:8) Akapeea a Satani me arai ia tatou kia kore e riro ei oa no Iehova?

AKAAPAANGA A SATANI

⁶ I te Pene 11, kua apii tatou e kua akaapa a Satani ia Iehova i te pikikaa e te akavaavaa, e no te kare e akatika ia Adamu e Eva kia iki eaa te mea tika e eaa te mea tarevake no raua uorai. Apii mai te puka o Iobu e kua akaapa rai a Satani i te aronga tei inangaro kia riro ei oa no Iehova. Karanga aia e te tavini ua ra ratou ia Iehova no ta ratou ka rauka, e kare no to ratou inangaro iaia. Tuatua katoa a Satani e ka rauka iaia te akauri ke i **tetai ua atu** mei te Atua. Ka akara ana tatou eaa ta tatou ka mou mai mei ia Iobu, e ka akapeea a Iehova me paruru iaia.

⁷ Koai a Iobu? Kua noo ana a Iobu e 3,600 mataiti akenei e e tangata meitaki aia. Akakite a Iehova e i taua tuatau ra kare e tangata i aite mei ia Iobu i te enua nei.

6. Eaa ta Satani i karanga no runga i te tangata?

7, 8. (a) Eaa to Iehova manako no runga ia Iobu? (e) Eaa ta Satani i tuatua no runga ia Iobu?

Akangateitei aia i te Atua, mea rikarika nana te kino. (Iobu 1:8) Ae, e oa tikai a Iobu no Iehova.

8 Karanga a Satani e te tavini ua ra a Iobu i te Atua no tana ka rauka. Karanga aia kia Iehova e: “Kare ainei tei koropiniia aia e koe, e tona ra are, e tana katoa ra au mea ravarai e pini ua ake? kua akameitaki koe i ta tona rima i rave ra, e kua maata tana apinga i te enua nei. Ka akatika ua atura koe i to rima i tenana, ka rave atu ei i tana e kia ope rava, kare aia e kore i te akakino ia koe ki mua i to mata.”—Iobu 1:10, 11.

9 Akaapa a Satani ia Iobu e te tavini ra aia ia Iehova no tana ua ka rauka. Karanga katoa a Satani e ka rauka iaia te māro ia Iobu kia akamutu i te tavini ia Iehova. I reira kua tuku a Iehova ia Satani kia timata ia Iobu ei akapapu e me e inangaro tikai to Iobu ia Iehova i riro ei aia ei oa Nona.

TAKINOKINO A SATANI IA IOBU

10 Mea mua, kua keia a Satani e kua ta i te au manu a Iobu. E oti tamate aia i te au tavini o Iobu. Pou ta Iobu au apinga ravarai. I te openga, tamate a Satani i te tai ngauru tamariki a Iobu. Kua vai tiratiratu rai a Iobu kia Iehova. “Kare a Iobu i araia i taua au mea katoa nei, e kare oki i akaapa i te Atua.”—Iobu 1:12-19, 22.

11 Kare a Satani i tuku ana i te au. Kua akakoko aia i te Atua i te na ko anga: “Ka rave atu ei i tona ivi e tona kiko, kare aia e kore i te akakino ia koe ki mua i to mata.” Tamamae aia ia Iobu ki te maki ee inara kua vai

9. Eaa ta Iehova i akatika ia Satani kia rave?

10. Akapeea a Satani te takinokino anga ia Iobu, e i akapeea ra a Iobu?

11. (a) Eaa atu ta Satani au mea i rave kia Iobu? (e) I akapeea ra a Iobu?

tiratiratu rai a Iobu. (Iobu 2:5, 7) Akakite aia: “E mate ua atu au, kare rai au e pa i te tuatua-tika naku.”—Iobu 27:5.

¹² Kare roa a Iobu i kite ana i teia au akaapaanga a Satani e te tumu i rokoia ai aia e te taitaia. Manako aia e na Iehova i akatupu i tona au manamanata. (Iobu 6:4; 16:11-14) Noatu rai kua vai tiratiratu ua a Iobu kia Iehova. Papu tikai i teianei e kare a Iobu e manako ana iaia uaorai. Inangaro aia i te Atua no te mea e oa aia nona. E pikikaa ua rai ta Satani au akaapaanga!

¹³ Noatu kare a Iobu i kite eaa te tupu ra i runga i te rangi, kua vai tiratiratu rai aia ki te Atua e kua akapapu mai e e tiaporo tikai a Satani. Kua akameitaki a Iehova ia Iobu no te mea e oa tiratiratu tikai aia.—Iobu 42:12-17.

AKAAPA A SATANI IA KOE

¹⁴ Apiianga puapinga taau ka mou mai mei tei tupu kia Iobu. Teia tuatau kua akaapa a Satani e te tavini ua nei tatou ia Iehova no ta tatou ka rauka mai mei Iaia. Roto ia Iobu 2:4, karanga a Satani: “E riro oki ta **te tangata** katoa ra ei oko i tona ora.” Akaapa a Satani i te au tane e te au vaine **pouroa**, kare ko Iobu ua. Anere ua atu mataiti i muri ake te mate o Iobu, te akakino nei rai a Satani ia Iehova e te akaapa nei i tona au tavini. Roto ia Maseli 27:11, ka tatau tatou: “E taku tamaiti, kia pakari koe, kia rekareka toku ngakau, kia tika iaku kia patoi atu i tei akakino mai iaku nei.”

¹⁵ Ka rauka ia koe te iki kia akarongo kia Iehova e kia

12. Akapeea a Iobu i te akapapuanga e e pikikaa ua rai a Satani?

13. Eaa tei tupu no to Iobu tu tiratiratu?

14, 15. Eaa ta Satani akaapaanga i te au tane e te au vaine pouroa?



Akameitaki a lehoval
i tona oa tiratiratu ia lobu

riro ei oa tiratiratu nona i te akapapu e ko Satani te pikikaa. Me ka anoanoia te au tauia maata i roto i toou oraanga kia riro ei oa no Iehova, ko te ikianga meitaki rava atu ia! E mea puapinga tikai teia ikianga. Karanga a Satani e kare koe e vai tiratiratu me rokoia e te manamanata. Titau aia i te akavare ia tatou kia tiratiratu kore ki te Atua. Akapeea ra?

16 Tuke tuke ta Satani au ravenga ei arai ia tatou kia kore e riro ei au oa no Iehova. “Mei te liona ngunguru” rai aia “i te kimi anga i te tangata e pou iaia.” (1 Petero 5:8) No reira eiaa e poitirere me tamanamanata toou au oa, kopu tangata e etai atu i taau apii Pipiria. Penei ka manako koe e te ririi nei koe.* (Ioane 15:19, 20) E akatutu katoa ana a Satani iaia ei ‘angera no te mārama.’ Penei e ka akavare aia ia tatou kia akarongo kore ia Iehova. (2 Korinetia 11:14) Tetai ravenga e taangaanga ana a Satani koia oki, kia akavare ia tatou kia manako e kare tatou e tau kia tavini ia Iehova.—Maseli 24:10.

AKONO I TA IEHOVA AU AKAUENGA

17 Me akarongo tatou ia Iehova, te akapapu maira tera e e pikikaa a Satani. Eaa te ka tauturu ia tatou kia akarongo? Akakite te Pipiria: “E inangaro atu koe i to Atua ia Iehova ma to ngakau katoa, e ma to vaerua

* Kare mei te mea e na Satani e akaaere ana i te au tangata e arai ia koe kia kore e apii i te Pipiria. Inara ko Satani “te atua o teia nei ao” e te “vai ua nei rai to te ao ravarai i raro ake i taua vaerua kino ra.” No reira kare i te mea poitirere me arai tetai aranga ia koe i te tavini ia Iehova.—2 Korinetia 4:4; 1 Ioane 5:19.

16. (a) Eaa te au ravenga e taangaanga ana a Satani ei arai te tangata kia kore e tavini ia Iehova? (e) Eaa tetai ravenga ke a te Tia-poro ei arai ia koe uaorai kia kore e tavini ia Iehova?

17. Eaa te tumu i akarongo ei tatou ia Iehova?

katoa, e ma to maroiroi katoa.” (Deuteronomi 6:5) Akarongo tatou ia Iehova no to tatou inangaro iaia e ka rave tatou i te au mea ravarai tana i pati mai ia tatou kia rave. Tata a Ioane: “Teia oki te inangaro i te Atua, ko te akono i tana au akauenga; kare oki tana au akauenga i te mea teiaa.”—1 Ioane 5:3.

18 Eaa tetai au mea e akakite maira a Iehova e e tarevake? Tetai au akaraanga tei roto i te pia, “Rikarika i ta Iehova e Rikarika Ra.” I te akamataanga penei ka manako koe e kare ua e kino ana teia au mea. Inara me tatau koe i te au irava e me akamanako meitaki i te reira, ka mārama i reira koe i te puapinga o te akarongo i te ture a Iehova. Penei ka anoanoia tetai au tauiana i roto i toou oraanga noatu ka ngatā i tetai au taimē. Me

18, 19. (a) Eaa tetai au mea e akakite maira a Iehova e e tarevake? (e) Peea tatou i kite ei e kare a Iehova e pati maira kia rave tatou i tetai mea kare e rauka ia tatou?

RIKARIKA I TA IEHOVA E RIKARIKA RA

- **Ta tangata**
Exodo 20:13; 21:22, 23
- **Au peu viivii o te ainga**
Levitiku 20:10, 13, 15, 16;
Roma 1:24, 26, 27, 32;
1 Korinetia 6:9, 10
- **Angaanga temoni**
Deuteronomi 18:9-13;
1 Korinetia 10:21, 22;
Galatia 5:20, 21
- **Akamori itoro**
1 Korinetia 10:14
- **Konā kava**
1 Korinetia 5:11
- **Keikeia**
Levitiku 6:2, 4;
Ephesia 4:28
- **Pikikaa**
Maseli 6:16, 19;
Kolosa 3:9;
Apokalupo 22:15
- **Noinoi**
1 Korinetia 5:11

rave koe i te reira ka rauka ia koe te au e te mataora no toou tiratiratu kia Iehova ei oa nona. (Isaia 48:17, 18) Akapeea tatou i kite ei e ka rauka i te rave i teia au tauiananga?

19 Kare roa a Iehova e pati mai kia rave tatou i tetai mea kare e rauka ia tatou. (Deuteronomi 30:11-14) Ei Oa mou, kua kite a Iehova i to tatou tu, to tatou au tu meitaki e to tatou au tu paruparu. (Salamo 103:14) Akamaroiroi maira a Paulo ia tatou: “E tuatua-mou ra ta te Atua, e kare aia e vaoo ia kotou kia timataia, mari ra ko te tika ia kotou kia akakoromaki ra; e akatupu katoa aia i te akapuanga i taua timataanga ra, kia tika ia kotou kia akakoromaki.” (1 Korinetia 10:13) Kia papu ia tatou e ka oronga ua mai rai a Iehova i te maroiroi kia rave tatou i te mea tau. Ka oronga mai aia i “te mana maata meitaki” ei tauturu ia koe kia akakoromaki i te au turanga ngatā. (2 Korinetia 4:7) Muri ake i

- **Takinga kino**
Salamo 11:5; Maseli 22:24, 25; Malaki 2:16; Galatia 5:20, 21
- **Tuatua viivii**
Levitiku 19:16; Ephesia 5:4; Kolosa 3:8
- **Aati i te ture no te toto**
Genese 9:4; Angaanga 15:20, 28, 29
- **Kopae i te utuutu i toou ngutuare**
1 Timoteo 5:8
- **Piri ki te tamaki e te poritiki**
Isaia 2:4; Ioane 6:15; 17:16
- **Kai avaava e te kai apinga akakona**
Mareko 15:23; 2 Korinetia 7:1

te kite anga i ta Iehova tauturu, karanga a Paulo: “E tika iaku te au mea ravarai nei i te Mesia, ko tei akamaroi-roi mai iaku nei.”—Philipi 4:13.

INANGARO I TA IEHOVA E INANGARO RA

20 Me ka inangaro tatou kia riro ei oa no Iehova, au-raka tatou e rave i ta Iehova e karanga maira e e tarevake. (Roma 12:9) Inangaro to Iehova au oa i tana e inangaro ra. Te akamārama maira a **Salamo 15:1-5** no runga ia ratou. (**E tatau.**) Ka aru to Iehova au oa i tona au tu e ka akaari i ‘te inangaro, te rekareka, te au, te akakoromaki, te takinga-meitaki, te meitaki, te pikikaa kore, te maru, te akono meitaki.’—Galatia 5:22, 23.

21 Peea koe e kite ei ka akapeea me akaari i tera au tu manea? Tatau e te apii putuputu i te Pipiria kia kite koe eaa ta Iehova e inangaro ra. (Isaia 30:20, 21) Me akapera koe ka ketaketa atu toou inangaro no Iehova e ka inangaro koe i te akarongo iaia.

22 Te au tauianza ka anoanoia koe kia rave i roto i toou oraanga, ka tau kia akaaiteia ki te kiritianga i te kakau taito e te aao anga i te mea ou. Karanga te Pipiria e ka anoanoia kia ‘kopae kotou i te tangata taito’ e kia “akatangata ou” ia kotou. (Kolosa 3:9, 10) Noatu kare i te mea māmā, me rave tatou e me akarongo ia Iehova, ka oronga mai aia i te “tutaki maata.” (Salamo 19:11) E akarongo ia Iehova ei akapapu e ko Satani te pikikaa. Tavini ia Iehova ma te inangaro pikikaa kore. Ka riro ia koe ei oa mou tikai no Iehova!

20. Eaa te au tu ka tau koe kia aru, eaa te tumu?

21. Peea koe kite ei ka akapeea me akaari i te au tu ta Iehova e inangaro ra?

22. Eaa te ka tupu me akarongo koe ia Iehova?

TE TIKA 1

AKARONGO TO IEHOVA AU OA IAIA

“Ka akarongo mai kotou i toku nei reo, ka riro ei au ei Atua no kotou, e ka riro ia kotou ei iti-tangata noku.”—Ieremia 7:23

Ka rauka ainei kia riro ei oa no te Atua?

Genese 22:18; Iakobo 2:23

Riro a Aberahama ei oa no Iehova no te mea kua akarongo aia i te Atua e kua tuku i tona akarongo ki roto iaia.

2 Paraleipomeno 16:9

Ka tauturu a Iehova i te aronga i akarongo kiaia.

Salamo 25:14; 32:8

Apii a Iehova i tona arataa ki tona au oa.

Salamo 55:22

Turuturu a Iehova i tona au oa.

TE TIKA 2

E OA A IOBU NO IEHOVA E KUA VAI TIRATIRATU UA AIA

“Kare a Iobu i araia i taua au mea katoa nei, e kare oki i akaapa i te Atua.”—Iobu 1:22

Peea a Satani te takinokino anga ia Iobu, i akapeea ra a Iobu?

Iobu 1:10, 11

Karanga a Satani e te tavini ua ra a Iobu ia Iehova no tana ka rauka kare no te inangaro ia Iehova.

Iobu 1:12-19; 2:7

Akatika a Iehova ia Satani kia rave pouroa i ta Iobu au

apinga, e kua tamamae atura a Satani ia Iobu ki te maki ee.

Iobu 27:5

Kare a Iobu i kite eaa te tumu i rokoia ai aia e te taitaia, inara kua vai tiratiratu rai aia.

TE TIKA 3**TITAU A SATANI TE AKAURI
KE IA KOE MEI IA IEHOVA**

“E riro oki ta te tangata katoa ra ei oko i tona ora.”
—Iobu 2:4

Akapeea a Satani i te titau anga kia takore i to
tatou pirianga oa kia Iehova?

2 Korinetia 11:14

Titau a Satani i te akavare
ia tatou kia akarongo kore ia
Iehova.

Maseli 24:10

Akavare aia ia tatou kia
manako e kare tatou e tau kia
tavini ia Iehova.

1 Petero 5:8

Takinokino a Satani ia tatou.

Maseli 27:11

Akarongo ia Iehova,
e kia riro ei oa tiratiratu nona.
Ka akapapu mai teia e ko
Satani te pikikaa.

TE TIKA 4**AKARONGO TATOU IA
IEHOVA NO TO TATOU
INANGARO IAIA**

“Teia oki te inangaro i te Atua, ko te akono i tana
au akauenga.”—1 Ioane 5:3

Akapeea tatou e riro ei ei oa no Iehova?

Deuteronomi 6:5

Inangaro ia Iehova.
Ka tauturu teia ia koe kia
akarongo iaia.

Isaia 48:17, 18

Akarongo ia Iehova e ka
puapinga ua rai koe.

Deuteronomi 30:11-14

Kia irinaki e kare roa a Iehova
e pati mai ia koe kia rave i
tetai mea kare e rauka ia koe.

Philipi 4:13

Rave i te mea tau, e ka oronga
mai a Iehova i te maroiroi.

AKANGATEITEI I TE APINGA AROA O TE ORAANGA

KO IEHOVA “te Atua ora.” (Jeremia 10:10) Nana tatou i Anga e i oronga mai i to tatou ora. Akakite te Pipiria: “Naau oki i anga i te au mea ravarai nei, e no toou inangaro i mou ei e i angaia’i ratou.” (Apokalupo 4:11) Inangaro a Iehova kia rauka ia tatou te ora. E apinga aroa te ora no ko Iaia.—E tatau ia Salamo 36:9.

² Oronga mai a Iehova i te au mea tei anoanoia kia ora tatou, mei te vai e te kai te tu. (Angaanga 17:28) Inangaro aia kia mataora tatou. (Angaanga 14:15-17) Kia puapingaia te oraanga, ka anoanoia tatou kia akono i tana au ture.—Isaia 48:17, 18.

TO IEHOVA MANAKO NO RUNGA I TE ORAANGA

³ Apii mai te Pipiria e e mea akaperepere na Iehova to tatou oraanga e to etai ke. Ei akaraanga, kua riri a Kaina—te tamaiti a Adamu e Eva—i tona teina ia Abela. Akamatakite a Iehova iaia kia akakore i tona riri. Kare aia i akarongo, kua ootoo rava akera tona riri e “tei runga mairā Kaina i tona teina ia Abela, e kua tamate takiri iora iaia.” (Genese 4:3-8) Akautunga a Iehova ia Kaina no tei tamate ia Abela. (Genese 4:9-11) Ko te riri e te makitakita, ka akanauru te reira ia tatou kia tā e kia takinga kino. Te tangata mei te reira te tu, kare ona

1. Naai i oronga mai te ora?
2. Akapeea e puapingaia ai to tatou oraanga?
3. Eaa ta Iehova i rave te tamate anga a Kaina ia Abela?

APINGA AKAPEREPERE MAATA TE ORAANGA



- Kare tatou e tamate i te pepe kare i anauia ake

- Kare tatou e kai avaava, kare e kai apinga akakona mei te maruana



- Kare tatou e makitakita i te au tangata ke



ora mutukore. (E tatau ia 1 Ioane 3:15.) E mareka ai a Iehova, ka anoanoia tatou kia aroa i te tangata ravarai. —1 Ioane 3:11, 12.

⁴ Tauatini ua atu mataiti i muri mai, akaari a Iehova na roto i te Ture Ngauru kia Mose e, e mea akaperepere nana te oraanga. Tetai ture: “Auraka rava koe e ta ua.” (Deuteronomi 5:17) Me kua akakoro tikai tetai tangata i te tā i tetai kia mate, ka tamateia aia.

⁵ Eaa to Iehova manako no runga i te titiri pepe? Akaperepere a Iehova i te oraanga o te pepe kare i anauia ake. Roto i te Ture a Iehova ki to Iseraela me tupu te pekapeka e me tukia tetai vaine nui e mate iora tana pepe, ka tamateia te tangata nana i rave i te reira. (E tatau ia Exodo 21:22, 23; Salamo 127:3.) Na teia i apii mai e e tarevake te titiri pepe.—Akara i te Au Manako Poto 28.

⁶ Peea tatou me akaari kia Iehova e e mea akaperepere na tatou to tatou uaorai oraanga e to etai ke? Ka patoi tatou i tetai ua atu mea te ka takino i te oraanga. Kare tatou e kai i te avaava e te au apinga akakona mei te maruana. Ka kino te oraanga e penei ka mate tatou.

⁷ Na Iehova i oronga mai i to tatou oraanga, kia taangaanga tatou i te reira mei tana i inangaro. No reira e akono meitaki i to tatou kopapa. Me kare tatou e akono, ka viivii to tatou turanga i mua Iaia. (Roma 6:19; 12:1; 2 Korinetia 7:1) Kare e tau kia akamori tatou ia Iehova me kare tatou e akaperepere i to tatou

4. Eaa ta tetai ture a Iehova i oronga ki to Iseraela, e apii maira ia tatou no te apinga aroa o te oraanga?

5. Eaa to Iehova manako no runga i te titiri pepe?

6, 7. Akapeea tatou me akaari kia Iehova e e apinga akaperepere te oraanga kia tatou?

oraanga. Noatu ka ngatā i te akakore i te au peu viivii, ka tauturu mai a Iehova no te mea e apinga akaperepere na tatou te oraanga.

8 Kua apii tatou e e apinga aroa te oraanga. Irinaki a Iehova ia tatou kia paruru i to tatou oraanga e to etai ke. Ei akaraanga, me akaoro i to tatou motoka, patikara matini e te vai atura. Ka kopae tatou i te au tarekareka te ka akatupu i te kino e te tā ua. (Salamo 11:5) Akapapu tatou e kia meitaki ua to tatou kainga kia kore tetai e rokoia e te tumatetenga me atoro mai. Akaue a Iehova i to Iseraela: “Kia patu koe i te are ou ra, ei paruru taau e anga no rungao, ko te taka mai aea tetai tangata ki raro, ko te viivii aea to are ia koe i te toto.”—Deuteronomi 22:8.

9 E mea puapinga kia Iehova to tatou tu ki te manu. Akatika aia ia tatou kia tā i te manu ei kai, e kia tā i tetai manu me tā mai te reira ia tatou. (Genese 3:21; 9:3; Exodo 21:28) Kare ra tatou e takinga kino e e tā ua i te manu ei tarekareka ia tatou.—Maseli 12:10.

AKANGATEITEI TE TU TAPU O TE ORAANGA

10 E apinga tapu te toto kia Iehova no te mea e ora to roto i te toto. To Kaina tā anga ia Abela, akakite a Iehova kiaia: “Te kapiki maira te reo o te toto o toou teina kiaku, mei te one maira.” (Genese 4:10) Tei roto i te toto o Abela tona ora, e kua akautunga a Iehova ia Kaina no tei tā ia Abela. Muri ake i te vai puke i te tua-tau o Noa, akamaara akaou mai a Iehova e tei roto te

8. Eaa ta tatou ka rave kia akapapu e kare tatou e takino i to tatou uaorai oraanga e to etai ke?

9. Mei teaa ra to tatou tu ki te manu?

10. Akapeea tatou i kite ei e e ora to roto i te toto?

ora i te toto. Oronga a Iehova i te tikaanga kia Noa e tona ngutuare kia kai i te kiko manu. Akakite aia: “Te au mea ora katoa e aere nei, ei kai ia na kotou; mei te au rakau mata katoa ra, kua oronga katoaia atu e au na kotou.” Okotai ra apinga ta Iehova i akaue ia ratou auraka e kai: “Ko te kiko ra ma te ora katoa i roto, koia te toto ra, auraka kotou e kai.”—Genese 1:29; 9:3, 4.

¹¹ Mei te 800 mataiti i muri ake i to Iehova akaue anga ia Noa auraka e kai i te toto, kua akaue akaou Aia i tona iti tangata: “To te tamariki oki a Iseraela, e to te au tangata ke e tuitarere i roto ia ratou, kia arumaki i te puaka e te manu i tika kia kai ra, e rauka iora; ka akata’e aia i tona toto ki raro, ka tapoki ei ki te one.” E oti akakite aia: “Auraka kotou e kai i te toto.” (Levitiku 17: 13, 14) Te inangaro nei rai a Iehova i tona iti tangata kia akatapu i te toto. Ka kai ratou i te kiko manu eiaa ra te toto. Me tā ratou i te manu ei kai, kia riringi ratou i te toto ki roto i te one.

¹² Te au mataiti i muri ake i te mate o Iesu, uipa te au apotetoro e te aronga pakari o te putuputuanga Kerititiano i Ierusalemia i te akapapu e ko teea tuanga o te Ture ki to Iseraela, ta te au Kerititiano ka akono. (E tatau ia Angaanga 15:28, 29; 21:25.) Tauturu a Iehova ia ratou kia mārama e e mea akaperepere nana te toto e ka anoania ratou kia akatapu i te reira. Kare te au Kerititiano e kai, kare e inu e kare e kai i te kiko tei kore i akataeia te toto. Me pera ratou kua aite rai te reira ki te akamori itoro e te akaturi. Mei reira mai, patoi pakari te au Kerititiano mou i te kai e te inu i te

11. Eaa te akauenga no te toto ta Iehova i oronga ki te iti tangata Iseraela?

12. Eaa te manako o te au Kerititiano no runga i te toto?

toto. Peea i teia tuatau? Te inangaro nei rai a Iehova ia tatou kia akatapu i te toto.

13 Ka patoi ainei i reira te au Kerititiano i te pamu toto? Ae. Kua akaue mai a Iehova auraka e kai me kore e inu i te toto. Me akakite atu te taote e auraka koe e inu i te kava, ka pamu ainei koe i te reira ki roto i toou kopapa? Kare! Mei te akauenga rai e eiaa e kai e eiaa e inu i te toto. Tera te aiteanga kare tatou e āriki i te pamu toto.—Akara i te Au Manako Poto 29.

14 Peea me akakite mai te taote e ka mate tatou me kare e pamu toto? Na tatou uaorai e iki e me ka akono i te ture a te Atua no runga i te toto. Akangateitei te au Kerititiano i te apinga aroa o te ora. Ka kimi tatou i tetai au ravenga ke kia ora, inara kare tatou e āriki i te pamu toto.

15 Tauta tatou kia akono i te kopapa, e kare e āriki i te pamu toto no te mea e apinga akaperepere te oraanga na Iehova. Puapinga atu te akarongo kia Iehova i to te umuumu kia akaroa atu i te oraanga na te akarongo kore anga Iaia. Karanga a Iesu: “Ko tei umuumu atu i tona uaorai ora, ka ngere ĩa i te ora: ko tei kopae ra i tona ora iaku nei, e rauka iaia te ora.” (Mataio 16:25) Akarongo tatou kia Iehova no to tatou inangaro iaia. Koia tei kite eaa te mea meitaki no tatou. Mea akaperepere e te tapu te oraanga kia tatou e kia Iehova katoa.—Ebera 11:6.

16 Kua akakoro rai to Iehova au tavini tiratiratu kia

13. Eaa te tumu kare te au Kerititiano e āriki i te pamu toto?

14, 15. Eaa i puapinga ai kia akangateitei te Kerititiano i te oraanga e kia akarongo kia Iehova?

16. Eaa ra te au tavini o te Atua ka akarongo ei kiaia?

akarongo i tana ture no te toto. Kare ratou e kai e kare e inu i te toto, e kare e āriki i te toto ei rapakau i to ratou maki.* Ka āriki ra ratou i tetai au rapakauanga ke mai kia ora to ratou maki. Irinaki pu tikai ratou e ko Iehova tei kite atu eaa te mea meitaki no te mea, Nana i Anga i te oraanga e te toto. Te irinaki ra ainei koe e Koia ua tei kite eaa te mea meitaki rava atu noou?

E TAI UA AKAKOROANGA TA IEHOVA I AKATIKA KIA TAANGAANGAIA TE TOTO

17 Roto i te Ture a Mose, akakite a Iehova ki to Iseraela: “Tei te toto oki te ora e ora’i te au mea katoa ra; i akono ei au i te reira e ko ta kotou ia e apai ki runga i te atarau, ei tapokiangaara na kotou uaorai: Ko te toto oki tei riro ei tapokiangaara.” (Levitiku 17:11) Me ara ratou, ka rauka ia ratou te pati kia akakore mai a Iehova i ta ratou ara na roto i te atinga manu. Kia riringi te taunga i te toto ki runga i te atarau i ko i te iero. Te mea okotai ua teia ta Iehova i akatika kia taangaanga to Iseraela i te toto.

18 Ia Iesu i te enua nei, oronga aia i tona oraanga ei mono i te ture o te atinga manu ei akakore i ta tatou ara. (Mataio 20:28; Ebera 10:1) Muri ake te akatu akaou anga ia Iesu ki te rangi, oronga a Iehova i te tikaanga no te tangata ravarai kia ora e mutukore ua atu. —Ioane 3:16; Ebera 9:11, 12; 1 Petero 1:18, 19.

* No runga i te pamu toto, akara i te kapi 87-89 o te puka “*Kia Noo Tamou Kotou i Roto i te Aroa o te Atua,*” tei neneia e te Au Kite o Iehova.

17. I Iseraela, eaa te mea okotai ta Iehova i akatika kia taangaangaia te toto?

18. Eaa ta te atinga a Iesu i akatuera mai no tatou?



Akapeea koe me akaari i te tu akangateitei no te oraanga e te toto?

19 Akameitaki tatou ia Iehova no tana apinga aroa! Inangaro tatou kia kite te tangata e me akarongo ratou ia Iesu, ka rauka te ora mutukore. No to tatou inangaro i te tangata, apii tatou ia ratou kia rauka te ora. (Ezekiela 3:17-21) Ka tau i reira tatou kia karanga e: “Kare rava oku viivii i te toto o te tangata katoa nei. Kare rava akenei au i uuna, kua akakite ua atu oki au kia kotou i te anoano katoa o te Atua.” (Angaanga 20: 26, 27) Akaperepere a Iehova i te oraanga. Me akakite aere tatou no runga Iaia, te akangateitei ra tatou i te oraanga e te toto.

19. Eaa ta tatou ka rave kia kore e “viivii i te toto o te tangata katoa nei”?

TE TIKA 1

AKANGATEITEI I TE APINGA AROA O TE ORAANGA

“Tei ia koe oki te tumu o te ora.”—Salamo 36:9

Akapeea tatou me akaari e te akangateitei ra tatou i te oraanga?

Angaanga 17:28;

Apokalupo 4:11

E apinga aroa te oraanga na lehova, e akangateitei tatou i te reira.

Exodo 21:22, 23;

Deuteronomi 5:17

E tarevake te tā tangata e te akatupu i te mate o tetai pepe kare i anauia ake.

1 Ioane 3:11, 12, 15

E tarevake te tu makitakita.

2 Korinetia 7:1

Kopae i te au peu viivii mei te kai avaava e te kai apinga akakona.

Salamo 11:5

Kopae i te tamataora e te tarekareka te ka akatupu i te tā ua.

TE TIKA 2

ORAANGA E TE TOTO

“Tei te toto oki te ora o te au mea katoa nei; ko to ratou ĩa ora.”—Levitiku 17:14

Eaa to lehova manako no te oraanga e te toto?

Genese 4:10;

Deuteronomi 12:23

E ora to roto i te toto.

Genese 9:3, 4

Ka kai tatou i te kiko eiaa ra te toto.

Angaanga 15:28, 29; 21:25

Ta lehova akauenga auraka

e kai i te toto, ka ō mai te taangaanga anga i te toto ei rapakau maki.

Ebera 11:6

To tatou pirianga kia lehova te apinga puapinga roa atu i te oraanga.

TE TIKA 3

TE AU MEA TA IEHOVA I AKATIKA KIA TAANGAANGAIA TE TOTO

“Te mā nei tatou i ta tatou au ara ravarai i te toto o . . . Iesu Mesia.”—1 Ioane 1:7

Eaa ta te atinga a Iesu i rave no tatou?

Levitiku 17:11

Te tuatau Pipiria, me ara to Iseraela, ka pati ratou kia akakore a Iehova i ta ratou ara na roto i te atinga manu e ka riringi te taunga i tetai pae o te toto ki runga i te atarau.

Mataio 20:28;**Ebera 9:11-14**

Te aerenga mai a Iesu ki te enua, mono aia i te ture o te atinga manu ki tona uaorai oraanga koia oki tona toto, kia kore ta tatou ara.

Ioane 3:16

E mea akaperepere maataia to Iesu oraanga. No reira i muri ake i te akatu akaou anga iaia ki te rangi, kua oronga a Iehova i te tikaanga no te aronga tei akarongo iaia kia rauka te ora mutukore.

KA MATAORA TOOU NGUTUARE TANGATA

NA TE Atua na Iehova i akatumu i te akaipoipo mua. Akakite te Pipiria e kua anga aia i te vaine mua “e kua arataki maira aia iaia kia Adamu.” Mataora tikai a Adamu e kua na ko akera e: “I teiane e ivi teia no toku nei ivi, e kiko oki no toku nei kiko.” (Genese 2:22, 23) Na teia i akakite mai e te inangaro ra a Iehova i te au tokorua akaipoipo kia mataora.

² Te mea taitaia, e maata te tangata kare ratou i kite ana e mei teaa te tu o te oraanga ngutuare mataora. Inara e maata te au kaveinga Pipiria te ka tauturu i te ngutuare tangata kia meitaki e kia mataora te oraanga.—Luka 11:28.

TA IEHOVA E TAPAPA MAIRA MEI TE AU TANE

³ Akakite te Pipiria e ko te tane meitaki, ka akaperepere aia i tana vaine e ka akangateitei iaia. E **tatau ia Ephesia 5:25-29**. Ka takinga meitaki ua rai te tane i tana vaine. Ka paruru e ka akono ua rai iaia, e kare roa aia e rave i tetai mea te ka tamamae i tana vaine.

⁴ Ka akapeea te tane me tarevake tana vaine? Kua akakiteia ki te au tane: “E aroa kotou i ta kotou au vaine ra, auraka e rotoriri atu ia ratou.” (Kolosa 3:19) E te au tane, e akamaara e e tarevake ana rai kotou.

1, 2. Eaa ta Iehova e inangaro ra no te au ngutuare tangata?

3, 4. (a) Mei teaa tikai te tu o te tane ki tana vaine? (e) Eaa i puapinga ai kia akakore te tane e te vaine i te apa o tetai e tetai?

Me ka inangaro koe kia akakore a Iehova i taau apa, kia akakore rai koe i te apa o taau vaine. (Mataio 6:12, 14, 15) Me papa ua nga tokorua i te akakore i te apa o tetai e tetai, ka mataora to raua oraanga akaipoipo.

⁵ Te tapapa maira a Iehova kia akangateitei te tane i tana vaine. Kia akamanako meitaki i te au anoano o tana vaine. E mea puapinga teia. Me kare te tane e akono meitaki i tana vaine, kare a Iehova e akarongo mai i tana pure. (1 Petero 3:7) Te mea puapinga kia Iehova, kia inangaro te tangata Iaia. Kare i tuke tona inangaro i te tane e te vaine.

⁶ Akakite a Iesu e “kare atura raua i te toko rua, kua **kopapa okotai ra.**” (Mataio 19:6) Tiratiratu raua ki tetai e tetai e kare roa e pikikaa ia raua rai. (Maseli 5:15-21; Ebera 13:4) To raua pirianga tane e te vaine, kia akono e kia oronga ua raua i tei tau i tetai e tetai. (1 Korinetia 7:3-5) E akamaara te tane e “Kare ua e tangata e makitakita i tona **uaorai kopapa e teia noa’i oki; kareka e angai e te akaperepere marie.**” Kia aroa e kia akaperepere aia i tana vaine. E mea inangaro na te vaine kia takinga meitaki e kia akaperepere tana tane iaia.—Ephesia 5:29.

TA IEHOVA E TAPAPA MAIRA MEI TE AU VAINE

⁷ Te au ngutuare ravarai ka anoanoia tetai upoko ei arataki ia ratou, kia rauka i te rave i ta ratou apainga. Roto ia 1 Korinetia 11:3, akakite te Pipiria: “Ko te Mesia te upoko o te tangata ravarai nei; e to te vaine

5. Eaa te tumu ka akangateitei ei te tane i tana vaine?

6. Eaa te ō maira me riro te tane e te vaine ei “kopapa okotai”?

7. Eaa i anoanoia ai tetai upoko no te ngutuare tangata?



Eaa a Sara i riro ei e akaraanga meitaki no te au vaine?

ra upoko, ko te tane iā; e to te Mesia upoko, ko te Atua iā.”

8 E tarevake ana te au tane. Me taokotai e me turu te vaine i te au ikianga a tana tane, ka puapingaia te ngutuare tangata. (1 Petero 3:1-6) Karanga te Pipiria: “Te vaine oki e kauraro aia i tana tane.” (Ephesia 5:33) Peea me kare te tane e āriki ana i te irinakianga o tana vaine? Kia kauraro rai aia. “E te vaine tini e, e kauraro marie i ta kotou au tane ra; kare tetai pae e akarongo i te tuatua ra, kia rauka mai ratou i te akono meitaki o ta ratou au vaine, auraka atu rai te tuatua; I te akaraanga mai ratou i to kotou aerenga viivii kore i kapiti katoaia i te **mataku**.” (1 Petero 3:1, 2) Ka riro te akaraanga meitaki o te vaine ei tauturu i tana tane kia mārama e kia akangateitei i tona irinakianga.

9 Me kare te vaine e āriki i te manako o tana tane,

-
8. Akapeea te vaine te akaari anga i te tu akangateitei no tana tane?
9. (a) Eaa ta te vaine ka rave me kare aia e akatika ki te manako o tana tane? (e) Eaa te ako i roto ia Tito 2:4, 5 no te au vaine?

eaa tana ka rave? Akakite i tona manako ma te tu aka-ngateitei. Ei akaraanga, kua tuatua a Sara i tetai mea kare a Aberahama i mareka ana, inara akakite a Iehova kiaia: “Akarongo koe i te reo o Sara.” (Genese 21: 9-12) Me rave te tane i tetai ikianga tei rotai ki te Pipiria, ka turu tana vaine iaia. (Angaanga 5:29; Ephesia 5:24) Te vaine meitaki ka akono aia i tona ngutuare tangata. (E tatau ia Tito 2:4, 5.) Ka inangaro e ka aka-ngateitei roa atu tana tane e te tamariki iaia no tona au tu memeitaki.—Maseli 31:10, 28.

10 Tetai taime ka rapurapu nga tokorua kia akataka ke e kia tatara. Akakite te Pipiria e “Eiaa te vaine e akataka ke i tana tane” e “eiaa te tane e tuku ke atu i tana vaine.” (1 Korinetia 7:10, 11) Tetai au turanga kino takiri penei ka takake nga tokorua, inara kia aka-manako meitaki raua i teia. Akapeea te tatara? Akakite te Pipiria e okotai ua rai tumu no te tatara, me akaturi te tane me kore te vaine ki tetai ke kare i te tokorua akaipoipo no raua.—Mataio 19:9.

TA IEHOVA E TAPAPA MAIRA MEI TE AU METUA

11 E te au metua, e akapou i to kotou taime ki ta kotou tamariki. Te anoano maira ratou i taau tauturu e tei maata atu, kia apii ia ratou no runga ia Iehova.—Deuteronomi 6:4-9.

12 Kua kino takiri teia ao no Satani e te inangaro nei tetai au tangata i te rave kino i ta tatou tamariki, e te kanga ia ratou na roto i te au peu ainga viivii. E tumu

10. Eaa ta te Pipiria i akakite no runga i te akataka ke e te tatara?

11. Eaa te mea maata roa atu tei anoanoia no te tamariki?

12. Eaa ta te au metua ka rave ei paruru i ta ratou tamariki?


manako ngatā teia no tetai au metua kia tuatua. Inara ka anoanoia ratou kia akamatakite i ta ratou tamariki no runga i teia au tu tangata, e kia apii ia ratou aka-pee me patoi i teia aronga. E te au metua, paruru i ta kotou tamariki.*—1 Petero 5:8.

13 Na te metua te apainga kia apii i te tamariki i te akamako ia ratou. Akapeea koe me apii i taau tamariki? Tereni ia ratou, inara me ako ia ratou eiaa e

* Maata atu taau ka kite no te paruru i taau tamariki i roto i te pene 32 o te puka *Learn From the Great Teacher*, tei neneiia e te Au Kite o Iehova.

13. Akapeea te au metua me tereni i ta ratou tamariki?

E akaraanga meitaki a Iesu
no te ngutuare tangata katoa



māro. (Jeremia 30:11) Auraka e ako i taau tamariki na roto i te riri. Kare koe inangaro kia aite taau tuatua “ki te koputaputa koke” te ka riro ei mamae ngakau no ratou. (Maseli 12:18) Apii i taau tamariki kia mārāma i te tumu i anoanoia ai ratou kia akarongo.—Ephesia 6:4; Ebera 12:9-11; akara i te Au Manako Poto 30.

TA IEHOVA E TAPAPA MAIRA MEI TE TAMARIKI

14 Noatu e ngatā, e akarongo ua ana a Iesu i tona Metua. (Luka 22:42; Ioane 8:28, 29) Te tapapa katoa maira a Iehova i te tamariki kia akarongo i to ratou metua.—Ephesia 6:1-3.

15 E te tamariki, noatu te ngatā ra ia kotou te akarongo ki to kotou metua, e akamaara e me akarongo kotou, ka mareka roa a Iehova e to kotou nga metua ia kotou.*—Maseli 1:8; 6:20; 23:22-25.

16 Ka akanauru te Tiaporo i toou au oa e etai atu kia timata ia koe kia rave i te kino. Kua kite aia e e ngatā kia patoi i teia. Ei akaraanga, te tamaine a Iakoba a Dina, kare tona au oa e inangaro ana ia Iehova. Kua akatupu teia i te kino nona e tona ngutuare tangata. (Genese 34:1, 2) Me kare toou au oa e inangaro ana ia Iehova, penei ka timata ratou ia koe kia rave i tetai mea e riri ana a Iehova, te ka riro ei taitaia noou, toou ngutuare tangata e Iehova. (Maseli 17:21, 25) No

* Kare e anoanoia kia akarongo te tamaiti i tona nga metua, me inangaro raua kia rave aia i tetai mea te ka aati i te ture a Iehova.—Angaanga 5:29.

14, 15. Eaa te tumu ka akarongo ei te tamariki ki to ratou nga metua?

16. (a) Akapeea a Satani te timata anga i te au mapu kia rave i te kino? (e) Eaa i puapinga ai kia iki i te au oa tei inangaro ia Iehova?

reira i puapinga ai kia iki koe i te au oa tei inangaro ia Iehova.—1 Korinetia 15:33.

KA MATAORA TOOU NGUTUARE TANGATA

¹⁷ Me aru te ngutuare tangata i ta Iehova arataki-anga, ka kopaeia te taitaia e te mamae ngakau. Te tane akaipoipo, akaperepere i taau vaine, takinga meitaki iaia ma te aroa. Te vaine akaipoipo, akangateitei ma te kauraro ki taau tane, aru i te akaraanga o te vaine e akatakaia ra i roto ia Maseli 31:10-31. Te metua, apii i taau tamariki kia inangaro ia Iehova. (Maseli 22:6) Te metua tane, arataki “meitaki” i toou ngutuare tangata. (1 Timoteo 3:4, 5; 5:8) Te tamariki, akarongo ki to kotou metua. (Kolosa 3:20) E akamaara, e tarevake ana te katoatoa, no reira kia akaaka e kia akakore ua tetai i ta tetai apa. Roto i te Pipiria e ako ta Iehova no te katoatoa o te ngutuare tangata.

17. Eaa te ka tauturu a te katoatoa i roto i te ngutuare?



Eaa te ka tauturu i te au mapu kia tiratiratu kia Iehova me timataia kia rave i te kino?

TE TIKA 1

NA IEHOVA I AKATUMU I TE NGUTUARE TANGATA

“No reira oki au i akamingi atu ei i taku turi ki raro i te aroaro o te Metua o to tatou Atu ra o Iesu Mesia, Nona oki te ingoa i tapaia i te kopu-tangata ravarai, to runga i te rangi, e to te ao katoa nei.”—Ephesia 3:14, 15

Akapeea te ngutuare tangata e mataora ai?

Genese 1:26-28

Na Iehova i akatumu i te ngutuare tangata mua.

Ephesia 5:1, 2

Te mea e mataora ai te ngutuare tangata, kia aru i te akaraanga o Iehova e Iesu.

TE TIKA 2

TAAU KA RAVE KIA RIRO EI TANE E EI VAINÉ MEITAKI

“E aroa ra te tangata katoa i tana uaorai vaine . . . e te vaine oki e kauraro aia i tana tane.”

—Ephesia 5:33

Mei teaa te tu o te tane e te vaine ki tetai e tetai?

Ephesia 5:22-29

Na te tane te apainga no te arataki i te ngutuare tangata. Kia akaperepere aia i tana vaine, e kia turu tana vaine i te au ikinga tana ka rave.

Kolosa 3:19; 1 Petero 3:4

Kia takinga meitaki e kia aroa rau i tetai e tetai.

1 Petero 3:1, 2, 7

Kia akangateitei e kia akaperepere te tane e te vaine i tetai e tetai.

1 Timoteo 5:8; Tito 2:4, 5

Kia akamatutu te tane i te akarongo o tona ngutuare tangata. Kia akono meitaki te vaine i tona ngutuare.

TE TIKAI 3**KIA RIRO EI
METUA MEITAKI**

“Auraka e akariri atu i ta kotou au tamariki ra: e apii ra ia ratou kia pakari ma te ako a te Atua ra.”

—Ephesia 6:4

Eaa te apainga a te nga metua?

Deuteronomi 6:4-9;

Maseli 22:6

Ka anoanoia koe kia apii i taau tamariki no runga ia lehova. Akamata i te taima e varevare ra, tauturu ia ratou kia riro ei au oia no lehova.

1 Petero 5:8

Apia i taau tamariki akapeea me paruru ia ratou mei te au peuainga viivii, e tetahi atu au turanga te ka takino ia ratou.

Ieremia 30:11;

Ebera 12:9-11

Ka anoanoia koe kia ako i taau tamariki, eiaa ra e na roto i te riri e te takinga kino.

TE TIKAI 4**TA TE ATUA E TAPAPA MAIRA
MEI TE TAMARIKI**

“E te au tamariki ra, e akarongo atu i to kotou au metua.”—Ephesia 6:1

E te tamariki, eaa kotou ka akarongo ei ki to kotou nga metua?

Maseli 23:22-25;

Kolosa 3:20

Ka riro toou tu akarongo ei akarekareka ia lehova e toou nga metua.

1 Korinetia 15:33

Kimi i te au oia tei inangaro ia lehova. Ka māmaua i reira ia koe i te rave i te mea tika.

TE MATAARA TIKA I TE AKAMORI I TE ATUA

KARANGA tetai au akonoanga e te apii nei ratou i te tika no runga i te Atua. Inara e tuke tuke te apiianga a te au akonoanga no runga i te Atua, koai aia, e te mataara ka akamori iaia. Akapeea tatou e kite ei te mataara tika i te akamori i te Atua? Ko Iehova ua rai tei tau kia akakite mai.

² Oronga mai a Iehova i te Pipiria kia kite tatou i te mataara tika i te akamori iaia. Apii i te Pipiria, ka tau-turu a Iehova ia koe kia mārama i tana au apiianga, inangaro aia kia puapingaia koe.—Isaia 48:17.

³ Karanga tetai aronga e ka āriki a Iehova i te au akonoanga pouroa. Kare ko tera ta Iesu i apii. Tana i apii: “Kare te aronga e tuatua mai iaku e, E te Atua, e te Atua, e ope katoatoa i te tae ki te basileia ra ki te ao; ko tei akono ra i te anoano o taku Metua.” Ka anoanoia tatou kia kite e kia rave i to te Atua anoano, no te mea kua akaaite a Iesu i te aronga akono kore i te Atua ki “te aronga rave tuatua kino.”—Mataio 7:21-23.

⁴ Akakite a Iesu e ka ngatā i tetai au taimē i te rave i to Iehova anoano. ‘E tomo kotou na te ngutupa o iti; te atea maata nei te ngutupa, e te pararauare nei te ara,

1. Koai tei tau kia akakite mai i te mataara tika i te akamori i te Atua?
2. Akapeea koe e kite ei te mataara tika i te akamori i te Atua?
3. Eaa ta Iehova e inangaro maira ia tatou kia rave?
4. Eaa ta Iesu i karanga no runga i te rave anga i to te Atua anoano?

e tae atu ei ki te mate; e manganui te na reira i te tomo. Te kokota ua nei te ngutupa, e te piri oki o te ara, e tae atu ei ki te ora, e tokoia ua ake tei kite atu i te reira.’ (Mataio 7:13, 14) Ko te ara piri te mataara tika i te akamori ia Iehova, ka rauka te ora mutukore. Te ara pararauare, ko te akamorianga pikikaa, e mate te openga. Kare a Iehova e inangaro kia mate tatou. Oronga mai aia i te tuatau kia kite tatou no runga iaia. —2 Petero 3:9.

TE MATAARA TIKA I TE AKAMORI I TE ATUA

5 Karanga a Iesu e ka kite tatou i te aronga e akamori ra ia Iehova na te mataara tika, na roto i ta ratou e rave ra e e irinaki ra. “Ka kite kotou ia ratou i to ratou ua” e ka “ua mai te au rakau meitaki katoa i te ua meitaki.” (Mataio 7:16, 17) Kare te aronga akamori ia Iehova i te au tangata apa kore. Tauta pakari Tona au tavini i te rave i te mea tika. Akara ana e eaa te ka tau-turu ia tatou kia kite e koai te akamori ra ia Iehova na te mataara tika.

6 **Kia akatumuia ta tatou akamorianga ki runga i te Pipiria.** Akakite te Pipiria: “Te au tuatua tapu katoa i tataia ra, e mea akauruia mai e te Atua, e e mea meitaki ei apiianga, ei akoanga, ei akakiteanga apa, e ei akakite mai i te tuatua-tika ra. Kia apa kore te tangata o te Atua, ma te tau tikai i te au angaanga memeitaki katoa.” (2 Timoteo 3:16, 17) Tata a Paulo ki te au Kerititiano: “Ka āriki mai ei kotou i te tuatua a te Atua ta

5. Akapeea koe e kite ei e koai ma te aronga akamori i te Atua na te mataara tika?

6, 7. Eaa te akamorianga mou i akatumuia ai ki runga i te Pipiria? Eaa ta te akaraanga o Iesu e apii maira ia tatou?

kotou i kite ia matou nei, kare kotou i āriki ei tuatua na te tangata, ei tuatua ra na te Atua, e koia tika rai oki.” (1 Tesalonia 2:13) E apiianga te akamorianga mou na te Tuatua a te Atua, kare i te manako tangata ua, kare i te peu tupuna e te vai atura.

⁷ Ta Iesu i apii, na te Pipiria. (**E tatau ia Ioane 17:17.**) E taiku ua ana aia i te Tuatua a te Atua. (Mataio 4:4, 7, 10) Aru te au tavini mou o Iehova i tona akaraanga i te akatumu i ta ratou apiianga ki runga i te Pipiria.

⁸ **Kia akamori ia Iehova anake ua.** Salamo 83:18: “Ko Iehova toou ingoa, e ko koe anake Tei Teitei i te enua katoa nei.” Inangaro a Iesu kia kite te tangata e koai tikai te Atua mou, apii aia i te ingoa o te Atua kia ratou. (**E tatau ia Ioane 17:6.**) Akakite a Iesu: “Ko toou Atua ra ko Iehova taau e akamori, e koia anake rai taau e akarongo.” (Mataio 4:10) E au tavini tatou no Iehova, ka aru tatou i te akaraanga o Iesu. Ko Iehova anake ua ta tatou e akamori, kapiki tatou i tona ingoa, apii tatou i etai ke i tona ingoa e tana ka rave no tatou.

⁹ **Ei aroa mou tikai to tatou no te tangata.** Apii a Iesu i tana au pipi kia aroa i tetai e tetai. (**E tatau ia Ioane 13:35.**) Noatu noea mai tatou, eaa ta tatou peu, e ona mirioni e me e putaua, kia riro to tatou aroa i te au tungane e te au tuaine ei taokotai ia tatou. (Kolosa 3:14) Kare tatou e tamaki e kare e tā tangata. Karanga te Pipiria: “Ko te mea teia e kitea’i te tamariki a te Atua, e te tamariki a te diabolō; ko tei kore e rave i te

8. Eaa ta Iesu i apii ia tatou no te akamori ia Iehova?

9, 10. Akapeea tatou me akaari i te aroa no tetai e tetai?

tuatua-tika ra, kare ia i to te Atua, kare katoa tei kore e aroa i tona taeake.” E oti: “Kia aroa tatou ia tatou uao-rai. Auraka mei ia Kaina, no taua vaerua kino ra aia, e tamate rava atura i tona teina.”—1 Ioane 3:10-12; 4:20, 21.

¹⁰ Riro to tatou taime, maroiroi e te au apinga ei aka-maroiroi i tetai e tetai. (Ebera 10:24, 25) “E takingameitaki tatou i te tangata ravarai.”—Galatia 6:10.

¹¹ **Anoanoia tatou kia akarongo ia Iesu no te mea koia te mataara e tae ei ki te Atua.** Karanga te Pipiria: “Kare rava oki e ora i tetai ke: kare atu oki e ingoa i akakiteia mai ki te tangata i raro ake i teiane rangi, e ora’i tatou nei.” (Angaanga 4:12) Kua apii tatou i te Pene 5 o teia puka e kua tonono mai a Iehova ia Iesu, kia oronga i tona oraanga ei oko no te aronga akarongo. (Mataiao 20:28) Kua iki a Iehova ia Iesu ei Ariki i rungao i te enua. Me ka inangaro tatou i te ora mutukore, kia akarongo tatou kia Iesu.—**E tatau ia Ioane 3:36.**

¹² **Kare tatou e piri ki te au angaanga poritiki.** Kare a Iesu i piri ana ki te angaanga poritiki. Te akaapa angaia, akakite aia kia Pilato te tutara o Roma: “Kare to teiane ao taku basileia.” (**E tatau ia Ioane 18:36.**) Mei ia Iesu, tiratiratu tatou ki to Iehova Patireia noatu tei ea tatou, kare tatou e piri ki te angaanga poritiki. Inara kua akaue mai te Pipiria kia akarongo tatou i “te aronga mana taoonga” koia te au kavamani. (Roma 13:1) Ka akono tatou i te au ture o te enua e noo ra tatou. Me patoi ra tetai ture i ta Iehova, ka aru tatou

11. Eaa te tumu i āriki ei tatou e ko Iesu te mataara e tae ei ki te Atua?

12. Eaa te tumu kare tatou e piri ki te angaanga poritiki?

i te akaraanga o te au apotetoro tei akakite: “Ko te Atua ta matou e akarongo e tika’i auraka te tangata.” —Angaanga 5:29; Mareko 12:17.

¹³ Irinaki tatou e ko te Patireia anake ua o te Atua te ravenga no te au manamanata o teia ao. Akakite a Iesu, ka tutuia te “evangelia o te basileia” ki te ao katoa. (E tatau ia Mataio 24:14.) Ta te Patireia o Iehova ka rave no tatou, kare e rauka i te kavamani o te tangata. (Salamo 146:3) Apii mai a Iesu e kia pure tatou: “Kia tae toou basileia. Kia akonoia toou anoano i te enua nei, mei tei te ao katoa na.” (Mataio 6:10) Akakite mai te Pipiria e ka takore te Patireia o te Atua i te au kavamani pouroa o te tangata e ka “vai rai te reira e tuatau ua atu.” —Daniela 2:44.

¹⁴ Me oti te akara i teia au manako, e ui kia koe uo-rai: ‘Koai tei akatumu i ta ratou apii ki runga i te Pipiria? Koai tei akakite aere i te ingoa o te Atua? Koai tei akaari i te aroa mou no tetai e tetai, e tei irinaki e i tonono mai a Iehova ia Iesu ei akaora ia tatou? Koai te kare e piri ana ki te angaanga poritiki? Koai te akakite nei e ko te Patireia anake o Iehova te ravenga no to tatou manamanata?’ Ko te Au Kite ua rai o Iehova. —Isaia 43:10-12.

EAA TAAU KA RAVE?

¹⁵ Kare e rava ua kia irinaki e e Atua tetai. Te irinaki ra rai te au temoni e e Atua tetai, kare ra ratou e akarongo ana iaia. (Iakobo 2:19) Me inangaro tatou kia


13. Eaa ta tatou e tutu aere ana no runga i te Patireia o te Atua?

14. Koai taau e irinaki ra e te akamori ra i te Atua na te mataara tika?

15. Eaa ta tatou ka rave me ka inangaro tatou kia āriki te Atua i ta tatou akamorianga?

TE ARONGA AKAMORI I TE ATUA

- akatumuia ta ratou apiianga ki roto i te Pipiria
- akamori ia lehova ua, apii tona ingoa ki etai ke
- aroa ratou i tetai e tetai
- irinaki ratou e tono mai a lehova ia Iesu kia ora tatou
- kare ratou e piri ki te angaanga poritiki
- akakite ratou e ko te Patireia te ravenga no te au manamanata o teia ao



āriki mai a Iehova i ta tatou akamorianga, kia irinaki tatou e koia anake te Atua ora, e kia rave i tana e akakite maira.

16 No Iehova kia āriki i ta tatou akamorianga, e patoi tatou i te akonoanga pikikaa. Akakite a Isaia: “E aere kotou ki vao mei rotopu mai iaia ra; kia mā kotou.” (Isaia 52:11; 2 Korinetia 6:17) Te tumu tera ka patoi ei tatou i te au mea e ō maira te akamorianga pikikaa.

17 Eaa te akonoanga pikikaa? Tetai ua atu akonoanga tei apii ia tatou kia akamori ia Iehova na te mataara kare e rotai ana ki te Pipiria. Roto i te Pipiria, kapikiia te au akonoanga pikikaa ko “Babulonia Maata.” (Apokalupo 17:5) Eaa te tumu? Muri ake i te Vai Diluvi i to Noa tuatau, maata te akonoanga pikikaa tei akamataia i Babulonia. Totoa taua au akonoanga ki te pa enua. Ei akaraanga, akamori to Babulonia i te au atua toru tai, e toru atua i roto i te atua okotai, e maata teia au atua. Teia tuatau, manganui te akonoanga e apii nei e e Atua Toru Tai a Iehova. Taka meitaki te apii a te Pipiria e okotai rai Atua mou ko Iehova, e Tamaiti a Iesu Nana. (Ioane 17:3) Irinaki to Babulonia e ka ora ua atu te vaerua o te tangata me mate aia e ka tamamaeia i roto i ade. E pikikaa tera.—Akara i te Au Manako Poto 14, 17, e te 18.

18 Kua totou te Atua e ka takore pouroaia te akonoanga pikikaa. (Apokalupo 18:8) Te kite ra koe eaa i anoanoia ai kia akaruke viviki i te akonoanga pikikaa?

16. No teaa tatou ka patoi ei i te akonoanga pikikaa?

17, 18. Eaa a “Babulonia Maata,” e eaa te tumu i anoanoia ai kia akaruke viviki i te reira?

Inangaro a Iehova kia rave koe i teia i mua ake ka tupu ei.—Apokalupo 18:4.

19 Me akaruke koe i te akonoanga pikikaa, penei kare toou au oa e te ngutuare tangata e mārāma eaa koe i pera ai e ka patoi ia koe. Inara kare a Iehova e akaruke ia koe, ka āriki mai ra aia ia koe ki roto i Tona iti tangata i teia ao katoa. E aroa mou tikai to ratou i tetai e tetai. Ka rauka ia koe te manakonakoanga no te ora mutukore i roto i to Iehova ao ou. (Mareko 10:28-30) Penei i te tuatau ka aereia, ka iki te aronga i patoi ana ia koe kia apii i te Pipiria.

20 Kare e roa atu ka takore pouroa a Iehova i te kino. Ka tutara tona Patireia ki rungao i te enua. (2 Petero 3: 9, 13) E tuatau mataora tikai! Ka akamori te katoatoa Iaia na te mataara tana i inangaro. E mea puapinga kia akamori koe i te Atua i teianeī, na te mataara tika.

-
19. Me tavini koe ia Iehova, ka akapeea ra aia te akono anga ia koe?
 20. Eaa i puapinga ai kia akamori i te Atua na te mataara tika?

Ka riro koe ei oa no to Iehova iti tangata i te ao katoa, ia koe piri ra kia ratou i te akamori ia Iehova



TE TIKA 1

AKAPEEA KOE E
KITE EI E KO TEEA TE
AKAMORIANGA MOU

“Te kokota ua nei te ngutupa, e te piri oki o te ara, e tae atu ei ki te ora, e tokoia ua ake tei kite atu i te reira.”—Mataio 7:14

Akapeea tatou e kite ei e kare te Atua e āriki i te au tu akamorianga pouroa?

Mataio 7:21-23

Kare te Atua e āriki i te au tu akonoanga pouroa. Kare ratou e rave ana i Tona anoano.

Mataio 7:13, 14

Te akamorianga mou ka taki atu ki te ora mutukore,

te akonoanga pikikaa ki te mate mutukore.

Mataio 7:16, 17

Ka kite koe i te akamorianga mou no ta ratou angaanga. Taau ka apii no runga ua i te Pipiria, kare no runga i te au akonoanga.

TE TIKA 2

TE MATAARA TIKA I TE
AKAMORI I TE ATUA

1 Tesalonia 2:13;

2 Timoteo 3:16, 17

Kia irinaki, e kia apii ua i ta te Pipiria e apii maira.

Mataio 4:10; Ioane 17:6

Akamori ia Iehova, kapiki i tona ingoa.

Ioane 13:35

Akaari i te aroa mou no tetai e tetai.

Ioane 3:36; Angaanga 4:12

Akarongo ia Iesu, koia ta Iehova i tono mai ei akaora ia tatou.

Ioane 18:36; Angaanga 5:29

Auraka e piri ki te angaanga poritiki.

Mataio 24:14; 6:10

E apii i etai ke e ko te Patireia anake ua o te Atua te ravenga no to tatou manamanata.

TE TIKA 3**ANOANOIA KOE KIA RAVE
I TAAU E IRINAKI RA**

Eaa taau ka rave me ka inangaro koe kia āriki mai a lehova i taau akamorianga?

Iakobo 2:19

Kare e rava ua kia irinaki i te Atua. Anoanoia koe kia rave i Tana e akakite maira i roto i te Pipiria.

Isaia 52:11; Apokalupo 17:5

Apii a “Babulonia Maata” i te tangata kia akamori ia lehova na te mataara kare aia e mareka ana. Te ō maira te apiianganga no te Atua Toru Tai, te vaerua mate kore e te ai o ade.

Apokalupo 18:4, 8

Ka takore a lehova i te au akonoanga pikikaa. Kia patoi koe i tetai ua atu mea e ō maira te akamorianga pikikaa.

Mareko 10:28-30

Penei te patoia maira koe, kare ra a lehova e akaruke ia koe.

IKI KIA AKAMORI I TE ATUA

NA ROTO i taau apii Pipiria, kua kite koe e e maata te aronga tei karanga e te akamori ra ratou i te Atua, inara te apii ra e te rave ra i te au mea Tana i kopae. (2 Kori-netia 6:17) No reira Aia i akaue mai ei ia tatou kia aka-atea mai mei roto ia “Babulonia Maata,” te akamori-anga pikikaa. (Apokalupo 18:2, 4) Eaa ra taau ka rave? E tikaanga to tatou pouroa kia iki, e ui kia koe uorai, ‘Ka inangaro ainei au te akamori i te Atua na te mata-ara tana i inangaro, me i taku i matau?’

² Me kua akaatea mai koe e kua akaruke i te akono-anga pikikaa, e mea meitaki tera. Inara i roto i toou ngakau penei te vai rai tetai au mea e te au peu a te akonoanga pikikaa e reka ra koe. Ka akara ana tatou i etai o taua au mea ra, kia kite tatou e eaa i puapinga ai kia aru i to Iehova aerenga manako.

AU ITORO E TE AKAMAREKA I TE UI TUPUNA

³ I taangaanga ana tetai aronga i te au mea mei te tiki ei itoro me kore, maani ratou i tetai ngai i roto to ratou are ei akamori i te Atua. Me ko koe tetai e pera ra, penei ka manako koe e e tarevake kia kore e ta-angaanga i te itoro me akamori i te Atua. Inara te apii maira a Iehova ia tatou akapeea me akamori Iaia. Aka-

1, 2. Eaa te uianga ka anoanoia koe kia ui kia koe uorai, e no teaa teia i puapinga ai?

3. (a) No teaa ka ngatā ai i tetai aronga kia takore i te itoro i roto i ta ratou akamorianga? (e) Eaa to te Pipiria manako no runga i te akamori i te itoro?

kite taka mai te Pipiria e kare a Iehova e inangaro kia akamori tatou i te itoro.—E **tatau ia Exodo 20:4, 5**; Salamo 115:4-8; Isaia 42:8; 1 Ioane 5:21.

⁴ Pou te taime e te maroiroi o te tangata i te akamareka i to ratou ui tupuna i mate. Ka akamanea ratou i te menema o to ratou tupuna i te manako anga e ka mareka mai ratou. Penei ka akamori tetai pae i to ratou ui tupuna. Inara kua apii tatou e kare e rauka i tei mate kia tauturu e kia takino ia tatou. Kare ratou e ora ra i tetai ngai. E mea kino te tuatua kia ratou no te mea na te au temoni te karere e manakoia ra e na tei mate. No reira a Iehova i akaue ei to Iseraela auraka e tuatua ki tei mate, auraka e piri ki te au peu purepure.—Deuteronomi 18:10-12; akara i te Au Manako Poto 26 e te 31.

⁵ Eaa te ka tauturu ia koe kia akamutu i te akamori i te tiki ei itoro e i toou ui tupuna i mate? Kia tatau koe i te Pipiria, kimi marie eaa to Iehova manako i teia peu. E mea “viivii” tikai teia kiaia. (Deuteronomi 27:15) Pure i te au rā kia rauka ia koe te aru i to Iehova aerenga manako e kia akamori iaia na te mataara tana i inangaro. (Isaia 55:9) Ka oronga mai Aia i te maroiroi kia rauka ia koe te takore i tetai ua atu apinga i roto i toou oraanga te ka ō mai te akamorianga pikikaa.

KA AKAMAARA AINEI TATOU I TE KERITIMITI?

⁶ E Keritimiti tetai orote matauia i teia ao. Manako

4. (a) Eaa te tumu kare tatou e akamareka i to tatou ui tupuna?
(e) Eaa te tumu i akakite ei a Iehova ki tona iti tangata auraka e tuatua ki tei mate?

5. Eaa te ka tauturu ia koe kia akamutu i te akamori i te itoro ei Atua, e kia akamutu i te akamareka i toou ui tupuna i mate?

6. Eaa te tumu i ikiia ai te rā 25 o Titema ei akamaaraanga i te rā anauanga o Iesu?

te manganui, e akamaaraanga teia i te rā anau o Iesu. Inara e pirianga to te Keritimiti ki te akamorianga pikikaa. Akakite tetai puka, i te rā 25 o Titema e akamaara ana to Roma i te anauanga o te rā. Inangaro te au orometua i te aronga kare e irinaki i te Atua, kia aru ia ratou. Akariro ratou i te rā 25 o Titema ei rā anau no Iesu noatu kare aia i anauia i tera rā. (Luka 2:8-12) Kare ta Iesu au pipi i akamaara ana i te Keritimiti. Akakite tetai puka, e 200 mataiti i muri ake i to Iesu anauanga, “kare rai e tangata i kite i te rā tikai i anau ei a Iesu, e iti ua tei inangaro kia kite.” (*Sacred Origins of Profound Things*) Akamata te akamaaraanga o te Keritimiti mei te 300 mataiti i muri ake i to Iesu tuatau i te enua nei.

⁷ E maata tei kite e na te akonoanga pikikaa teia au peu Keritimiti mei te tamataora e te oronga apinga aroa. I Peritane e tetai au ngai i Marike, kua araiia ana te akamaaraanga i te Keritimiti no te mea e peu akonoanga pikikaa. E akautungaia ana te tangata no te reira. Muri mai, akamata akaouia te peu Keritimiti. Eaa te tumu kare te au Kerititiano mou e akamaara i te Keritimiti? No te mea kua inangaro ratou i te akamareka i te Atua i te au mea ravarai.

KA AKAMAARA AINEI TATOU I TE RĀ ANAUANGA?

⁸ Tetai mea matauia e te tangata i te akamaara, ko to ratou rā anauanga. Ka akamaara ainei te au Kerititiano i te rā anauanga? Ko te rā anauanga ua rai i taikua i roto i te Pipiria, no te aronga kare e akamori ana ia Iehova. (Genese 40:20; Mareko 6:21) E akamaaraia ana

7. Eaa te tumu kare te au Kerititiano mou e akamaara i te Keritimiti?
8, 9. Eaa te tumu te au Kerititiano o mua ana i kore ei e akamaara i te au rā anauanga?

te rā anauanga ei akangateitei i te au atua pikikaa. No reira te au Kerititiano o mua ana i “irinaki ei e, e peu akonoanga pikikaa te reira.”—*The World Book Encyclopedia*.

⁹ Irinaki to Roma e to Ereni i mua ana e ko te au tangata ka anauia, e vaerua tetai i reira ei paruru iaia no tona oraanga katoa. “E pirianga to taua vaerua ra ki te atua nona te rā anauanga i anauia mai ei tera tangata,” i akakite ei te puka *The Lore of Birthdays*.

¹⁰ Toou manako e te mareka maira a Iehova i te au akamaaraanga e ō maira te akonoanga pikikaa? (Isaia 65:11, 12) Kare. Ko te tumu tera kare tatou e akamaara i te au rā anauanga e te au orote e ō maira te akonoanga pikikaa.

E KINO AINEI TETAİ?

¹¹ Kua kite tetai aronga e e peu akonoanga pikikaa te Keritimiti e tetai au orote, inara te akamaara nei rai ratou i te reira. E taime tau teia i na ratou ei i te akapou ki te ngutuare tangata. Mei tera ainei toou manako? Kare e tarevake i te akapou i tetai taime ki toou ngutuare tangata. Na Iehova i akatumu i te ngutuare tangata, inangaro aia kia mataora to tatou pirianga kia ratou. (Ephesia 3:14, 15) E puapinga atu ra kia akamou i tetai pirianga meitaki kia Iehova, i to te akamaara i te au orote a te akonoanga pikikaa ei akamareka i te ngutuare tangata. Akakite a Paulo: “Kia kitea ia kotou te mea mareka na te Atua.”—Ephesia 5:10.

10. Eaa te tumu kare te au Kerititiano o teia tuatau e akamaara i te au rā anauanga?

11. Eaa tetai aronga e akamaara ai i te au orote? Eaa ra te mea puapinga roa atu kia koe?

12 Manako tetai aronga e kare e kino ana e i akamataia mai te orote kiea, e tuke ra to Iehova manako. Kare aia e āriki i te au orote a te akonoanga pikikaa, te au orote akaepaepa i te tangata e te au apinga akaepaepa enua mei te reva e te vai atura. Ei akaraanga, e maata te au atua itoro e akamaara ana to Aiphiti. Te ora mai anga mei Aiphiti, rave to Iseraela i tetai akamaaraanga no te akamorianga pikikaa ta ratou i kapiki e ko te “rā oroa apopo no Iehova.” Kua akautungaia ratou e Iehova. (Exodo 32:2-10) Mei ta Isaia i akakite, “auraka [tatou] e arapaki ua atu i tetai mea viivii.”—E tatau ia Isaia 52:11.

KIA TAKINGA MEITAKI ME TUATUA KI ETAI KE

13 Me akamutu koe i te akamaara i te au orote, ka inangaro koe kia kite e ka akapeea koe. Akaraanga: Me ui mai toku au oa angaanga e, no teaa au kare e akamaara i te Keritimiti? Ka akapeea ra au me oronga mai te tangata i tetai apinga aroa Keritimiti? Me inangaro toku tokorua kia piri au ki te akamaaraanga i tetai rā orote? Me tauturu i taku tamariki kia kore e taitaia no te mea kare ratou e akamaara i te orote e to ratou rā anau?

14 E mea puapinga kia akamanako meitaki eaa taau ka tuatua e taau ka rave me tupu teia. Ei akaraanga, me karanga mai te tangata e meri Keritimiti, eiaa e kopae ia ratou. E karanga ua ra e “meitaki maata.” Me ka ina-

12. Eaa te mea e kore ei a Iehova e āriki i tetai orote?

13. Eaa te au uianga taau ka ui me akamutu koe i te akamaara i te au rā orote?

14, 15. Eaa taau ka rave me karanga mai tetai tangata e meri Keritimiti, e me oake mai i tetai apinga aroa?

ngaro ratou kia kite e no teaa ra, i reira koe ka akamārama atu ei i te tumu kare koe akamaara ana i te rā orote. Inara, kia maru, kia tau ma te tu akangateitei. Te karanga ra te Pipiria: “Ei tuatua aroa ua anake ta kotou, kia rapakauia i te tai, i te kite anga i te mea tika kia tuatua atu ki te tangata katoa ra.” (Kolosa 4:6) Penei e akamārama e e mataora ana koe i te akapou i tetai taime ki etai ke e te oronga apinga aroa, eiaa ra me te ō maira teia au tu orote.

15 Ka akapeea koe me oake mai te tangata i tetai apinga aroa naau? Kare a te Pipiria ture no te reira. Te akakite maira ra e, kia vai mā ua to tatou akava ngakau. (1 Timoteo 1:18, 19) Penei kare te tangata nana te apinga aroa i kite e kare koe akamaara ana i te rā orote. Penei ka karanga mai e, “Kua kite au e kare koe akamaara ana i te rā orote, ka inangaro rai au te oake atu i teia naau.” Tei ia koe me ka āriki e me kare. Noatu eaa taau ka iki, e akapapu e kia vai mā ua toou akava ngakau. Kare tatou e inangaro kia rave i tetai mea te ka takino i to tatou pirianga kia Iehova.

KOE E TOOU NGUTUARE TANGATA

16 Ka akapeea koe me inangaro toou ngutuare tangata i te akamaara i tetai rā orote? Eiaa e taumāro atu. E tikaanga to ratou kia iki i ta ratou ka inangaro. Kia marū, akangateitei i to ratou anoano, mei ia koe e inangaro ra kia pera mai ratou ia koe. (**E tatau ia Mataio 7:12.**) Me inangaro ratou kia akapou koe tetai taime kia ratou i te tuatau orote, ka akapeea koe? Mua ake ka iki ei taau ka rave, pure kia tauturu mai a Iehova ia

16. Ka akapeea koe me inangaro toou ngutuare tangata i te akamaara i tetai rā orote?

koe. Akamanako marie e oti kimikimi no runga i te reira. Ka inangaro koe kia akamareka ua rai ia Iehova.

17 Eaa taau ka rave no taau tamariki me kite ratou i tetai aronga e akamaara ra i te au rā orote? Mei tera taime ki tera taime, rave i tetai angaanga mataora, aka-papa i tetai apinga aroa na ratou. Te apinga aroa aka-perepere roa atu, ko toou taime e toou aroa.

RAVE I TE AKAMORIANGA MOU

18 Ei akamareka ia Iehova, e akaruke tatou i te akonoanga pikikaa e tana au peu e te au rā orote. Kia rave tamou i te akamorianga mou. Akapeea? Tetai mataara, kia tae ua rai ki te uipaanga Kerititiano. (E tatau ia Ebera 10:24, 25.) E tuanga puapinga te uipaanga no te akamorianga mou. (Salamo 22:22; 122:1) I ko i te uipaanga, ka rauka i te akamaroiroi i tetai e tetai.—Roma 1:12.

19 Tetai tuanga no te akamorianga mou, kia tuatua ki etai ke no runga i te Pipiria. E manganui te taitaia ra no te au mea kino e tupu nei i teia ao. Penei kua kite koe i tetai aronga mei tera rai. Akakite kia ratou i toou manakonakoanga no te tuatau ki mua. Ia koe e aere ra ki te au uipaanga e te akakite i te tuatua mou o te Pipiria ki etai ke, kare koe inangaro kia piri akaou ki te akonoanga pikikaa e tana au peu. E mea papu e ka mataora koe, e ka akameitaki mai a Iehova i taau iki-anga kia akamori iaia na te mataara tika.—Malaki 3:10.

17. Eaa taau ka rave kia kore taau tamariki e manako e te akangereia ra ratou me akamaara tetai aronga i te au rā orote?

18. Eaa te tumu ka aere ei tatou ki te au uipaanga Kerititiano?

19. Eaa te tumu i puapinga ai kia akakite i te tuatua mou o te Pipiria ki etai ke?



Te aronga e tavini ra ia lehoval
mataora ratou



TE TIKAI 1

KOPAE I TE AKAMORIANGA PIKIKAA

“E aere mai kotou ki vao, mei roto mai ia ratou ra, kia taka ke kotou, e auraka e rave ua atu i te mea viivii ra.”—2 Korinetia 6:17

Eaa i tarevake ei te akamori itoro e te akamareka i te ui tupuna?

Exodo 20:4, 5; 1 Ioane 5:21
Kare a lehova e inangaro kia akamori tatou i te itoro ei atua.

Deuteronomi 18:10-12
Te aronga e tuatua ra ki tei mate, te tuatua ra ratou ki te au temoni.

TE TIKAI 2

KARE TE AU AKAMAARAANGA POUROA E TAU ANA KI TE ATUA

“Kia kitea ia kotou te mea mareka na te Atua.”
—Ephesia 5:10

Akapeea koe e kite ei e me ka tau kia piri koe ki tetai akamaaraanga?

Ezekiela 44:23;
2 Korinetia 6:14, 15
Kimi meitaki me te ō maira te akamorianga pikikaa.

Exodo 32:2-10
Noatu e akakoroanga meitaki to te aronga na ratou te akamaaraanga, inara penei kare te Atua e mareka i te reira.

Daniela 3:1-27
Kopae i te akamaaraanga akaepaepa tangata, te au akaerenga o te tangata e te reva o te enua.

1 Timoteo 1:18, 19
Akamanako meitaki, akapapu kia vai mā ua toou akava ngakau i mua ia lehova.

TE TIKĀ 3**KIA MARŪ ME AKAMĀRAMA
I TOOU IRINAKIANGA
KI ETAI KE**

“Ei tuatua aroa ua anake ta kotou, kia rapakauia i te tai, i te kite anga i te mea tika kia tuatua atu ki te tangata katoa ra.”—Kolosa 4:6

Akapeea koe me akamārama i toou irinakianga ki etai ke?

Mataio 7:12

Akangateitei i te anoano o etai ke mei taau e inangaro ra ia ratou kia pera mai.

2 Timoteo 2:24

Kia akakoromaki, eiaa e māro atu i toou irinakianga ki etai ke.

1 Petero 3:15

Paruru i toou irinakianga ma te marū e te akangateitei.

Ebera 10:24, 25

I ko i te uipaanga Kerititiano, ka akamaroiroi e ka tauturu te au taeake ia koe kia kite akapeea me akamārama i toou irinakianga.

TE TIKAANGA NGATEITEI KIA PURE

ME AKAAITEIA ki teia ao katoa, e meangiti ua te enua. Kia Iehova, e topata ua te pa enua i roto i te pakete. (Salamo 115:15; Isaia 40:15) Noatu e meangiti ua tatou, akakite te Salamo 145:18, 19: “Te vaitata mairā Iehova i te aronga i kapiki atu iaia, i te aronga i kapiki atu iaia ma te pikikaa kore. E akatika aia i te anoano o te aronga i matakua iaia; ka akarongo mai aia i ta ratou kapiki, e ka akaora oki aia ia ratou.” E tikaanga ngateitei tikai tera no tatou! Inangaro te mana katoatoa a Iehova, Tei Anga ia tatou, kia akavaitata tatou kiaia e ka akarongo mai aia i ta tatou pure. E akameitakianga maata te pure e e apinga aroa na Iehova kia tatou.

² Ka akarongo mai a Iehova me pure tatou na te mataara tei tau iaia. Akapeea tatou me rave i te reira? Akara tatou i to te Pipiria manako.

NO TEAA TATOU KA PURE EI KIA IEHOVA?

³ Inangaro a Iehova ia koe kia pure e kia tuatua kiaia. Akapeea tatou i kite ei? E **tatau ia Philipi 4:6, 7**. Akamanako ana i tera patianganga na Tei Anga i teia ao. Akaperepere maata Aia ia koe. Inangaro aia kia akakite koe i toou manako e toou manamanata Kiaia.

1, 2. Toou manako eaa i riro ei te pure ei apinga akaperepere, e eaa i anoanoia ai kia kite tatou i te apiianga a te Pipiria no te pure?

3. No teaa koe ka pure ei kia Iehova?

Inangaro “tei anga i te au rangi e te enua nei” i te akarongo mai i ta tatou pure.—Salamo 115:15



4 Ka tauturu te pure ia tatou kia riro ei oa piri tikai no Iehova. Me tuatua putuputu te au oa ki tetai e tetai i to ratou manako, manamanata, e to roto i to ratou ngakau, ka matutu roa atu to ratou pirianga oa. Mei tera rai me pure kia Iehova. Akakite mai aia na roto i te Pipiria i tona manako, tona anoano, e tana ka rave a te tuatau ki mua. Ka rauka katoa ia koe te akakite kiaia eaa tikai to roto i toou ngakau. Ia koe rave ra i teia, ka keta-keta roa atu toou pirianga oa kia Iehova.—Iakobo 4:8.

EAA TA TATOU KA RAVE KIA AKARONGOIA MAI E TE ATUA?

5 Ka akarongo mai ainei a Iehova i te au pure pou-roa? Kare. Akakite a Iehova ki to Iseraela: “Kia aka-maata kotou i te au pure, kare au e akarongo atu; kua ki oki to kotou rima i te toto.” (Isaia 1:15) Kia matakite

4. Akapeea te pure putuputu ua rai kia Iehova i te akamatutu anga i toou pirianga oa kiaia?

5. Akapeea tatou i kite ei e kare a Iehova e akarongo mai i te au pure pouroa?

tatou eiaa e rave i te au mea ka akatakake ia tatou mei ia Iehova, no te mea kare aia e akarongo mai ta tatou pure.

6 Me ka inangaro tatou kia ariu mai a Iehova ki ta tatou pure, e tuku i to tatou akarongo ki roto iaia. (Mareko 11:24) Akakite a Paulo: “Kare ra e akarongo ra kare rava aia e mareka: ko te akamori i te Atua ra, kia akarongo aia e, e Atua e tika’i, e koia tei tutaki mai i te aronga i kimi tikai iaia.” (Ebera 11:6) Kare e rava kia tuatua ua e e akarongo to tatou. Kia akaari tatou i te reira e kia akono i to Iehova anoano i te au rā ravarai. —**E tatau ia Iakobo 2:26.**

7 Akaari i te tu akangateitei e te akaaka me pure kia Iehova. No teaa ra? Me tuatua tatou ki tetai ariki me kore peretiteni, ka tuatua tatou na roto i te tu akangateitei. I na ko Iehova te Atua Mana Katoatoa, kare ainei i te mea tau kia maata atu to tatou akangateitei e te akaaka me tuatua kiaia? (Genese 17:1; Salamo 138:6) Kia pure katoa tatou kiaia ma te ngakau tae, eiaa e taokioki ua i taua tuatua rai.—Mataio 6:7, 8.

8 Me pure no tetai apinga, kia tau ta tatou ka rave ki ta tatou e pati ra. Ei akaraanga, me pure tatou kia oronga mai a Iehova i te au mea tei anoanoia no te oranga, kare tatou e noo ua e tiaki kia oake mai Aia i teia au mea me ka rauka ua ia tatou i te angaanga. Ka

6. Eaa te puapinga o te akarongo? Akapeea koe te akaari anga e e akarongo toou?

7. (a) Eaa tatou ka akaari ei te tu akaaka e te akangateitei me pure kia Iehova? (e) Akapeea tatou te akaari anga e te tae ra to tatou ngakau me pure?

8. Me pure tatou no tetai apinga, eaa atu tetai ka anoanoia kia rave tatou?

tauta tatou e ka āriki i te angaanga ua atu ka rauka. (Mataio 6:11; 2 Tesalonia 3:10) Me pure kia tauturu mai a Iehova ia tatou kia kore e rave i te kino, ka kopae tatou i tetai ua atu turanga ka riro ei timata ia tatou. (Kolosa 3:5) Ka akara ana tatou i tetai au uianga matauia no runga i te pure.

AU UIANGA MATAUIA I TE UI NO TE PURE

9 Ka pure tatou kiaai? Apii a Iesu i tana au pipi kia pure “E to matou Metua i te ao ra, Kia tapu toou ingoa.” (Mataio 6:9) Akakite aia: “Ko au te mataara, e te tuatua-mou e te ora; kare ua e tangata e tae ki te Metua ra, mari ra ei iaku.” (Ioane 14:6) Ka pure tatou **kia Iehova** anake ua, **na roto** ia Iesu. Eaa te ō maira me pure na roto ia Iesu? Kia akangateitei tatou i te apainga ta Iehova i oronga na Iesu, e āriki mai ei aia i ta tatou pure. Aere mai a Iesu ei akaora ia tatou mei te ara e te mate. (Ioane 3:16; Roma 5:12) Akamana katoa a Iehova ia Iesu ei Taunga Maata e ei Akava.—Ioane 5:22; Ebera 6:20.

10 Ka anoanoia ainei tatou kia tuturi, noo ki raro e kia tu ua me pure? Kare. Kare a Iehova e pati maira kia akapera tatou me pure. Apii mai te Pipiria e ka tau kia pure tatou na roto i tetai ua atu tu akangateitei. (1 Paraleipomeno 17:16; Nehemia 8:6; Daniela 6:10; Mareko 11:25) Te mea puapinga roa atu kia Iehova ko te akakoroanga o to tatou ngakau. Ka tau kia akamaata tatou i te reo e kia pure ngakau ua i tetai ua atu taime, i

9. Ka pure tatou kiaai? Eaa ta Ioane 14:6 e apii maira ia tatou no runga i te pure?

10. Ka anoanoia ainei tatou kia tuturi, noo ki raro me kore kia tu ua me pure? Akamārama mai.

te po e te ao. Ka rauka ia tatou kia irinaki e ka akarongo mai a Iehova noatu me kare e tangata e akarongo mai. —Nehemia 2:1-6.

¹¹ Ka pure tatou no teaa? No tetai ua atu apinga tei tau kia Iehova. Karanga te Pipiria: “Kia pati ua atu tatou i te au mea ravarai i tau iaia ra, te akarongo maira aia ia tatou.” (1 Ioane 5:14) Ka tau ainei kia pure no tetai mea ko tatou ua tei kite? Ae. Aite rai mei te tuatua ki to tatou oa piri tikai. Ka akakite tatou eaa to roto i to tatou manako e te ngakau. (Salamo 62:8) Ka rauka ia tatou kia pati i tona vaerua tapu ei tauturu ia tatou te rave i te mea tika. (Luka 11:13) Kia pati i Tona pakari kia rave i te au ikianga tau e kia rauka te ngakau toa i te akakoromaki i te au tu ngatā. (Iakobo 1:5) Pati katoa tatou ia Iehova kia akakore mai i ta tatou ara. (Ephesia 1:3, 7) Kia pure tatou no etai ke, te ngutuare tangata, te au taeake e te au tuaine i roto i te putuputuanga. —Angaanga 12:5; Kolosa 4:12.

¹² Eaa te mea puapinga roa atu i roto i ta tatou pure? Ko Iehova e tona anoano. E akameitaki tatou iaia ma te ngakau katoa no te au mea tana i rave no tatou. (1 Paraleipomeno 29:10-13) Kua kite tatou i teia no te mea ia Iesu i te enua nei, kua apii aia i tana au pipi akapeea me pure. (**E tatau ia Mataio 6:9-13.**) Apii aia kia pure na mua no te ingoa o te Atua kia akatapu-ia, kia akariroia ei mea tapu e te ngateitei. E oti kia pure no te Patireia o te Atua kia tae mai, e kia akatupuia to Iehova anoano i te enua nei. Me oti teia au mea puapinga, ka pure ei no to tatou uaorai anoano. Me tuku

11. Eaa tetai au apinga ka rauka ia tatou kia tuatua atu kia Iehova?

12. Eaa te mea puapinga rava atu i roto i ta tatou pure?

tatou ia Iehova e tona anoano na mua, te akaari ra tatou eaa te mea puapinga rava atu kia tatou.

13 Eaa te roa me pure tatou? Kare te Pipiria i akakite mai. Tei runga i to tatou turanga, me ka roa me ka poto. Penei ka poto ua me pure no te kai, e ka roa atu me te akameitaki ra tatou ia Iehova e me te akakite ra kiaia i to tatou au manamanata. (1 Samuela 1:12, 15)

13. Eaa te roa me pure tatou?

Ka rauka ia koe kia pure
i tetai ua atu taime





Ka pau mai a Iehova i ta tatou pure na roto i te tauturu a to tatou au oa Kerititiano

Kare tatou e inangaro kia akaroa i te pure ei akareka ua i te tangata, mei ta tetai aronga rai i to Iesu tuatau. (Luka 20:46, 47) Kare a Iehova e marka mai i tera tu pure. Te mea puapinga kia Iehova, kia pure tatou ma te ngakau tae.

14 Eaa te putuputu me pure tatou? Pati mai a Iehova kia tuatua ua rai tatou kiaia. Akakite te Pipiria “e pure,” ua rai, kia “tamou marie tikai i te pure,” e “auraka e tukutuku i te pure.” (Mataio 26:41; Roma 12:12; 1 Tesalonia 5:17) Kua papa ua a Iehova i te akarongo mai. Akameitaki tatou Iaia i te au rā no tona aroa e te takinga meitaki. Pati i te kaveinga tau, te maroiroi, e te

14. Eaa te putuputu me pure tatou, e eaa ta teia e apii maira ia tatou no runga ia Iehova?

akapumaana. Me te akaperepere ra tatou i teia tikaanga manea kia pure kia Iehova, ka tuatua ua rai tatou kiaia.

15 Eaa te tumu ka karanga ai tatou e “amene” me oti te pure? Te kupu “amene,” tona aiteanga “koia mou tikai” me kore “koia ia.” Roto i ta tatou pure te akaari ra tatou e kua tae tikai to tatou ngakau i te karanga e “koia ia.” (Salamo 41:13) Apii mai te Pipiria e i te openga o te pure, e mea meitaki kia karanga e “amene,” ei akaari e te āriki ra koe i tei tuatuaia. —1 Paraleipomeno 16:36; 1 Korinetia 14:16.

ME PAU MAI TE ATUA I TA TATOU PURE

16 Ka pau mai ainei a Iehova i ta tatou pure? Ae. Kapiki te Pipiria iaia e ko “Tei akarongo i te pure.” (Salamo 65:2) Ka akarongo mai a Iehova e ka pau mai i te pure a te mirioni ua atu, na roto i te au mataara tuke tuke.

17 Tetai taime ka pau mai a Iehova i ta tatou pure na roto i te au angera e tona au tavini i te enua nei. (Ebera 1:13, 14) Maata te aronga tei pure ana kia mārama i te Pipiria e i muri poto ua ake kua tae mai tetai Kite o Iehova i te atoro. Akaari mai te Pipiria e te ō maira te au angera i te akakite aere i te “evangelia” i te enua katoa. (**E tatau ia Apokalupo 14:6.**) Manganui tei pure ana kia Iehova no runga i tetai manamanata me kore i tetai turanga, e kua rauka te tauturu na roto i tetai taeake me kore i tetai tuaine Kerititiano.—Maseli 12:25; Iakobo 2:16.

15. Eaa te tumu ka karanga ai tatou e “amene” me oti te pure?

16. Ka pau mai ainei a Iehova i ta tatou pure? Akamārama mai.

17. E akapeea ana a Iehova me pau mai i ta tatou pure na roto i te au angera e tona au tavini i te enua nei?

18 Pau mai a Iehova i ta tatou pure na roto i tona vaerua tapu, ei arataki e ei akamaroiroi ia tatou kia rauka te akakoromaki i te manamanata. (2 Korinetia 4:7) Tanganga a Iehova i te Pipiria ei pau mai ta tatou pure e kia rauka ia tatou te rave i te au ikianga tau. Me tatau tatou i te Pipiria ka kite tatou i tetai au irava te ka tauturu ia tatou. Ka rauka ia Iehova te akakeu i tetai tangata i ko i te uipaanga kia tuatua mai i tetai mea ka anoanoia kia kite tatou, me kore i tetai tangata pakari o te putuputuanga, kia taiku mai i tetai mea i roto i te Pipiria kia tatou.—Galatia 6:1.

19 Penei ka manako tatou e, 'Eaa ra a Iehova kare e pau mai taku pure?' Kua kite aia e aea, e ka akapeea aia me pau mai. Kua kite katoa aia eaa te anoanoia ra kia rave tatou. Penei ka inangaroia tatou kia pure ua rai ei akaari e kua tae tikai to tatou ngakau, e e akarongo tikai to tatou i roto iaia. (Luka 11:5-10) Tetai taime e pau mai ana a Iehova na te mataara kare roa tatou i manako ana. Ei akaraanga, me te na roto ra tatou i tetai tu ngatā, penei kare aia e akaatea i tera turanga, ka oronga mai ra aia i te maroiroi kia rauka ia tatou te akakoromaki.—**E tatau ia Philipi 4:13.**

20 E tikaanga ngateitei tikai to tatou kia pure kia Iehova! Kare e ekoko ka akarongo mai aia ia tatou. (Salamo 145:18) Te maata atu i ta tatou pure kia Iehova ma te ngakau tae, te matutu atu ia to tatou pirianga oa kiaia.

18. E akapeea ana a Iehova me pau mai i ta tatou pure na roto i te vaerua tapu e te Pipiria?

19. No teaa tatou i tetai taime ka manako ei e kare a Iehova i pau mai ta tatou pure?

20. Eaa te tumu ka pure putuputu ei tatou kia Iehova?

TE TIKA 1

INANGARO A IEHOVA
TE AKARONGO MAI
TA TATOU PURE

“Te waitata mairā Iehova i te aronga i kapiki atu iaia, i te aronga i kapiki atu iaia ma te pikikaa kore.” –Salamo 145:18

Eaa ta tatou ka rave me ka inangaro tatou kia ariu mai a Iehova ki ta tatou pure?

Ebera 11:6

Ka anoanoia te akarongo.

Salamo 138:6

Ei tu akaaka to tatou e te akangateitei.

Iakobo 2:26

Kia rotai to tatou tu ki ta tatou pure.

Mataio 6:7, 8

Kia pure tatou ma te ngakau tae e te tuatua tika. Eiaa e taokioki ua i taua tuatua rai.

Isaia 1:15

Kia rotai to tatou oraanga ki to Iehova anoano.

TE TIKA 2

AU UIANGA MATAUIA
I TE UI NO TE PURE

Ka pure tatou kiaai?

Mataio 6:9; Ioane 14:6

Ka anoanoia ainei tatou kia tuturi, noo ki raro e kia tu ua me pure?

1 Paraleipomeno 17:16;

Nehemia 8:5, 6;

Daniela 6:10; Mareko 11:25

Te akarongo maira ainei a Iehova i ta tatou pure?

Nehemia 2:1-6

Eaa te roa me pure tatou?

1 Samuela 1:12, 15;

Luka 20:46, 47

Eaa te putuputu me pure tatou?

Roma 12:12; 1 Tesalonia 5:17

Eaa te tumu ka karanga ai tatou e “amene” me oti te pure?

1 Paraleipomeno 16:36;

1 Korinetia 14:16

TE TIKA 3**KA PURE TATOOU NO TEAA**

“Kia pati ua atu tatou i te au mea ravarai i tau iaia ra, te akarongo maira aia ia tatou.”—1 Ioane 5:14

Eaa tetai au apinga ka tau kia pati tatou me pure?

Mataio 6:9, 10

Pure kia akatupuia to Iehova anoano.

1 Paraleipomeno 29:10-13

Pure ma te akameitaki.

Mataio 6:11-13

Pure no to tatou uorai au anoano e to tatou manamanata.

Luka 11:13

Pure kia rauka te tauturu a te vaerua tapu.

Iakobo 1:5

Pure kia rauka te pakari i te rave i te au ikianga tau.

Philipi 4:13

Pure kia rauka te maroiroi i te akakoromaki.

Ephesia 1:3, 7

Pure kia akakoreia mai ta tatou ara.

Angaanga 12:5

Pure no etai ke.

TE TIKA 4**KA PAU MAI IEHOVA
I TA TATOOU PURE**

“E tei akarongo i te pure ra e, ka tae te tangata ravarai kia koe na.”—Salamo 65:2

Ka akapeea a Iehova me pau mai ta tatou pure?

Maseli 12:25; Apokalupo 14:6

E tauturu mai ana a Iehova na roto i te au angera e te tangata.

2 Korinetia 4:7

Oronga mai tona vaerua tapu i te tauturu tei anoanoia no tatou.

Philipi 4:6, 7, 13

Oronga mai Aia i te au e te maroiroi kia rauka ia tatou te akakoromaki.

Galatia 6:1;**2 Timoteo 3:16, 17**

Oronga mai Aia i te pakari na roto i te Pipiria e te putuputuanga.

KA AKATAPU AINEI AU TOKU ORAANGA KIA IEHOVA E KIA PAPETITO?

E MAATA taau i kite no runga i te Pipiria ia koe e apii ra i teia puka. Ei akaraanga, mei te au taputou a te Atua no te oraanga mutu kore, te turanga o tei mate, e te manakonakoanga o te tuakaouanga. (Kohéleta 9:5; Luka 23:43; Ioane 5:28, 29; Apokalupo 21:3, 4) Penei kua akamata koe i te aere ki te au uipaanga a te Au Kite o Iehova, e kua irinaki koe e ko te akamorianga mou

1. Eaa ra taau ka manako i muri ake i te apiianga i teia puka?



teia. (Ioane 13:35) E penei kua inangaro koe kia riro ei oa no Iehova e kia tavini iaia. Te manako ra koe i reira e, 'Eaa ra taku ka rave i teianeia kia rauka iaku i te tavini ia Iehova?'

² Ko tera te manako o tetai tangata Etiopia i noo ana i to Iesu tuatau. Muri ake i to Iesu akatuakaouanga, kua tuatua atu a Philipi tetai pipi a Iesu, ki taua tangata ra. Kua akapapu atu a Philipi kiaia e ko Iesu te Mesia. Kua tukia roaia te ngakau o taua tangata ra i tana i kite e i reira rai karanga aia e: "I na e vai teia, eaa au nei e kore ei e bapetizoia?"—Angaanga 8:26-36.

³ Taka meitaki te apii a te Pipiria e me ka inangaro koe i te tavini ia Iehova, e mea tau kia papetito koe. Akakite a Iesu ki tana au pipi: "E akariro i to te pa enua katoa ei pipi; ka **bapetizo atu ei ia ratou.**" (Mataio 28:19) Tuku a Iesu i te akaraanga meitaki e kua papetitoia. Kua taruku takiriiia aia ki roto i te vai, kare i pîpî uaia tona katu ki te vai. (Mataio 3:16) Teia tuatau me papetitoia tetai Kerititiano, ka taruku takiriiia aia ki roto i te vai.

⁴ Me papetitoia koe, e akairo te reira e kua inangaro tikai koe kia riro ei oa no te Atua e kia tavini iaia. (Salamo 40:7, 8) Penei ka ui koe e, 'Eaa ra taku ka rave kia papetitoia?'

KITE E TE AKARONGO

⁵ I mua ake ka papetito ei, ka anoanoia koe **kia kite**

-
2. Eaa te tangata Etiopia i inangaro ei kia papetitoia aia?
 3. (a) Eaa te akauenga ta Iesu i oronga ki tana au pipi? (e) Ka akapeea tikai me papetito i tetai tangata?
 4. Eaa ta toou papetitoanga e akaari maira ki etai ke?
 5. (a) Eaa te mea mua taau ka rave i mua ake ka papetitoia ai koe? (e) No teaa i puapinga ai te au uipaanga Kerititiano?

no runga ia Iehova e Iesu. Kua akamata ke ana koe i te rave i teia i te apii anga koe i te Pipiria. (**E tatau ia Ioane 17:3.**) Inara kare tera e rava. Akakite te Pipiria e kia “akakiia mai kotou i te kite” no runga i te anoano o Iehova. (Kolosa 1:9) Ka tauturu te au uipaanga a te Au Kite o Iehova ia koe, kia rauka te pirianga mou kia Iehova. Tetai tumu puapinga tera i anoanoia ai ki tae putuputu koe ki teia au uipaanga.—Ebera 10:24, 25.

6 Kare a Iehova e tapapa mai kia kite koe i te au apiianganga pouroa a te Pipiria i mua ake ka papetito ei. Kare aia i tapapa ana kia kite te tangata Etiopia i te au mea ravarai i mua ake ka papetito ei. (Angaanga 8: 30, 31) Kare tatou e akamutu i te apii no runga ia Iehova. (Koheleta 3:11) Me ka papetito koe, ka anoanoia koe kia apii e kia āriki i te au apiianganga tumu a te Pipiria.—Ebera 5:12.

7 Akakite te Pipiria: “Kare ra e akarongo ra kare rava aia e mareka.” (Ebera 11:6) Ka anoanoia kia rauka te akarongo i mua ake ka papetito ei. Akakite te Pipiria e kua rongoro tetai aronga i Korinetia i ta te au pipi a Iesu e apii ra e “kua akarongo, e bapetizoia iora.” (Angaanga 18:8) Kua tauturu taau apii Pipiria ia koe kia rauka te **akarongo** i roto i ta Iehova au taputou, e i roto i ta Iesu atinga te ka riro ei akaora ia tatou mei te ara e te mate.—Iosua 23:14; Angaanga 4:12; 2 Timoteo 3:16, 17.

AKAKITE I TE TUATUA MOU O TE PIPIRIA KI ETAI KE

8 Ia koe e apii ra i te Pipiria e te kite ra koe te

6. Eaa te maata te ka anoanoia koe kia kite no runga i te Pipiria i mua ake ka papetitoia ai koe?

7. Akapeea taau apii Pipiria i te tauturu anga ia koe?

8. Eaa te ka akakeu ia koe kia akakite i taau i apii ki etai ke?

puapinga o te reira i roto i toou oraanga, ka ketaketa roa atu toou akarongo. Ka inangaro koe te **akakite i taau e apii ra ki etai ke**. (Jeremia 20:9; 2 Korinetia 4:13) Koai ra taau ka akakite?

9 Penei ka inangaro koe i te akakite ki toou ngutuare tangata, toou au oa, e toou au oa angaanga i taau e apii ra. Mea meitaki tera, inara kia rave koe ma te maru e te akaaka. I te openga ka rauka ia koe kia piri ki te putu-putuanga i te tutu aere i te tuatua meitaki ki etai ke. Me papa koe, tuatua atu ki te Kite e apii ra ia koe, akakite kiaia e ka inangaro koe te piri ki te putuputuanga i roto i te angaanga tutu evangeria. Me papu iaia e kua papa koe, e te rotai ra toou oraanga ki te au turanga o te Pipiria, e aravei atu korua i te aronga pakari o te putuputuanga.

10 Eaa te ka tupu i ko i tera uipaanga? Ka tuatua te aronga pakari kia koe i te akapapu me te mārama ra koe e me te irinaki ra i te apiianganga tumu a te Pipiria, me te akono ra koe i ta te reira e akakite ra e me kua inangaro tikai koe kia riro ei Kite no Iehova. Na te aronga pakari e akono ana i te katoatoa i roto i te putuputuanga e koe katoa. No reira eiaa e matakū i te tuatua kia ratou. (Angaanga 20:28; 1 Petero 5:2, 3) Ka akakite atu ratou a muri ake me ka aru rai koe i te putuputuanga i te tutu evangeria.

11 Ka akamārama atu te aronga pakari eaa te au tauiaanga ka anoanoia koe kia rave i mua ake ka aru ei i te

9, 10. (a) Koai taau ka akakite i taau e apii ra? (e) Eaa taau ka rave me ka inangaro koe te aru i te putuputuanga i te tutu aere?

11. Eaa i puapinga ai kia rave i te au tauiaanga i mua ake ka aru ei i te putuputuanga i te tutu evangeria?

putuputuanga i te tutu evangeria. Eaa i anoanoia ai teia au tauiaanga? No te mea ko Iehova ta tatou e komono ra me tuatua ki te tangata no runga i te Atua. No reira kia riro to tatou oraanga ei akakakā ia Iehova.—1 Korinetia 6:9, 10; Galatia 5:19-21.

TATARAARA E KIA ARIU MAI

12 E apinga ke mai tetai ka rave koe i mua ake ka papetito ei. Karanga a Paulo: “E teianeī, e **tataraara kotou**, e e ariu mai, kia taparaia ta kotou ara.” (Angaanga 3:19) Eaa te aiteanga o te tataraara? Kua tataraapa tikai koe no taau ara i rave. Ei akaraanga, me e oraanga akaturi toou, ka anoanoia koe kia tataraara. Noatu me kua tauta koe kia rave i te mea tika i roto i toou oraanga, ka anoanoia rai koe kia tataraara no te mea, e aronga ara tatou pouroa e ka anoanoia kia pati ia Iehova kia akakore mai ta tatou ara.—Roma 3:23; 5:12.

13 Ka rava ua ainei kia tataraara tatou no ta tatou i rave? Kare. Akakite a Petero e ka anoano katoaia tatou kia “**ariu mai**” koia oki kia akaruke takiri i tetai au tuu pevu tarevake o mua ana, e kia rave i te mea tika. Ei akatutu, te aere ra koe ki tetai ngai no te taima mua. Muri mai kua nakiro ia koe kua tarevake te mataara e aru ra koe. Eaa ra taau ka rave? Kare ekoko ka aere marie koe, tāpu, uri e akara, e oti aru i te mataara tika. Mei tera rai me apii koe i te Pipiria, penei ka kite koe i tetai au pevu e tetai au mea i roto i toou oraanga ka anoanoia koe kia tau. Kia papa ua i te “ariu mai”—koia oki i te rave i te au tauiaanga tei anoanoia—e oti rave i te mea tika.

12. Eaa te tumu i anoano pouroaia ai te tangata kia tataraara?

13. Eaa te aiteanga o te “ariu mai”?

RAVE I TAAU UAORAI AKATAPUANGA

14 Tetai takainga puapinga kia rave koe i mua ake ka papetito ei, kia **akatapu** i toou oraanga kia Iehova. Ka rave koe i tetai pure e ka taputou kia Iehova e koia anake ua taau ka akamori, e ko tona anoano te mea puapinga rava atu i roto i toou oraanga.—Deuteronomi 6:15.

15 Me taputou koe kia tavini ia Iehova anake, te taputou ra koe kia akapou toou oraanga ki tetai tei akaperepere roaia e koe. Akamanako ana i tetai tane e te vaine tei inangaro ia raua. Kia matau te tane i taua vaine ra, kua inangaro aia iaia e i te akaipoipo iaia. Kua papa aia i te āriki i teia apainga puapinga no te mea kua inangaro tikai aia i teia vaine.

16 Ia koe apii ra no runga ia Iehova, ka maata atu toou inangaro iaia e ka tauta atu rai koe. Ka akakeu teia ia koe kia pure e kia taputou e ka tavini koe iaia. Ko tei inangaro kia aru ia Iesu i na te Pipiria ai, “e akaruke aia iaia uaorai.” (Mareko 8:34) Eaa te aiteanga o tera? Ko te akarongo kia Iehova te mea mua i roto i toou oraanga. Ko to Iehova anoano tei puapinga rava atu i toou uaorai e i toou akakoroanga.—**E tatau ia 1 Petero 4:2.**

EIAA E MATAKU E KARE KOE VAI TIRATIRATU

17 Mataku tetai aronga i te akatapu ia ratou kia Iehova, e ake e kare e rauka ia ratou kia vai tiratiratu ki ta

14. Ka akapeea koe me akatapu i toou oraanga ki te Atua?

15, 16. Eaa te ka akakeu i tetai kia akatapu i tona oraanga kia Iehova?

17. No teaa tetai aronga kare e akatapu i to ratou oraanga kia Iehova?

ratou taputou kia tavini iaia. Kare ratou e inangaro i te akataitaia ia Iehova me kore te manako ra ratou e, me kare ratou i akatapuia kia Iehova, kare aia e akaapa mai i ta ratou ka rave.

18 Na toou inangaro no Iehova e tauturu ia koe kia kore e matakū e ka akataitaia koe iaia. No toou inangaro iaia ka tauta pakari koe kia vai tiratiratu ki taau i taputou kiaia. (Kohēleta 5:4; Kolosa 1:10) Kare i reira koe manako e ka ngatā i te rave i to Iehova anoano. Tata a Ioane: “Teia oki te inangaro i te Atua, ko te akono i tana au akauenga; kare oki tana au akauenga i te mea teiaa.”—1 Ioane 5:3.

19 Kare e anoania te tu apakore me akatapu i toou oraanga kia Iehova. Kare aia e tapapa mai i te reira. (Salamo 103:14) Ka tauturu ra aia ia koe kia rave i te mea tika. (Isaia 41:10) Irinaki ia Iehova ma to ngakau katoa, “e nana e akakite kia koe i toou ra au arataa.”—Maseli 3:5, 6.

KIA AAKI I TE TUATUA TIKA O TE ORA

20 Toou manako e kua papa koe i te akatapu i toou oraanga kia Iehova? Muri ake i toou akatapu anga ia koe kia Iehova, kua papa koe no te takainga ka aru mai. Ka anoania koe **kia papetito**.

21 Akakite ki te tauturu o te pupu aronga pakari o te putuputuanga e kua akatapu koe ia koe kia Iehova, e

18. Eaa te ka tauturu ia koe kia kore e matakū e ka akataitaia koe ia Iehova?

19. Eaa koe ka kore ei e matakū i te akatapu i toou oraanga kia Iehova?

20. Muri ake te akatapu anga ia koe kia Iehova, eaa te takainga ka aru mai?

21, 22. Akapeea koe me ‘aaki i te tuatua’ o toou akarongo?



I mua ake ka papetito ei,
ka anoanoia koe kia
apii i te Pipiria

Na te akarongo
e akakeu ia koe
kia akakite i taau e
irinaki ra ki etai ke




ka inangaro koe kia papetitoia. Ka akanoo
aia i etai aronga pakari kia uriuri akaou
kotou i te au apiianga tumu o te Pipiria.
Me akatika ratou e kua papa koe, ka aka-
kite atu ratou e kua tau koe kia papetito-
ia i ko i te akaputuputuanga me kore i te
uruoaanga a te Au Kite o Iehova ka aru
mai. E akoanga te ka raveia i reira i te aka-
mārama mai te aiteanga o te papetito. Ka

ui mai te vaa tuatua e rua uianga ki te aronga ka papetitoia. Me pau koe i teia nga uianga, te “aaki” ra koe i “te tuatua” no toou akarongo.—Roma 10:10.

22 E oti ka papetitoia koe. Ka taruku takiriiia koe ki roto i te vai. Me papetito koe ka kite te katoatoa e kua

Kua taputou ainei koe kia
lehoava e ka tavini koe iaia?

Me papetitoia koe,
te akaari ra koe e
kua inangaro koe te
rave i to lehoava anoano



akatapu koe i toou oraanga kia Iehova, e teiane i e Kite koe no Iehova.

AITEANGA O TOOU PAPETITOANGA

23 Akakite a Iesu e kia papetitoia tana au pipi 'i te ingoa o te Metua, e no te Tamaiti, e no te vaerua tapu.' (E tatau ia Mataio 28:19.) Eaa te aiteanga o teia? Kua āriki koe i to Iehova mana tutara, to Iesu turanga i roto i to te Atua akakoroanga, e ta te vaerua tapu tuanga i roto i te akatupuanga i tona anoano.—Salamo 83:18; Mataio 28:18; Galatia 5:22, 23; 2 Petero 1:21.

24 Akatutu mai te papetitoanga i tetai mea pua-pinga. Me tarukuia koe ki roto i te vai, te aiteanga kua mate koe me kore kua akaruke koe i toou tu oraanga i mua ana. Me kake mai koe mei roto i te vai, ka akamata koe i toou oraanga ou i te rave i to Iehova anoano. Ka tavini koe ia Iehova mei teiane i e aere ua atu. E akamaara e kua akatapu koe i toou oraanga kia Iehova e kare ki tetai tangata, akaaerenga me kore anga-anga.

25 Ka tauturu toou akatapuanga ia koe kia akatupu i tetai piriana oa mou kia Iehova. (Salamo 25:14) Me papetitoia tetai, kare te aiteanga e ka ora aia. Tata a Paulo: "E rave akaoti ua i to kotou uaorai ora ma te maku e te rutetete." (Philipi 2:12) E akamataanga ua te papetito. Ka akapeea ra koe te akapiri vaitata anga kia Iehova? Na te pene openga o teia puka e pau i teia ui-anga.

23. Eaa te aiteanga kia papetitoia 'i te ingoa o te Metua, e no te Tamaiti, e no te vaerua tapu'?

24, 25. (a) Eaa ta te papetitoanga e akatutu maira? (e) Eaa ta tatou ka uriuri i roto i te pene openga?

TE TIKA 1

KA TAU AINEI
KIA PAPETITOIA AU?

“I na e vai teia, eaa au nei e kore ei e bapetizoia?”

—Angaanga 8:36

No teaa au ka papetito ei e ka akapeea?

Me papetito koe, te akaari ra te reira e kua akaruke koe i toou oraanga i mua ana e kua akamata i tetai oraanga ou i te rave i to lehova anoano.

Mataio 28:19, 20

Kia tavini ia lehova, ka anoanoia koe kia papetito.

Salamo 40:8

Me papetito koe, akaari mai

te reira e kua inangaro koe i te tavini i te Atua.

Mataio 3:16

Kia taruku takiriia koe ki roto i te vai mei ia Iesu rai.

TE TIKA 2

KARE ROA IEHOVA
E TAPAPA MAI I TETAI MEA
KARE E RAUKA IA KOE

“Teia oki te inangaro i te Atua, ko te akono i tana au akauenga; kare oki tana au akauenga i te mea teiaa.”—1 Ioane 5:3

No teaa koe ka kore ei e matakū i te akatapu ia koe kia lehova?

Salamo 103:14; Isaia 41:10

Kare e anoanoia te tu apakore me akatapu ia koe kia lehova. Ka tauturu aia ia koe kia rave i te mea tika.

Kolosa 1:10

Na toou inangaro no lehova e tauturu ia koe kia kore e matakū e ka akataitaia koe iaia.

TE TIKAI 3**AU TAKAINGA I MUA
AKE KA PAPETITO EI**

“E mea tau naku te rave i toou anoano, e taku Atua; te vai nei oki taau ture tei roto i toku nei ngakau.”—Salamo 40:8

Eaa te ka anoanoia kia rave koe me akatapu i toou oraanga kia lehova?

Ioane 17:3

APII I TE TUATUA A TE ATUA
Anoanoia kia kite ia lehova e ia Iesu Mesia. Te maata atu i taau ka kite no runga ia raua, maata atu toou inangaro ia raua.

Ebera 11:6

**AKAMATUTU I TOOOU
AKARONGO**
E irinaki pu tikai i roto i ta lehova au taputou e te mana o ta Iesu atinga kia akaora ia tatou mei te ara e te mate.

Angaanga 3:19

TATARAARA
Te aiteanga, kua tatarapa tikai koe no taau au tarevake i rave.

ARIU MAI

Te aiteanga, kia akamutu koe i te rave i tetai ua atu peu tarevake e kia rave i te mea tika.

1 Petero 4:2

AKATAPU I TOOOU ORAANGA
Te akatapu ra koe i toou oraanga kia lehova me taputou koe na roto i te pure e koia taau ka akamori, e ko tona anoano te mea puapinga roa atu i roto i toou oraanga.

NOO VAITATA UA RAI KIA IEHOVA

AKAMANAKO ana e tei vao koe e aere ra i tetai rā kino-kino te reva. Te akapouri maira te tumurangi e te rapa-rapa ra te uira. Kare i roa ana, aruru mai te mangungu e oti akamata te ua. Oro koe te kimi ngai akaruruanga. Rekareka koe te kitea anga tetai ngai ruru e te marō!

² Mei tera rai to tatou turanga i teia tuatau. Te kino ua atura teia ao. Penei ka ui koe, ‘Ka aere ra au kiesa akaruru ei?’ Akakite te Pipiria: “Te tuatua nei au kia Iehova, ko koe toku akapuanga, e toku pinanga; taku Atua, e taku i irinaki nei.” (Salamo 91:2) Ka oronga mai a Iehova i te tauturu no tatou i teiane, e te manakonoanga no te tuatau ki mua.

³ Akapeea a Iehova me paruru ia tatou? Ka tauturu aia ia tatou kia rave i te au ikianga tau no to tatou manamanata. Ririnui atu Aia i te aronga ka akakoro kino ia tatou. Me tupu tetai mea kino kia tatou, kia papu e ka takore aia i te reira a te tuatau ki mua. Akamaroiroi mai te Pipiria kia noo tamou tatou i roto i te aroa o te Atua. (Iuda 21) Ka anoanoia kia noo vaitata ua rai tatou kia Iehova kia rauka tana tauturu i te au tuatau ngatā. Akapeea tatou me rave i teia?

ARIU ATU KI TO IEHOVA AROA

⁴ E rauka ai kia noo vaitata ua rai kia Iehova, ka anoanoia tatou kia kite e mei teaa tikai te maata o tona

1, 2. Ka aere tatou kiesa akaruru ei i teia tuatau?

3. Akapeea tatou te akariro anga ia Iehova ei akapuanga no tatou?

4, 5. Akapeea a Iehova te akaari mai anga i tona inangaro no tatou?

inangaro ia tatou. Akamanako ana i ta Iehova i rave no tatou. Oronga mai aia i te enua manea, akaki ki te manu e te au tu rakau ruperupe. Oronga mai Aia i te au kai reka e te vai mā ei inu. Apii aia ia tatou i tona ingoa e tona au tu umere na roto i te Pipiria. Tei maata roa atu, kua tono mai aia i tana Tamaiti akaperepere ia Iesu ki te enua nei, kia oronga i tona ora no tatou. (Ioane 3:16) No taua atinga ra i rauka ai ia tatou te manakokoanga mou no te tuatau ki mua.

⁵ Oronga mai a Iehova i te Patireia o te Mesia, Tona kavamani i te rangi kia takore pouroa i te kino. Ka akariro te Patireia i te enua ei parataito. Ka noo au ua te tangata ma te mataora e tuatau ua atu. (Salamo 37:29) Apii katoa mai a Iehova akapeea e rauka ai ia tatou te oraanga meitaki rava atu i teiane. Pati katoa mai aia kia pure tatou kiaia, e kua papa ua aia i te akarongo mai i ta tatou pure. Taka meitaki ua to Iehova inangaro no tatou ravarai.

⁶ Akapeea koe me ariu atu ki to Iehova aroa? Akameitaki iaia ma te ngakau katoa no Tana au mea i rave noou. Te mea taitaia ra, kare te manganui e akameitaki ana iaia. Mei tera rai i to Iesu tuatau. Tetai atianga, kua akaora aia e tai ngauru aronga repera, inara **okotai rai** tei akameitaki iaia. (Luka 17:12-17) Kia aite tatou mei taua tangata ra e kia akameitaki ua rai ia Iehova.

⁷ Ka anoanoia tatou kia akaari i to tatou inangaro no Iehova. Akakite a Iesu ki tana au pipi kia inangaro ia Iehova ma to ratou ngakau, vaerua e te manako katoa. (**E tatau ia Mataio 22:37.**) Eaa ra te aiteanga o teia?

6. Ka akapeea ra koe me ariu atu ki to Iehova aroa?

7. Mei teaa ra te maata o to tatou inangaro ia Iehova?

8 Ka rava ua ainei kia karanga e te inangaro ra tatou ia Iehova? Kare. Me e inangaro to tatou ia Iehova ma te ngakau, vaerua e te manako katoa, ka akaari mai ta tatou angaanga i te reira. (Mataio 7:16-20) Taka ua te apii a te Pipiria e me e inangaro to tatou ia Iehova, ka akono tatou i tana akauenga. E ngatā ainei? Kare ta Iehova “akauenga i te mea teiaa.”—E tatau ia 1 Ioane 5:3.

9 Me akarongo tatou ia Iehova, mataora te oraanga e te mareka ua. (Isaia 48:17, 18) Eaa ta tatou ka rave kia noo vaitata ua kia Iehova? Ka akara ana tatou.

AKAVAITATA UA RAI KIA IEHOVA

10 Akapeea koe i riro ei ei oa no Iehova? Na roto i taau apii Pipiria i kite ei koe no runga ia Iehova e kua akatupu i tetai pirianga oa kiaia. Aite rai teia pirianga oa ki te a’i, ka inangaroia kia kā ua kia kore e mate. Mei te a’i rai ka inangaroia tetai vaie e kā ei, ka anoanoia koe kia apii ua atu rai no runga ia Iehova kia vai matutu ua toou pirianga oa kiaia.—Maseli 2:1-5.

11 Ia koe e apii ra i te Pipiria, ka akakeuia toou ngakau e te au mea taau e apii ra. Mei tera rai tetai nga pipi a Iesu iaia e akamārama ra i te au totou a te Pipiria. Karanga raua e: “Kare aina i maana rava to taua ngakau, ka tuatua mai ei aia kia taua i te arataa ra, ka akataka mai ei aia i te tuatua i tataia ra?”—Luka 24:32.

12 Mei tera nga pipi rai i to raua mārama anga i te

8, 9. Akapeea tatou me akaari kia Iehova e te inangaro ra tatou iaia?

10. Eaa te tumu ka anoanoia ai kia apii ua rai no runga ia Iehova?

11. Eaa ta te apiianga a te Pipiria ka akatupu kia koe?

12, 13. (a) Eaa te ka tupu ki to tatou inangaro no Iehova me kare tatou e matakite? (e) Eaa ta tatou ka rave kia vai ua rai to tatou inangaro no Iehova?

Tuatua Tapu, kua akakeuia to raua ngakau. Penei mei tera rai koe i toou mārāma anga i te Pipiria. Tauturu teia ia koe kia kite ia Iehova e kia inangaro iaia. Eiaa roa toou inangaro Iaia kia ngaro.—Mataio 24:12.

13 Me riro koe ei oa no Iehova, tauta kia ngaueue kore toou pirianga oa kiaia. Apii atu rai no runga Iaia e Iesu, akamanako marie no runga i te reira e oti aru i taau i apii. (Ioane 17:3) Me tatau e me apii koe i te Pipiria, ui kia koe uaorai: ‘Eaa ta teia e apii maira iaku no runga ia Iehova? No tea i anoanoia ai kia inangaro au Iaia ma toku ngakau e te vaerua katoa?’—1 Timoteo 4:15.

14 Me e oa piri tikai toou, ka tuatua ua rai koe kiaia e ka akamatutu teia i to korua pirianga oa. Me tuatua

14. Akapeea te pure te tauturu anga kia vai matutu ua to tatou inangaro no Iehova?

Mei te a’i e anoanoia ra te vaie
kia kā ua, ka anoano katoaia
koe kia apii atu rai kia matutu
ua toou inangaro no Iehova



putuputu tatou kia Iehova na roto i te pure, ka vai matutu ua to tatou inangaro Nona. (E tataua ia 1 Tesalonia 5:17.) E apinga aroa te pure na to tatou Metua i te rangi. Kia tuatua ua rai tatou kiaia ma te ngakau tae. (Salamo 62:8) Eiaa e tamou ngakau, eiaa taokioki i taua pure rai, kia tae tikai ra toou ngakau i taau e tuatua ra. Me apii ua rai tatou i te Pipiria, me pure ma te ngakau tae, ka matutu ua to tatou inangaro no Iehova.

TUATUA KI ETAI KE NO RUNGA IA IEHOVA

15 Me ka inangaro tatou kia noo vaitata ua kia Iehova, tuatua ki etai ke no runga i to tatou akarongo. E akameitakianga teia kia tuatua no runga ia Iehova. (Luka 1:74) Oronga mai a Iesu i teia apainga na te au Kerititiano mou. No reira kia tutu aere tatou pouroa i te tuatua meitaki o te Patireia o te Atua. Kua rave ake ainei koe i teia?—Mataio 24:14; 28:19, 20.

16 Mea puapinga te angaanga orometua kia Paulo, karanga aia e e apinga akaperepereia teia. (2 Korinetia 4:7) Te angaanga puapinga rava atu, kia akakite ki etai ke no runga ia Iehova. E mataara tau teia noou kia tavini ia Iehova, e te akaperepere maira aia i taau e rave ra. (Ebera 6:10) Ka puapingaia koe e te aronga ka akarongo mai, no te mea te tauturu ra koe ia ratou e koe katoa, kia noo vaitata ua rai kia Iehova e kia rauka te ora mutukore. (E tataua ia 1 Korinetia 15:58.) E angaanga ke atu ainei tetai te ka apai mai te merengo maata noou mei teia te tu?

17 E mea rapurapu te angaanga tutu evangeria. Kia

15, 16. Mei teaa ra toou manako no runga i te angaanga orometua?

17. No teaa i riro ei te angaanga orometua ei mea rapurapu?

“akakite ua koe i te tuatua,” e “kia tamou marie rai.” (2 Timoteo 4:2) Ka anoanoia kia rongu te tangata i te nuti o te Patireia o te Atua. Akakite te Pipiria: “Kua vaitata te rā maata o Iehova, kua vaitata, e te rapurapu roa maira” e “kare e tavarevare” te openga. (Zephania 1:14; Habakuka 2:3) Kare e roa atu ka takore a Iehova i to Satani ao. Ka anoanoia kia kite te tangata, kia rauka ia ratou te iki kia tavini ia Iehova.

18 Inangaro a Iehova i te au Kerititiano mou kia akamori kapiti iaia. “E akono marie rai tatou tetai ki tetai, ka akamaroiroi atu ei kia maata te aroa, e i te angaanga memeitaki ra: Auraka e akaruke i to tatou akaputupuanga mei ta tetai aronga, ka akamaroiroi ra, e kia maata atu rai te maroiroi, no te mea te akara na kotou i taua rā ra i te vaitata anga mai.” (Ebera 10:24, 25) Tauta kia tae ki te au uipaanga pouroa. E taime meitaki teia te akamaroiroi e te akamatutu i tetai e tetai.

19 Me tae koe ki te uipaanga, ka aravei koe i te au oa te ka tauturu ia koe te akamatutu i toou pirianga kia Iehova. Tukeke te au taeake e te au tuaine taau ka aravei, e tavini maroiroi ra ia Iehova mei ia koe rai. E aronga apa ua ratou, e e tarevake ana mei ia koe rai. Me tupu teia, akakoromaki ma te akakore i to ratou apa. (**E tatau ia Kolosa 3:13.**) Akara i to ratou au tu memeitaki, ka tauturu te reira ia koe kia inangaro ia ratou e kia akapiri vaitata roa atu kia Iehova.

18. No teaa tatou e te au oa Kerititiano mou ka akamori kapiti ei ia Iehova?

19. Eaa te ka tauturu ia tatou kia inangaro i to tatou au taeake e te au tuaine Kerititiano?

TE ORA MUTU KORE

20 Inangaro a Iehova i te oraanga meitaki roa atu no tona au oa. Apii mai te Pipiria ia tatou e, ka tuke takiri to tatou oraanga a te tuatau ki mua.

21 Ka ora tatou e mutu kore ua atu, kare e 70 ua me kore e 80 mataiti. Ka rauka ia tatou te “ora mutu kore,” te turanga au e te mataora i roto i te parataito. Ko teia oraanga ta te Pipiria e karanga ra e ko “te ora mutu kore.” Kua taputou mai a Iehova i teia, inara ka anoanoia tatou kia mou piri tikai i te reira.—1 Timoteo 6: 12, 19.

22 Akapeea tatou me mou piri tikai i te “ora mutu kore”? Kia “takinga-meitaki” e ‘kia apingaia i te anganga meitaki.’ (1 Timoteo 6:18) E taangaanga i ta tatou e apii ra i roto i te Pipiria. Kare e rauka te “ora mutu kore” i to tatou uaorai maroiroi. Kare e rauka ia tatou te oko i te ora mutu kore. E apinga aroa teia na Iehova ki tona au tavini, e akaraanga teia no tona “aroa ua.” (Roma 5:15) Inangaro to tatou Metua i te rangi i te oronga i teia apinga aroa no tona au tavini tiratiratu.

23 E ui kia koe uaorai, ‘Te akamori ra ainei au ia Iehova na te mataara tana i inangaro?’ Me ka anoanoia kia rave i tetai au tauiaanga, akamata i teiane. Me irinaki tatou ki runga ia Iehova e me akarongo iaia, ka riro aia ei akapuanga no tatou. Ka paruru aia i tona iti tangata tiratiratu i teia au rā openga o to Satani ao kino. Ka akapapu a Iehova kia noo tatou i roto i te

20, 21. Eaa “te ora mutu kore”?

22. (a) Akapeea e rauka ai ia tatou kia mou piri tikai i te “ora mutu kore”? (e) No teaa kare e rauka ia tatou te oko i te ora mutu kore?

23. Eaa te tumu ka anoanoia ai kia rave koe i te au ikianga tau i teiane?

Parataito e mutu kore ua atu mei tana i taputou mai.
Ka rauka ia koe te ora mutu kore me rave koe i te iki-
anga tau ma te pakari i teiane!

Inangaro a lehova kia rauka
ia koe te "ora mutu kore."
Ka inangaro ainei koe?



TE TIKA 1

INANGARO A IEHOVA IA KOE

“I aroa mai te Atua i to te ao nei, kua tae rava ki te oronga anga mai i tana Tamaiti anau tai, kia kore e mate te akarongo iaia, kia rauka ra te ora mutu kore.”—Ioane 3:16

Akapeea a Iehova te akaari mai anga i tona inangaro noou?

Salamo 91:2

Ko Iehova to tatou akapuanga. Ka oronga mai aia i te tauturu no to tatou manamanata i teiani.

Salamo 37:29

Kua oronga mai aia i te

manakonakoanga no tatou no te tuatau ki mua.

1 Timoteo 6:12, 19

Ka oronga mai a Iehova i te ora mutu kore e te au mea memeitaki anake. Ka noo tatou ma te au, te mataora e kare e maki i roto i te parataito.

TE TIKA 2

INANGARO A IEHOVA KIA INANGARO KOE IAIA

“E anoano atu koe i to Atua ia Iehova ma to ngakau katoa, e ma to vaerua katoa, e ma to manako katoa.”—Mataio 22:37

Eaa ta te aroa o te Atua e akakeu ra ia koe kia rave?

Luka 17:12-17

Akameitaki ia Iehova no tana au mea ravarai i rave noou.

Mataio 7:16-20

Akaari i toou inangaro no

Iehova, rave i tona anoano i te au rā ravarai.

1 Ioane 5:3

Akono i ta Iehova au akauenga.

1 Timoteo 6:18

Takinga meitaki i etai ke.

TE TIKA 3**KIA VAI MATUTU UA TOOOU
INANGARO NO IEHOVA**

‘Tamou tikai kotou i to kotou uaorai inangaro i roto i te aroa o te Atua.’—Iuda 21

Eaa te ka tauturu ia koe kia noo vaiata ua kia lehova?

1 Tesalonia 5:17

Pure putuputu.

Mataio 28:19, 20;**2 Timoteo 4:2**

Tauta i taau ka rauka kia tuatua atu ki etai ke no runga i te Patireia o te Atua.

Maseli 2:1-5

Apii ua atu rai no runga ia lehova.

Ebera 10:24, 25

Kia tae putuputu ki te uipaanga. Ka tauturu te au taeake ia koe te akamatutu i toou pirianga kia lehova.

1 IEHOVA

Ko lehova to te Atua ingoa, te aiteanga “Ka Akatupu Aia.” Ko lehova te Atua mana katoatoa, nana i anga i te au mea ravarai. E mana tona kia rave i tetai ua atu mea tana i inangaro.

E ā reta o te ingoa o te Atua i roto i te reo Ebera. Te reo Papaa, e YHWH e te JHVH. Ka kiteaia te ingoa o te Atua waitata rai e 7,000 taime i roto i te tataanga mua o te Pipiria i te reo Ebera. Takapini i teia ao, e tuatuaia ana te ingoa o lehova na roto i te mataara tei matauia i roto i te au reo tukeke.

► Pene. 1, para. 15

2 TE PIPIRIA “E MEA AKAURUIA MAI E TE ATUA”

Na te Atua te Pipiria, inara kua taangaanga aia i tetai au tangata kia tata i te reira. Mei te pu rai o tetai pitiniti tei pati i tona tekeretere kia tata i tona au manako i roto i tetai reta. Kua taangaanga te Atua i tona vaerua ei arataki i te aronga tata Pipiria kia tata i tona au manako. Tukeke te mataara e akakeu ana te vaerua o te Atua ia ratou. Tetai taime na roto i te orama e te moemoea e oti, tata ratou i te reira.

► Pene. 2, para. 5

3 AU KAVEINGA PIPIRIA

E au apiiangā teia i roto i te Pipiria ei tauturu ia tatou kia rave i te au ikianga tau. Ei akaraanga, te kaveinga “e kino te tuatua meitaki i te kapitianga kikino,” me e tu meitaki e me e tu kino to te aronga e akaoa ra tatou, ka piri mai rai to ratou tu ki runga ia tatou. (1 Korinetia 15:33) Te kaveinga “ko ta te tangata e ruru ra, ko tana ra ia e kokoti,”

me rave tatou i te kino, e kino rai te ka tupu e kare rauka i te kape.—Galatia 6:7.

► Pene. 2, para. 12

4 TOTOU

E karere teia na te Atua. Penei e akatakaanga no runga i to te Atua anoano, me kore e kaveinga no te mea tika e te tarevake, e akauenga me kore e tukuanga tika. Tetai taime e karere no runga i tetai mea ka tupu a te tuatau ki mua. E maata te totou Pipiria kua tupu takere.

► Pene. 2, para. 13

5 AU TOTOU NO IESU MESIA

Maata te au totou Pipiria no te Mesia tei akatupuia i roto ia Iesu. Akara i te pia “Au Totou no Runga i te Mesia.”

► Pene. 2, para. 17.

6 TO IEHOVA AKAKOROANGA NO TE ENUA

Anga a Iehova i te enua ei parataito no te aronga tei inangaro iaia. Kare i tau i tona akakoroanga. Kare e roa atu ka takore Aia i te kino e ka oronga mai i te ora mutu kore no tona iti tangata.

► Pene. 3, para. 1

7 SATANI TE TIAPORO

Ko Satani te angera tei akatupu i te meameaau ki te Atua. Tona ingoa Satani, te aiteanga “Tei Patoi,” no te mea kua patoi aia ia Iehova. Kapikiia aia e Tiaporo, te aiteanga e “Pikikaa,” no te mea kua pikikaa aia no runga ia Iehova ei akavare i te tangata.

► Pene. 3, para. 4

AU TOTOU NO RUNGA I TE MESIA

TEI TUPU	TOTOU	AKATUPUANGA
Anauia i te uanga o Iuda	Genese 49:10	Luka 3:23-33
Anauia i te tamaine paretenia	Isaia 7:14	Mataio 1:18-25
E uanga no te Ariki ko Davida	Isaia 9:7	Mataio 1:1, 6-17
Akakite a Iehova e Tamaiti a Iesu Nana	Salamo 2:7	Mataio 3:17
Maata te tangata kare i irinaki e ko Iesu te Mesia	Isaia 53:1	Ioane 12:37, 38
Aere ki Ieruselema na runga i te atini	Zekaria 9:9	Mataio 21:1-9
Pikikaaia e te oa piri	Salamo 41:9	Ioane 13:18, 21-30
Pikikaaia, okoia e 30 moni ario	Zekaria 11:12	Mataio 26:14-16
Muteki ua aia i tona akaapaia anga	Isaia 53:7	Mataio 27:11-14
Kua tua kelero ratou i tona pereue	Salamo 22:18	Mataio 27:35
Aviriiia aia i runga i te satauro	Salamo 22:7, 8	Mataio 27:39-43
Kare tona au ivi i aatiia	Salamo 34:20	Ioane 19:33, 36
Tanumia ki o te aronga apinga nui	Isaia 53:9	Mataio 27:57-60
Tona tuakaouanga	Salamo 16:10	Angaanga 2:24, 27
Akatu akaouia mai ki te rangi i te rima katau o te Atua	Salamo 110:1	Angaanga 7:55, 56

8 AU ANGERA

Anga a lehova i te au angera i mua roa ake ka anga ai i te enua. Angaia ratou kia noo i te rangi. Tere atu i te anere mirioni angera. (Daniela 7:10) E ingoa to ratou, tukeke to ratou tu mei te tu tiratiratu e te maru, kare ratou e inangaro kia akamori te tangata ia ratou. Tukeke to ratou taoonga e ta ratou angaanga. Tetai pae, ki mua i te terono o lehova, ko etai e kave karere, paruru e te arataki i Tona au tavini i te enua nei, rave i Tana au tukuanga tika e te turuturu i te angaanga tutu evangeria. (Salamo 34:7; Apokalupo 14:6; 22:8, 9) A te tuatau ki mua ka tamaki kapiti ratou e Iesu i roto i te tamaki o Aramagido. —Apokalupo 16:14, 16; 19:14, 15.

► Pene. 3, para. 5; Pene. 10, para. 1

9 ARA

Tetai ua atu mea i roto i toou ngakau, toou manako, e taau e rave ra tei patoi ia lehova e tona anoano, e ara ia. Ka takino te ara i to tatou pirianga kia lehova. Oronga mai aia i te ture e te au kaveinga ei tauturu ia tatou kia kopae i te ara. I muatangana, apa kore te au mea ta lehova i anga. Akarongo kore a Adamu e Eva laia, ara raua, ruaine e kua mate. I te mea kua iiri mai ta raua ara ki runga ia tatou, ka ruaine katoa tatou e ka mate.

► Pene. 3, para. 7; Pene. 5, para. 3

10 ARAMAGIDO

Na te Atua teia tamaki ei takore i to Satani ao e te au kino pouroa.

► Pene. 3, para. 13; Pene. 8, para. 18

11 PATIREIA O TE ATUA

E kavamani te Patireia o te Atua ta Iehova i akanoo i runga i te rangi. Ko Iesu Mesia tona Ariki e tutara maira. A te tuatau ki mua, ka takore to Iehova kavamani i te au kino pouroa. Ka tutara te Patireia o te Atua ki rungao i te enua.

► Pene. 3, para. 14

12 IESU MESIA

Kua anga te Atua ia Iesu i mua ake i te au mea ravarai. Tono mai a Iehova ia Iesu ki te enua nei kia mate no te katoatoa. Akatu akaou mai Aia ia Iesu i muri ake i tona tamateangaia. Teiane, e Ariki a Iesu no te Patireia o te Atua e tutara maira i te rangi.

► Pene. 4, para. 2

13 TE TOTOU O TE 70 EPETOMA

Kua totou te Pipiria e aea te Mesia e ma'ma mai ei. Ka tupu teia i te openga o te tuatau tei karangaia e ko te 69 epetoma, tei akamata i te 455 M.T.N. ki te 29 T.N.

Akapeea tatou i kite ei e i ope te reira i te 29 T.N.? Akamata te 69 epetoma i te 455 M.T.N. i to Nehemia tae anga ki Ierusalem e kua akamata i te patu akaou i te oire. (Daniela 9:25; Nehemia 2:1, 5-8) Me taikua te tuatua "tai tatini," ka manako tatou i te numero 12. Pera rai te tuatua "tai epetoma," ka maara tatou i te numero 7. Te au epetoma i roto i te totou kare i te au epetoma itu rā, e au epetoma itu mataiti. Rotai teia ki te tareanga rā a te totou Pipiria, "okotai rā okotai ia mataiti." (Numero 14:34; Ezekielia 4:6) Te aiteanga, e tai epetoma e itu mataiti, te 69 epetoma e 483 mataiti (69 x 7). Me tare e 483 mataiti mei te 455 M.T.N., ka tae tatou ki te 29 T.N. Teia te mataiti i papetitoia ai a Iesu e i roto ei aia, ko te Mesia!—Luka 3:1, 2, 21, 22.

Akakite taua totou rai i tetai epetoma ke mai, e itu akaou mai mataiti. I roto rai i taua tuatau ra o te 33 T.N., ka tamateia te Mesia, e oti akamata i te 36 T.N., ka tutu aerea te tuatua meitaki o te Patireia o te Atua ki te pa enua ravarai, kare ki te ngati luda ua.—Daniela 9:24-27.

► Pene. 4, para. 7

'ITU NGAURU EBEDOMA'

490 mataiti

'itu ebedoma'
(49 mataiti)

'ono ngauru ma
rua ebedoma'
(434 mataiti)

'tai ebedoma'
(7 mataiti)

455

406

◀ M.T.N. | T.N. ▶

29

33

36

"Te tuatua,
i te rave akaou
e te patu . . . ia
Ierusalem"



Patu akaouia
Ierusalem



Tae mai te
Mesia



'Tipu keia'
te Mesia



Ope te
'itu ngauru
ebedoma'



14 APIIANGA PIKIKAA O TE TORU TAI

Apii mai te Pipiria e na te Atua na lehova i anga ia tatou. Anga Aia ia Iesu i mua roa ake i te au mea ravarai. (Kolosa 1:15, 16) Kare ko Iesu te Atua Mana Katoatoa. Kare roa aia i karanga ana e aiteite aia ki te Atua. Akakite ra aia e: “E maata oki toku Metua iaku.” (Ioane 14:28; 1 Korinetia 15:28) Inara te apii nei te au akonoanga i te apiianga Toru Tai, koia oki e toru iā aronga i roto i te Atua: te Metua, te Tamaiti e te vaerua tapu. Kare te tuatua “Toru Tai” i roto i te Pipiria. E apiianga pikikaa teia.

Ko te vaerua tapu, ko to lehova iā mana ririnui kitea koreia tana e taangaanga nei, ei rave i tona anoano. Kare te reira i te tangata. Akaraanga, te au Kerititiano o mua ana, ‘kua ki akera ratou ravarai i te vaerua tapu,’ e kua tuatua maira a lehova: ‘E riringi atu ei au i taku vaerua ki rungao i te tangata ravarai.’—Angaanga 2:1-4, 17.

► Pene. 4, para. 12; Pene. 15, para. 17

15 TE CROSS

Me akamori te au Kerititiano mou, kare ratou e taangaanga ana i te cross. Eaa te tumu?

(1) Manganui te au mataiti i taangaanga ana te akonoanga pikikaa i te cross, i roto i te akamorianga i te au mea natura e te au peu ainga a te etene. Te 300 mataiti mua i muri ake i te mate o Iesu, kare te cross i te tuanga no te akamorianga Kerititiano. No muri roa mai, akariro a Constantine te Tutara o Roma i te cross ei tuanga no te akonoanga Kerititiano ei akaepaepa i te akonoanga. Inara kare takiri o te cross pirianga kia Iesu Mesia. Akakite te *New Catholic Encyclopedia* e: “Ka kitea te cross i roto i te peu a te au iti tangata o mua ake e i muri ake i te tuatau Kerititiano.”

(2) Kare a Iesu i mate i runga i te *cross*. Te au tuatua Ereni tei uriia ei “*cross*,” to ratou aiteanga “e rakau tikitika ua,” “e rakau,” “e tumu rakau.” Akamārama mai *The Companion Bible* e: “Kare takiri e apinga i roto i te reo Ereni o te [Koreromotu Ou] e karanga ra e e rua potonga rakau.” I mate a Iesu i runga i te rakau tikitika ua.

(3) Kare a Iehova e inangaro ia tatou kia akamori i te au apinga tei maaniia ei itoro, pera te au mea mei te tiki e te vai atura.—Exodo 20:4, 5; 1 Korinetia 10:14.

► Pene. 5, para. 12

16 TE AKAMAARAANGA

Akaue a Iesu i tana au pipi kia rave i te Akamaaraanga no tona mate. Rave ratou i teia i te rā 14 o Nisana i te au mataiti. Te rā rai teia e akamaara ana te ngati Iseraela i te Pasa. Akatutu mai te varaoa e te uaina i te kopapa e te toto o Iesu, ka tukuia teia kia akara te katoatoa i ko i te Akamaaraanga. Te aronga ka tutara e Iesu i te rangi, ko ratou te ka kai i te varaoa e te ka inu i te uaina. Ka tae katoa te aronga ka ora e mutu kore ua atu i te enua nei, kare ra ratou e kai i te oroa.

► Pene. 5, para. 21

17 SOUL

Roto i te Pipiria, kua akatakaia mai te tuatua “*soul*,” (1) ei tangata, (2) ei manu, (3) ei oraanga no tetai tangata me kore no tetai manu. Teia tetai au akaraanga:

Ei tangata. Te akakite maira a Genese 2:7 e i te anga mai anga te Atua ia Adamu, “riro akera te tangata ei tangata ora.”

Ei manu. No runga i te vai diluvi, akakite mai te Pipiria, “E ope takiri roa akera te au mea ora katoa i keukeu aere i runga i te enua nei i te mate, te au manu, e te puaka, e te manu taae.”—Genese 7:21.

Te oraanga o tetai tangata e to te manu. Akakite a Iehova kia Mose: “Kua ope oki te au tangata i kimi mai ia koe ra kia mate.” (Exodo 4:19) Ia Iesu i te enua nei akakite aia: “Ko au te tiaki mamoe meitaki ra: ka oronga te tiaki mamoe meitaki i tona uarai ora no te mamoe.”—Ioane 10:11.

Tetai, me rave tetai tangata i tetai apinga ma tona “vaerua [sou/] katoa,” tera te aiteanga ka rave aia i te reira ma te tae tikai o tona ngakau.—Mataio 22:37; Deuteronomi 6:5.

► Pene. 6, para. 5; Pene. 15, para. 17

18 VAERUA

Te tuatua reo Ebera e te reo Ereni tei uriia ei “vaerua” i roto i te Pipiria, e tukeke tona aiteanga. Inara e taiku ua ana rai te reira i tetai apinga kare te tangata e kite atu, mei te matangi, te a’o o te tangata e te manu. Taiku katoa mai te reira i te au mea vaerua koia oki te au angera, e te vaerua tapu koia oki to te Atua mana ririnui. Kare te Pipiria e apii ana e e tuanga ke mai tetai i roto i te tangata te ka ora ua atu rai me mate aia.—Exodo 35:21; Salamo 104:29; Ebera 1:7; Luka 11:13.

► Pene. 6, para. 5; Pene. 15, para. 17

19 GEHENNA

Ko *Gehenna* te ingoa o te ō i vao mai ia Ierusalem, e ngai teia e ta’uia ana te tita kia pou takiri. Kare e apinga e akapapu maira e i to Iesu tuatau, e tamamaeia ana me kore e ta’u oraora uaiia ana te manu e te tangata i roto i teia ō. Kare a *Gehenna* e akatutu maira i tetai ngai ngaro e tamamaeia ana me kore e ta’uia ana te tangata mate e tuatau ua atu. No te aronga ka titiriia ki roto i *Gehenna*, akakite a Iesu e ka takore takiriia ratou.—Mataio 5:22; 10:28.

► Pene. 7, para. 20

20 TE PURE A TE ATU

Ko te pure teia ta Iesu i oronga i tona apii anga i tana au pipi akapeea me pure. Kapiki katoaia teia e ko te pure To Matou Metua me kore Te Pure a te Atua. Apii mai a Iesu kia pure tatou:

“Kia tapu toou ingoa”

Pure tatou kia takore a Iehova i te akakino i runga i tona ingoa, te rongo kino e te au pikikaa pouroa tei taviivii i tona ingoa, kia rauka i to te rangi e to te enua katoa nei te akakakā e te akangateitei i te ingoa o te Atua.

“Kia tae toou basileia”

Pure tatou ki te Atua kia takore tona kavamani i teia ao kino o Satani e kia tutara te reira ki rungao i te enua nei, e kia akariro i te enua katoa ei parataito.

“Kia akonoia toou anoano i te enua nei”

Pure tatou kia akatupuia to te Atua akakoroanga no te enua, kia rauka i te au tangata akarongo e te apa kore i te noo e mutu kore ua atu i roto i te enua Parataito, mei ta Iehova i inangaro, i tona anga mai anga i te tangata.

► Pene. 8, para. 2

21 TE OKO

Oronga mai a Iehova i te oko ei akaora mai te tangata mei te ara e te mate. Ko te oko te tutaki tei anoanoia ei oko akaou mai i te oraanga tangata apa kore ta Adamu i takore, kia rauka akaou te pirianga au o te tangata kia Iehova. Tono mai te Atua i tana Tamaiti ki te enua nei kia mate no te aronga ara pouroa. No te mate o Iesu, i rauka ai te tangata ravarai te tikaanga kia ora e tuatau ua atu ei aronga ara kore.

► Pene. 8, para. 21; Pene. 9, para. 13

22 NO TEAA I PUAPINGA AI TE MATAITI 1914?

Apii mai te totou i roto ia Daniela pene 4 e ka akanoo te Atua i tona Patireia i te 1914.

Te totou: Na roto i te moemoea, kua oronga a lehova ki te Ariki ko Nebukanesa, i te totou no runga i tetai tumu rakau tei tipuia kia raro. Kua tatuai te tumu ki te ruru auri e te veo kia kore te reira e tupu no e “itu ua atu tuatau.” Me pou taua tuatau ra ka tupu akaou te tumu rakau. —Daniela 4:1, 10-16.

Te puapinga o te totou no tatou: Te akatutu maira te tumu rakau i ta lehova tutaraanga. No te au mataiti e manganui kua akariro a lehova i te au ariki i Ierusalem e tutara i te iti tangata Iseraela. (1 Paraleipomeno 29:23) Kua akarongo kore ratou e kua takoreia ta ratou tutaraanga. Akapouia a Ierusalem i te 607 M.T.N. Akamata mai i reira te “itu ua atu tuatau.” (2 Ariki 25:1, 8-10; Ezeiela 21:25-27) Akakite a Iesu e, “Ka takatakaiia oki Ierusalem e te au etene, e kia ope tikai to te etene tuatau.” Te tuatua ra aia no runga i te “itu ua atu tuatau.” (Luka 21:24) Kare te “itu ua atu tuatau” i ope ana i to Iesu tuatau. Taputou a lehova e ka iki aia i tetai Ariki i te openga o taua “itu ua atu tuatau.” Ka apai mai te tutaraanga a teia Ariki ou ko Iesu, i te akameitakianga mutukore no to lehova iti tangata i te enua nei.—Luka 1: 30-33.

Te roa o te “itu ua atu tuatau”: E 2,520 mataiti te roa o te “itu ua atu tuatau.” Me tare tatou e 2,520 mataiti mei te 607 M.T.N., ka tae atu ki te 1914. Te tuatau teia i akamana ai a lehova ia Iesu te Mesia, ei Ariki, no te Patireia o te Atua i te rangi.

ORAMA A NEBUKANESA NO TE TUMU RAKAU

APII IA TATOU NO RUNGA I TE PATIREIA O TE ATUA

TE TOTOU

Tumu rakau
maatamaata
(Daniela 4:10, 11)



“Ka tua ana i te rakau ki raro”
(Daniela 4:14)



Tutaraanga

Ope te tutaraanga

AITEANGA O TE TOTOU

Au ariki o Iseraela
tei tutara i te iti
tangata o te Atua



Takoreia a Ierusalem,
ope te tutaraanga a
te au ariki o Iseraela

Okotopa
607 M.T.N.




“Kia itua atu tuatau
i te na runga anga”
(Daniela 4:16)



“Itua atu tuatau”

“E roiro noou tikai
taua basileia
noou nei”
(Daniela 4:26)



Akaoki akaouia te tutaraanga

2,520 mataiti

Akamata a Iesu te tutara
i te rangi ei Ariki no te
Patireia o te Atua

M.T.N.

606 mataiti
e 3 marama

T.N.

1,913 mataiti
e 9 marama

Okotopa
1914 T.N.

“Ka takatakaiia oki
Ierusalem . . .
e kia ope tikai to te
etene tuatau”
(Luka 21:24)



Akapeea i rauka ai te numero 2,520? Akakite te Pipiria e ko te katoaanga o “tetai tuatau, e nga tuatau, e te vaenga o tetai tuatau,” e 1,260 rā. (Apokalupo 12:6, 14) Kapiti e rua 1,260 rā, te katoatoa, e 2,520 rā. Te 2,520 rā, te aiteanga e 2,520 mataiti. Rotai teia ki te tareanga rā i roto i te totou Pipiria, “okotai rā okotai iā mataiti.”—Numero 14:34; Ezekielā 4:6.

► Pene. 8, para. 23

23 MIKAELA TE ANGERA MAATA

Te tuatua “angera maata” te aiteanga, “pu o te au angera.” E tai rai angera maata ta te Pipiria i taiku mai, ko Mikaela tona ingoa.—Daniela 12:1; Iuda 9.

Ko Mikaela te Arataki o to Iehova nuku angera tiratiratu. Akakite te puka o Apokalupo 12:7: “Ko Mikaela e tana au angela, tamaki atura i te taae . . . e tana au angela.” Akakite te puka o Apokalupo e ko Iesu te Arataki o te nuku o te Atua, no reira ko Mikaela tetai ingoa o Iesu.—Apokalupo 19:14-16.

► Pene. 9, para. 4

24 TE AU RĀ OPENGA

Teia tuatua, te tou ra ki te tuatau e tupu ei tetai au mea puapinga i te enua nei i mua ua ake ka takore ei te Patireia o te Atua i to Satani ao. Roto i te totou Pipiria, te aerenga tuatua mei “te openga o teianeia ao” e “te aerenga mai o te Tamaiti a te tangata nei,” te tou ra ki taua tuatau rai. (Mataio 24:3, 27, 37) Akamata “te au rā openga” i te tutara anga te Patireia o te Atua i te rangi i te 1914, e ka ope me takoreia to Satani ao me tae mai a Aramagido.—2 Timoteo 3:1; 2 Petero 3:3.

► Pene. 9, para. 5

25 AKATUAKAOUANGA

Me akaora akaou mai te Atua i tetai tangata i mate, kapikiia te reira e tuakaouanga. Taiku mai te Pipiria e iva tuakaouanga. Kua rave ana a Elia, Elisaia, Iesu, Petero, e Paulo i te au akatuakaouanga. Na te mana anake ua o Iehova i rauka ai te rave i teia au temeio. Taputou a Iehova e ka akatu akaouia te “aronga tuatua-tika e te aronga tuatua-tika kore” ki te enua nei. (Angaanga 24:15) Akakite katoa mai te Pipiria, e tuakaouanga to te rangi, me akatu akaouia mai te aronga tei ikiia e tei akatainuia e Iehova, kia tutara kapiti e Iesu i te rangi.—Ioane 5:28, 29; 11:25; Philipi 3:11; Apokalupo 20:5, 6.

► Pene. 9, para. 13

26 ANGAANGA TEMONI (PUREPURE)

Te angaanga temoni e te purepure e peu kino te reira, e timata ana te tangata kia karangaranga atu ki te au vaerua kino na roto i te taunga purepure me kore i tetai tangata tei ui ki tei mate. Te aronga e rave ra i teia au peu, irinaki ratou i te apianga pikikaa e ka ora atu te vaerua tangata i muri ake i te mate, e ka riro ei tupapaku. Te akanauru katoa nei te au temoni i te tangata kia akarongo kore i te Atua. E angaanga temoni te peu akara etu, taura-atua, peu manamana, te purepure, e te vai atura. E maata te au puka, makatini, teata, tutu, e te au imene, e akavare ana i te tangata kia manako e kare teia au peu e kino ana. E maata te au peu tanumanga, mei te kave eva, akamaara i te matenga o tetai, te apare e te tuatua ki te au temoni. E taangaanga ana te tangata i te vairakau akakona, te kava, e te avaava me rave i teia au peu temoni.—Galatia 5:20; Apokalupo 21:8.

► Pene. 10, para. 10; Pene. 16, para. 4

27 TO IEHOVA MANA TUTARA NGATEITEI

Ko Iehova te Atua Mana Katoatoa, nana i anga i te ao katoa. (Apokalupo 15:3) Koia te Pu o te au mea ravarai e nona anake te mana ngateitei roa atu, te mana kia tutara i runga o te au mea Tana i anga. (Salamo 24:1; Isaia 40: 21-23; Apokalupo 4:11) E ture Tana no te au mea ravarai. E mana katoa to Iehova kia iki i etai ke ei au tutara. Me e inangaro to tatou ia Iehova e me akarongo iaia, ka turu tatou i Tona mana tutara ngateitei.—1 Paraleipomeno 29:11.

► Pene. 11, para. 10

28 TITIRI PEPE

Te titiri pepe, e mea akakoro tikai kia tamate i tetai pepe kare i anauia ake. Kare i te mea tupu poitirere ua mai e kare no te maki. Mei te taime mai i toia ai te oraanga o te pepe i roto i te mama, e oraanga takake to te pepe i roto i te vairanga tamariki o te mama.

► Pene. 13, para. 5

29 PAMU TOTO

E ravenga rapakau teia e raveia ana no te pamu i te toto iro koreia me kore, i tetai o te au tuanga maata o te toto mei roto atu i tetai tangata, ki roto i te kopapa o tetai tangata ke mai me kore, mei roto atu i tetai vairanga tei tukuia te toto ki roto. Ko te au tuanga maata o te toto, e *plasma*, e *cell* muramura, e *cell* teatea, e te *platelet*.

► Pene. 13, para. 13

30 AKO

Roto i te Pipiria, ko te tuatua no te “ako,” kare ko te akautunga ua te ō maira. Me akoia tatou, te ikuikuia ra tatou, te apiiia ra e te akatikatikaia ra. Kare roa a Iehova e māro e e takinga kino i te aronga tana e ako ra. (Maseli 4:1, 2) Kua akanoo a Iehova i te akaraanga meitaki no te au metua. Oronga aia i tana ako ma te marū e te tau, ka inangaro rai te tangata i te akono. (Maseli 12:1) Tereni Aia i tona iti tangata no tona inangaro ia ratou. Oronga i te ikuikuanga ei akatikatika i to ratou aerenga manako tarevake e kia aru ratou i Tona arataa. E tauturu te au metua i ta ratou tamariki kia mārama i te tumu ka anoanoia ai ratou kia akarongo. Apii katoa ia ratou kia inangaro ia Iehova e tana Tuatua te Pipiria e kia mārama i te au kaveinga i roto.

► Pene. 14, para. 13

31 AU TEMONI

E au mea ora kino teia e te ririnui, kare e kiteaia e te mata tangata kia akara. E au angera kino te au temoni. To ratou akarongo kore anga i te Atua, riro ratou ei enemi Nona e ei au angera kino. (Genese 6:2; Iuda 6) Piri ratou kia Satani i te meameaau ia Iehova.—Deuteronomi 32:17; Luka 8:30; Angaanga 16:16; Iakobo 2:19.

► Pene. 16, para. 4

No tetai akakiteanga maata atu, aere ki te www.jw.org
me kore e aravei atu i te Au Kite o Iehova.